

Tti Jian Joajn   Jesucristo Que Dicjin Lucas

Quedonda Lucas dicjin joajna jihi

¹ Tsje chojni cjin histor   Jesucristo inchin jehe conhe co jehe joinchehe ngataha nontte jihi. ² Jehe na cjin na inchin joinchecoanna na tti chojni que vicon cain tti joinchehe Jes  s desde are nacoexinxon co cjoenguijna na Jes  s para ndache na chojni tti jian joajna que joixin de ngain Dios. ³ Janha cai joanchiangui jian de ixin cain tti joinchehe Jes  s desde coexinxin x  , co janha xaxanho que jian j   para que janha rrocjin na cain cosa jihi inchin conhe para ixin jaha Te  filo, ixin jaha tti compa  nerona que anto jian, ⁴ para que jaha jian rrochonxin tti ndoa que jointtacoanha jehe na.

N     ngel de Dios joinda  ho ixin tsongjih Juan, tti vancheguitte chojni

⁵ Are Herodes vehe rey de ngain Judea, are m   vehe n   xid  na que vini Zacar  as. Jehe vehe ngain grupoe xid  na que vini Ab  as. Co   hihi Zacar  as vini n  cha Elisabet. Co cayoi jehe na cdoi na de raz   Aar  n, tti cdoi saho xid  na. ⁶ Jehe Zacar  as conixin   hihi, Dios nda  ho ixin jian na co jehe na vaguitticaon na cain tti coetonha Dios co ja  n   xonhi chojni vanichja que ixin jehe na jianha vanchehe na. ⁷ Pero jehe na xonhi chjan vintechonda na, ixin Elisabet depors  n xonhi chjan

vancheconcjihi, co cayoi jehe na anto ojonchjan vintte na.

⁸ Ngain ná tiempo grupoe Zacarías joinchehe tocado joinchehe ҳа de dána ngaxinhi ningoe Dios, ⁹ ixin jamé costumbre vinttechonda cain xidána ngain tiempo mé, mexinxin ngain sorteo vitto-taon Zacarías para que jehe joixinhi ngaxinhi ningoe Dios para joicjaga tsjoca. ¹⁰ Ngor rato que jiche tsjoca ngaxinhi nihngo, ndoja cain chojni joinchecoanxinho na Dios. ¹¹ Co ngain rato mé Zacarías vicon ná ángel de Dios tajingattjen lado jian de ngain altar tti jichexin tsjoca. ¹² Are jehe vicon ángel mé, jehe ni inoeha quehe sinchehe ixin anto ҳaon. ¹³ Pero ángel mé ndačho ngain Zacarías:

—Zacarías ҳaonha, ixin Dios coinhi tti jaha joinchetseenhe ñao, mexinxin chiha Elisabet sincheconcjihi ná chjan que jaha sincheguinhi xan Juan. ¹⁴ Co jaha anto rrochaha co anto ҷjoin sarihi ngain vidá, co tsje chojni rroché na ixin tsoncjihi chjan mé. ¹⁵ Ixin xanha mé sehe xan xí importante para ixin Dios. Chjan mé siha xan vino ni cosa que coanxin chojni, co rrochonda xan anto tsje joachaxín Espíritu Santo desde icha saho que tsoncjihi xan. ¹⁶ Co de ixin tti jehe xan sinchehe xan, tsje chojni de ngain nación Israel rrocjan na sinchesayehe na Dios de jehe na tti chonda cain joachaxin. ¹⁷ Jehe Juan jihi tti saho tsí que Cristo, co rrochonda ҳajeho espíritu co ҳajeho joachaxin que vechonda profeta Elías, para rrondache chojni quežén jehe na sinao na xenhe na, co para que tti chojni que ditticaonha Dios tsangui na sitticaon na Dios. Jamé para que chojni nchao sayé na Cristo are jehe tsí.

18 Zacarías joanchiangui ngain ángel mé co ndačho:

—¿Queξén rrochondaxin seguro janha de ixin jíhi? Ixin janha atto dačhí na co cai čihhna.

19 Angel mé ndačho:

—Janha Gabriel na, co rrinttaha cain tti tte-tonha Dios. Jehe tti coetonna para joindattjo tti jian joajna jíhi. **20** Pero jai ixin jaha vitticaonha tti janha ndattjo, jaha tsottapo; čohoa rronichja hasta que tsонcijja xanha. Co jíhi siconhe ngain mero tiempoe.

21 Co ngoi rato mé, cain chojni ntiha techonhe na jehe Zacarías ndoja, co vinttegoan na admirado ixin Zacarías anto cončhenhe ngaxinhi nihngo. **22** Co are jehe vačhje, ičohoa nichja ngain na; cottimeja xaxaon na que Dios cjoagoe ná cosa ngaxinhi ningoe Dios. Co jehe nichja ngain na conixin joxon seña ixin ndacottapo.

23 Are joexin cain nchanho de xé Zacarías ngain nihngo icha importante, Zacarías sacjoi para nchiandoha. **24** Después de cain yá, čhihi jehe Zacarías oveyá nčha chjan, co de jamé vehe nčha, ivičhjexinha nčha de nchiandoha nčha naho conittjao, co xaxaon nčha: **25** “Dios joanjo joachaxin para que janha rriyá chjan jai para que chojni itsjanoha na na.”

Ná ángel joindačho ixin tsонcjhí Jesús

26 Vittjaxon incjaon conittjao, Dios rroanha jehe ángel Gabriel ngain regioen Galilea ngain ná rajna que dinihi Nazaret, **27** para joitsjehe ná xannčhí que vinihi María. Xannčhí mé virgen xan co ove-chonda xan compromiso de rrocottehe xan ná xí

que vинhi José, razé rey David. ²⁸ Angel mé joixinhi tti nchia que jixinhi xannchí mé, co ndačho ngain xan:

—Janha joichjaha joajna jaha ixin Dios anto rinao jaha! Dios jí nganji jaha; Dios icha jointtanchaon jaha de cainxin nchí.

²⁹ Pero are xannchí mé vicon xan jehe ángel mé co coinhi xan tti nichja ángel mé, jehe xan goan xan admirado co inoeha xan ixin quedonda jamé ndačho ángel ngain xan. ³⁰ Cottimeja ángel mé ndačho:

—María, xonha, ixin Dios anto rinao jaha. ³¹ Jai jaha sariyaha ná chjan co are osincheconcjih xan, jaha sincheguinho xan JESÚS. ³² Chjan mé anto importante sehe xan ngain Dios, co sinhi xan Xenhe Dios que ttjen ngajni, co jehe Dios rrochjé xan joachaxin de sehe xan rey inchin ndogoelitoe xan xančhen que vинhi David are saho. ³³ Jamé para que jehe xan tsetonha xan ngain nación Israel para cainxin tiempo, co tti jehe xan tsetonha xan xonhi tiempo tsjexin.

³⁴ Cottimeja María joanchiangui ngain ángel mé co ndačho:

—¿Quexén tsonhe jih, ixin janha xonhi xí rriquinha?

³⁵ Angel ndačho ngain María:

—Espíritu Santo tsí nganji jaha co joachaxín Dios que ttjen ngajni sisiandanji jaha inchin ná ttjoi. Mexinxin tti chjan que jaha sincheconcjih, sehe xan jian ngattoxon con Dios co sinhi xan Xenhe Dios. ³⁶ Cai nčhiprimá, Elisabet, sincheconcjih nčha ná chjan cai masqui onačhichjan nčha, mexinxin tti nchí que ndačho chojni que čhoha

ncheconcjihi chjan, jai jehe nčha ochonda nčha incjaon conittjao que jiyá nčha xenhe nčha.

³⁷ Para ixin Dios xonhi cosa tangui.

³⁸ Cottimeja María ndačho:

—Janha ditticanho cainxin tti ttetonha Dios; co mexinxin Dios nchao sinchehe nganji na janha inchin jaha ndachjenji na.

Conixin jeho yá, ángel mé sacjoi.

María cjoí joitsjehe Elisabet

³⁹ Ngain tiempo mé María toin cjoí joitsjehe jehe Elisabet que vehe ngain ná rajna ngagaha jna ngain nonttehe Judea. ⁴⁰ Co are María joiji nttiha jehe joixinhi nchiandoha Zacarías co chjé joajna jehe Elisabet. ⁴¹ Are Elisabet coinihi joajné María, chjan que veyá Elisabet coingui xan ngaxinhi tsehe, co ngain rato mé Espíritu Santo joí conixin anto tsje joachaxin ngain jehe Elisabet. ⁴² Cottimeja Elisabet ndačho sén ngain María:

—Dios jointtanchaon jaha icha que cainxin nčhí, co joinchenchaon xanha que rriyaha.

⁴³ ¿Quensen na janha para que joitsjena jaha janné tti Dios que chonda cain joachaxin nganji na janha? ⁴⁴ Ixin are janha coian joajná jaha, xanhna que rriyá, coingui xan ngaxinhi tsehe na ixin ché xan. ⁴⁵ Anto čhjoin para ixin jaha ixin vitticaon ixin siconha inchin ndačho Dios.

⁴⁶ Cottimeja ndačho María:
Almana nchecoanxinhi Dios.

⁴⁷ Co ansenna ché ngain Dios, tti chjana vida naroaxin.

⁴⁸ Ixin Dios xaxaon de ixin janha, tti rrihi inchin ná ninchehe xa para ixin jehe,

co jai pa ndaha chojni rrondačho na ixin anto
čhjoin vidana.

49 Ixin Dios, tti chonda cain joachaxin, jian nganji
na janha;
tsosayehe nombré jehe.

50 Jehe cainxin tiempo tsiaconohe cain chojni
que ḥaon ngain jehe.

51 Jehe joinchehe cosa anto importante;
co joacha ngain tti chojni que tonohe orgulloso
ngain ansén.

52 Tti chojni que chonda tsje joachaxin jehe
joinchenontte de ngain joachaxin,
co tti chojni que ḥonhi joachaxin chonda, jehe
Dios chjé na importancia.

53 Tti chojni noa jehe chjé na cosa jian,
co tti chojni rico jehe cointtohe na teḥoaxon rá na.

54 Jehe cjoenguijna nación Israel ixin mé ninchehe
xé jehe;

jehe tjañeha de ttiaconohe chojni mé,

55 ixin jamé ndačho jehe ngain ndogoelitoa na
xančjen Abraham conixin cain xenhe ndo
para cainxin tiempo.

56 Co ntiha tavehe María ngain Elisabet inchin
ní conittjao, cottimeja sacjan para nchiandoha.

Are concjih Juan, tti vancheguitte chojni

57 Después ovittja tiempo que Elisabet chonda
que joincheconcjih chjan, co jehe joincheconcjih
ná xanxí. **58** Cain nivecinoe co nifamilié cjoí na
joichjé na joajna ixin conohe na que Dios anto
jian ngain Elisabet. **59** Vittja jni nchanho, joichjé
na xanxichjan mé tti ḥohe que dini circuncisión,

co joinao na rroguinhi xan Zacarías inchin vinci
ndodé xan. ⁶⁰ Pero janné xan ndačho jan:

—Nahi. Xanhna chonda que sinhi xan Juan.

⁶¹ Co jehe na ndačhao na ngain Elisabet:

—¿Quedonda? xonhi nindoi dinki jañá.

⁶² Cottimeja joanchiangui na conixin seña ngain
ndodé xanxichjan mé para conohe na quežén ri-
nao jehe ndo sinhi xan. ⁶³ Jehe ndodé xan joanchia
ndo rioho tabla para coentaxin ndo, co nttiha jehe
ndo cjin ndo: “Jehe xan sinhi xan Juan.” Co
cainxin nite nttiha vinttegoan na admirado de
ixin nombre yá. ⁶⁴ Ngain rato mé Zacarías cjan
nichja iná, co coexinhi joinchecoanxinhi Dios.
⁶⁵ Conixin jihi, cain nivecinoe vinttegoan na ad-
mirado, co ngoixin región mé de ngagaha jna
de Judea vaguequin chojni de ixin quehe conhe.
⁶⁶ Cain chojni que vaconohe jihi, važaxaon na ixin
quedonda jañá conhe co vajanchianguihi chó na
co vandačho na:

—¿Quehe siguehe chjan yá?

Ixin ndoa Dios joinchenchaon xan.

Tti joinchecoanxin Zacarías

⁶⁷ Espíritu Santo joí conixin joachaxin ngain
Zacarías, ndodé xanxichjan mé, co Zacarías nichja
tti palabra que Dios joanjo ngain co ndačho:

⁶⁸ Cainxin chojni jiquininxin sinchecoanxinhi na
Dios de Israel, tti chonda cain joachaxin,
ixin jehe joí nganji na jáñ na xo chojní jehe co
joichjá na iná vida naroa.

⁶⁹ Jehe chjá na ná chojni que chonda tsje joachaxin
que danjo iná vida naroa,

co chojni jihu joixin de ngayé razé David, tti cjoj ian ninchehe xá para ixin Dios.

⁷⁰ Ixin Dios jehe jañá ndačho ngain profeta, co jehe profeta joindačho nganji jána, desde ngain tiempo are saho:

⁷¹ que ixin Dios tsjenguijna na para ngain chojni que ningacoan na co ngain chojni que rinaoħa na,

⁷² co joindačho profeta cai ixin Dios coiaconoehe nindogoelitoa na xančhjen,

co ixin jehe Dios xonhi tiempo rrotjañeh tti trato ian que jehe joinchechjian ngain na.

⁷³ Janhi tti ndačho Dios conixin juramento que sinchehe ngain ndogoelitoa na xančhjen Abraham:

⁷⁴ que ixin jehe tsančhjandaha na jána para ngain tti chojni que ningacoan na,

para que rroxaonha na sinttosayehe na jehe,

⁷⁵ co sontte na chojni ian para sontte na chojní Dios cainxin nchanho que jána sonttechon na.

⁷⁶ Co jaha, xanxichjanhna, jaha sinhi profeté Dios que ttjen ngajni,

ixin jaha tti tsji icha saho que Cristo para rrondache chojni que xén tsentoxinhi na vidé na, jamé jaha sinchechjian ná nttiha nao para ixin Cristo.

⁷⁷ Co jaha tti sinchenohe chojni Israel que tti jianha que jehe na tenchehe na nchao sitjañeh na,

co jamé Dios nchao rrochjé na iná vida naroa.

⁷⁸ Ixin Dios de jána, jehe anto rinao na co anto ttiaconoá na,

co jehe rroanha tti joadingasán de ngajni para sinchegasenhe cain chojni;

⁷⁹ para que sinchengasenhe tti chojni que te ngain tti naxin xehe ixin chojni mé rročho que jehe na ondavenhe na,

co para que tsjagoa na quežén sonao na cain chojni.

⁸⁰ Co xanxichjan mé vangui xan co cada nchanho icha cosoji xan de ngain Espíritu Santo. Co cainxin tiempo mé jehe xan vehe xan ngagaha jna tti xonhi chojni jí hasta que jehe xan coexinhi xan joinchecoenhe xan chojni Israel.

2

Are concjihí Jesús (Mt. 1.18-25)

¹ Chiaon tiempo are concjihí Juan, xiempérador vinci Augusto César, co jehe xa coetonha xa que cjoinhi ná censo para vinttetaxin cainxin chojni de ngoixin nonttehe chojni romano. ² Jihi tti saho censo que cjoinhi are Cirenio vehe gobernador ngain Siria. ³ Cainxin chojni que vintteha ngain rajné chonda que cjoí na ngain rajné na para vinttetaxin na. ⁴ Mexinxin José vačhjexin de rajna Nazaret ngain regioen Galilea, co sacjoi para ngain regioen Judea ngain rajna Belén, tti diconcjin David, ixin José razé David. ⁵ José cjoí para Belén para joiguetaxin jehe conixin María, tti ovehe de novia ngain José para tsottehe. Co are mé María oveyá chjan. ⁶ Co are jehe na nttiha ngain Belén, ovittja tiempo que María sincheconcjihí chjan mé. ⁷ Nttiha joincheconcjin María tti

saho xenhe, co jehe coensiha xan lonttochjenhe xan, co coenjoa xan ntiha ngá tti cajón que jinea coxinttá ixin xonhi cuarto vittja na ngain ni ná mesón ntiha.

Are ángel joinchenohe tti tettingaria coleco

⁸ Ntiha chian rajna Belén canxion xí que vaquingaria coleco vittoecaho xa colecoe xa ntiha ngataon jngui ngain ttie mé. ⁹ Co de repente jehe xa vicon xa joí ná ángel de Dios ngain xa, co chíxo de Dios que jehe joiaho joinchengasán ngoixin ngandanji xa; co jehe xa anto vinttexaon xa. ¹⁰ Pero ángel mé ndačho ngain xa:

—Xaonha ra ixin janha joiquian ná jian joajna nganji ra, que are tsinhi icha chojni anto rroché na cainxin na. ¹¹ Co mé rročho ixin jai ngain rajné David concjihí ná tti rrochjá ra iná vida naroaxin, co jehe mé CRISTO, tti chonda cainxin joachaxin. ¹² Co jihí ná señal para que jaha ra sigatsoan ra chjan mé: jaha ra sinchí ra chjan jihí jisia xan lonttochjenhe xan co tajijoá xan ngá cajón tti jinea coxinttá.

¹³ Co ngain rato mé, ntiha ngaca ángel mé cononxin anto tsje icha ángel que joixin de ngajni, co tenchecoanxinho Dios tendačho:

¹⁴ ¡Nttosayehe na Dios que ttjen ngajni, co ngataha nontte cain tti chojni que jehe Dios coinchiehe, que jehe na sinao chó na!

¹⁵ Cottimeja are cain ángel mé sacjoi para ngajni, jehe nitettingaria coleco ndache chó na:

—Chjin na para Belén, ditsjehe na tti conhe jihí, tti joindattjo na Dios.

16 Toin vinttecji na ndoa co nttiha vittjaxin na María co José, co vintteguicon na xannchinchjan tajijoaxa ngá cajón tti jinea coxinttá. **17** Are jehe na vintteguicon na xannchinchjan, jehe na coequin na cain tti ndačho ángel ngain na de ixin jehe chjan mé. **18** Co cainxin chojni que coinhi tti jehe na ndačho na vinttegoan chojni mé admirado. **19** Pero María cain cosa jiji coenchjinha ngain ansén, co anto važaxaon de ixin cain cosa jiji. **20** Jehe nitettingaria coleco sacjan na tti cointtohe na coe na, co joinchecoanxinhi na co joinchesayehe na Dios de ixin tti coinhi na de ngain ángel co ixin vicon na xannchinchjan jamé inchin ndačho ángel ngain na.

Are María co José joinchechienhe na Jesús ngain nihngo icha importante

21 Are vittja Jesús jni nchanho de concjihi, chjé na tti xohe que dinki circuncisión co joincheguinho na JESÚS, jamé inchin coetonha ángel ngain María icha saho que rrogueyá chjan mé.

22 Co are xette nchanho para María cosoji inchin ttetonha ley que vaye Moisés, jehe co José sajoicao na xanxichjan mé ngain nihngo icha importante que jí ngain ciudad de Jerusalén para coequininxin na xan ngain Dios. **23** Jehe na joinchehe na jañá ixin ngain ley de Dios jitaxin: “Xanxí que saho sincheconcjihi ná nchí, xan mé para ixin Dios.” **24** Mexinxin María co José vinttecji na ngain nihngo icha importante para joicán na ngain altar inchin ttetonha ley de Dios; nttaohe yó coquín o yó coxentta.

²⁵ Ngain tiempo mé nttiha Jerusalén vehe ná xí que vinhí Simeón. Mé vehe ná xí anto jian de ngain ansén, co jehe vanchesayehe Dios, co vachonhe tti nchanho are Dios tsjenguijna chojni ngain nación Israel sacha na ngain chojni romano. Espíritu Santo vehe ngain Simeón, ²⁶ co Espíritu Santo mé joinchenohe que jehe Simeón senha hasta que jehe sicon Cristo tsí, tti rrrorroanha Dios. ²⁷ Jehe Simeón jíhi cjoí ngain nihngo mé ixin jamé coetonha Espíritu Santo. Co are María co José joijicahó na Jesús nttiha para joinchehe na inchin ttetonha ley de Dios, ²⁸ are mé Simeón cjoá xanxichjan Jesús ngá rá co joinchecoanxinho Dios co ndačho:

²⁹ Janché, soixin onchao tančhjanda na senhe na, ixin janché ovicon janha tti soixin ndachjenji na.

³⁰ Janha oviconxin con tti joí para tsjenguijna na janha na,

³¹ que soixin rroanha ngattoxon con cain chojni.

³² Jehe chojni jíhi tti joadingasán que sinchen-gasenhe chojni de icha nación,

co de ixin jehe tsosayexin chojni Israel, chojnía soixin.

³³ José co María, janné Jesús, vinttegoan na admirado de ixin tti ndačho Simeón de ixin jehe Jesús. ³⁴ Cottimeja Simeón joinchetsenhe ñao Dios que sinchenchaon Jesús conixin María co José co ndačho ngain María, janné Jesús:

—Tsjexinxin, de ixin xanxichjan jíhi Dios sinchecastigá tsje chojni Israel co icha na Dios rrochjé na iná vida naroaxin de ixin tti sinchehe xan. Co jehe xan ná señal que joixin de ngain Dios que anto tsje chojni sitticaonha na jehe xan. ³⁵ Co

jamé rrožago tti ḥaxaon cada chojni ngain ansén na. Pero para jaha, cain jihi inchin ná espada que sattodoho almá, ixin anto joachjaon rrochonda.

³⁶ Ntiha vehe ná nčhi cai que vagayé nčha joajna de ngain Dios, co vini nčha Ana. Co mé nčhichjehe ná tti vini Fanuel, de ngain grupoe Aser de chojni Israel. Nčhi mé atto onačhichjan vehe nčha are mé. Co atto ḥa chjan nčha are dicottehe nčha, co vecao nčha xixihi nčha jeho yáto nano. ³⁷ Co are ngain tiempo mé ovechonda ochenta y cuatro nano de ndavenhe xixihi nčha. Jehe nčha vagačhjexinha nčha de ngaxinhi nihngo mé, ixin de ttie co de nchanho vanchesayehe nčha Dios; vaguecjáño nčha co vancheocoanxinhi nčha Dios. ³⁸ Co ngain rato mé conchienhe jehe Ana co después de joanjo gracias ngain Dios de ixin Jesús, coexinhi ndache cain chojni de ixin Jesús, tti chojni que techonhe tti nchanho are Dios tsjenguijna chojni Israel para sacha na ngain chojni romano.

Are María co José sacjancaho na Jesús para Nazaret

³⁹ Are joexin joinchehe na cain tti ttetonha ley de Dios, cjan na ngain Nazaret, rajné na, ngain regioen Galilea. ⁴⁰ Co Jesús icha vangui, co icha cosoji, co icha venohe jian, co Dios anto joinchenchaon.

Are Jesús cjoí ngaxinhi nihngo icha importante

⁴¹ José co María, janné Jesús, cain nano vacji na ngain ciudad Jerusalén para ixin tti quiai dinki pascua. ⁴² Are Jesús joinchexette tteyó nano, jehe co José, co María, janné, canio na cjoí na Jerusalén

inchin costumbré na ngain quiai mé. ⁴³ Co are ojoexin quiai mé, jehe na sacjan na co Jesús ndadiguittohe nttiha Jerusalén, co José co María venoeha na. ⁴⁴ Jehe na ḥaxaon na que puede Jesús nttiha joí ngayé chojni, co jamé sacjoi na ngoixin nchanho mé. Pero are ondaconaxin xehe, jehe na cjoé na Jesús ngayé icha ni ichó co niamigoe na, ⁴⁵ co vittjaha na Jesús. Cottimeja sacjan na para Jerusalén iná para cjoé na Jesús nttiha.

⁴⁶ Vatto ní nchanho, cottimeja vittja na Jesús tají ngaxinhi nihngo icha importante, ngayé ximae-stroe ley tajittinhi tti tendačho xa co jehe danchiangui ngain xa icha cosa de Dios. ⁴⁷ Cain chojni que coinihi tti ndačho jehe vinttegoan na admirado ixin tti nichja jehe jian jí, co de cain pregunta que joanchiangui xa ngain, jehe nchao ndačho cain. ⁴⁸ Are José co María vicon na mé, vinttegoan na admirado, co janné ndačho jan ngain jehe:

—Hijo, ¿quedonda jañá joinchehe nganji na janha na? Ndodá conixin janha tettjé ra jaha co anto ḥaon na.

⁴⁹ Cottimeja Jesús ndačho:

—¿Quedonda ttjé ni ra? ¿Anoaha ra que janha chonda que sarihi ngain nihngo para ixin asunto de Ndodana?

⁵⁰ Pero jehe na coinxinha na tti ndačho Jesús ngain na.

⁵¹ Cottimeja Jesús conixin José co María sacjan na para Nazaret, co Jesús anto vanchehe sigue vaguitticaon ngain cayoi na. Co María, janné Jesús, cain jihi coenchjinha jan ngain ansén jan. ⁵² Co de cain tiempo mé Jesús icha vangui de ngain cuerpo co de ngain joarrixaoen, co Dios, conixin

cain chojni que chonxin jehe Jesús anto joinao na jehe.

3

*Are Juan ndache chojni ngagaha jna joajné Dios
(Mt. 3.1-12; Mr. 1.1-8; Jn. 1.19-28)*

¹ Vittjaxon quince nanó de jittetonha xiemperador Tiberio César, are mé Poncio Pilato vehe gobernador ngain Judea, co Herodes vehe gobernador ngain Galilea, co xanchó Herodes que vinhí Felipe vehe gobernador ngain región que dinihi Iturea co ngain región que dinihi Traconite, co Lisanias vehe gobernador ngain regioen Abilinia.

² Co are mé ná tti vinhí Anás co iná tti vinhí Caifás nimé ni vintte xidána icha importante. Ngain tiempo mé, de ngagaha jna tti xonhi chojni te, Dios nichja ngain Juan, xenhe Zacarías,³ co Juan vačhe cjoí ngain cain lugar de ngandehé río Jordán para ndache chojni ixin chonda na que tsentoxinhi na vidé na co siguitte na, para que cainxin tti jianha que nchehe na Dios sinchetjañehe na. ⁴ Cain jihi conhe inchin diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačho:

“Nchechjian ra nttiha para ixin jehe tti chonda cain joachaxin;

dantjehe ra ná nttiha nao.

⁵ Cain tsaga singattea tsaga, co cain jna co jnanchjan tsonataonxin; cain nttiha que jeha nao, tsonao nttiha, co cain nttiha que jeha nataonxin, tsonataonxin nttiha.

6 Cottimeja cainxin chojni sicon na tti rroanha
Dios para tsjenguijna jehe na.”

7 Are chojni vaconchienhe na para que Juan
rrojinchequitte na, jehe vandačho ngain na:

—Jaha ra xenhe conché ra! ¿Quensen jointanoha jaha ra ixin nchao setanha ra tti castigo anto soji que jitonchian? **8** Saho ncuhehe ra jian para que jamé sicon icha chojni que jándoa coentoxinhi ra vidá ra co ndacheha chó ra: “Ján na razé Abraham na; mexinxin Dios tsjenguijna na”, ixin janha rrondattjo ra que hasta xo jihi Dios nchao sinchechjian xo chojni de razé Abraham. **9** Ojí listo hacha para tsončhinji nttá, co cain nttá que danjoha jian ttochjoin rročhinji ntta co rroche ntta ngain xo.

10 Cottimeja cain chojni mé joanchiangui na
ngain Juan co ndačho na:

—Mexinxin, ¿quehe chonda na que sinttaha na
remé?

11 Juan ndačho ngain na:

—Xo chonda ra yó camisa chonda ra que sanjo
ra ná camisa ngain tti chondaha ni ná camisa. Co
xo chonda ra tti jintte ra, jinttecoho ra tti chojni
que chondaha.

12 Nttiha vintteconchienhe canxion xicobrador
de impuesto cai para que joiguitte xa, co joanchiangui
xa ngain Juan co ndačho xa:

—Maestro, ¿quehe chonda na que sinttaha na
janha na?

13 Co Juan ndačho ngain xa:

—Ncuheha ra cobro icha de tti ttetonha ley.

14 Cai canxion xisoldado joanchianguihi xa Juan
co ndačho xa:

—Co janha na, ¿quehe chonda na que sinttaha na?

Juan ndačho ngain xa:

—Dantsjeha ra tomí chojni afuerza, ni tjan-guiha ra cosa que jehe na xonhi joinchehe na; jaha ra dintte ra contento conixin tti tomi que jaha ra tedacha ra.

¹⁵ Cain chojni mé anto joinao na conohe na ixin quensen Juan ixin xaxaon na que puede Juan jehe mé tti Cristo. ¹⁶ Pero Juan ndache cainxin na:

—Janha ndoa ntaguittexin chojni conixin jinda, pero toin tsí iná xí que sinttaguittexin ra conixin Espíritu Santo co Espíritu mé tsiaho xá xohi para sincheroa almá ra xá tonhe oro toroaxin ngain xohi. Co xí mé chonda xa anto icha tsje joachaxin que janha, ixin janha ni jiquininxinha na ni tsonxindangá corrié catté xa. ¹⁷ Xí mé ojiyá xa palé xa, para tsjendoaxin xa trigo, co para sačhjehe trigo paja. Sasicao xa cain trigo ngain nchiandoha xa, pero cain paja tsjaga xa ngain ná xohi que xonhi tiempo danga xoi.

¹⁸ Conixin jiji, co icaxin consejo, vandachexin Juan chojni tti jian joajna. ¹⁹ Co después, Juan joinchesattehe xigobernador Herodes ixin vecao xa jeho nchicoñadé xa que vinhi Herodías, mé cjoí čihi Felipe, xichó jehe Herodes, co jehe Juan joinchesattehe Herodes de ixin icha cosa jianha cai que joinchehe Herodes. ²⁰ Pero Herodes vitti-caonha. Co en lugar de rroguitticaon, joinchehe iná cosa jianha ixin jehe coiaxinho Juan ngain cárcel.

*Are joiguitte Jesús
(Mt. 3.13-17; Mr. 1.9-11)*

²¹ Saho de viaxinho Juan, ngain ná nchanho are Juan jincheguite anto tsje chojni, cai Jesús cjoí para que Juan jincheguite jehe. Co después que joiguitte Jesús, are jehe joinchecoanxinhi Dios, ngajni xiré ²² co Espíritu Santo xincanji xá ná conttoanajni ngataha Jesús co vicon na, co coinihi na tté Dios de ngajni que ndačho:

—Jaha tti Xanhna que janha anto rinaho, co de ixin jaha janha anto chahna.

*Cain nindogoelito xanchjen de Jesús
(Mt. 1.1-17)*

²³ Jesús vechonda inchin treinta nano are jehe coexinhi ndache chojni de ixin Dios. Cain chojni xaxaon na ixin jehe cjoí xenhe José. Jehe José mé cjoí chjan de Elí, ²⁴ co Elí cjoí chjan de Matat, co Matat cjoí chjan de Leví, co Leví cjoí chjan de Melqui, co Melqui cjoí chjan de Jana, co Jana cjoí chjan de José. ²⁵ José cjoí chjan de Matatías, co Matatías cjoí chjan de Amós, co Amós cjoí chjan de Nahum, co Nahum cjoí chjan de Esli, co Esli cjoí chjan de Nagai, ²⁶ Nagai cjoí chjan de Maat, co Maat cjoí chjan de Matatías, co Matatías cjoí chjan de Semei, co Semei cjoí chjan de José, co José cjoí chjan de Judá. ²⁷ Judá cjoí chjan de Joana, co Joana cjoí chjan de Resa, co Resa cjoí chjan de Zorobabel, co Zorobabel cjoí chjan de Salatiel, co Salatiel cjoí chjan de Neri. ²⁸ Neri cjoí chjan de Melqui, co Melqui cjoí chjan de Adi, co Adi cjoí chjan de Cosam, co Cosam cjoí chjan de Elmodam, co Elmodam cjoí chjan de Er. ²⁹ Er cjoí chjan de Josué, co Josué cjoí chjan de Eliezer, co Eliezer cjoí chjan de Jorim, co Jorim cjoí chjan de Matat.

³⁰ Matat cjoí chjan de Leví, co Leví cjoí chjan de Simeón, co Simeón cjoí chjan de Judá, co Judá cjoí chjan de José, co José cjoí chjan de Jonán, co Jonán cjoí chjan de Eliaquim. ³¹ Eliaquim cjoí chjan de Melea, co Melea cjoí chjan de Mainán, co Mainán cjoí chjan de Matata, co Matata cjoí chjan de Natán. ³² Natán cjoí chjan de David, co David cjoí chjan de Isaí, co Isaí cjoí chjan de Obed, co Obed cjoí chjan de Booz, co Booz cjoí chjan de Salmón, co Salmón cjoí chjan de Naasón. ³³ Naasón cjoí chjan de Aminadab, co Aminadab cjoí chjan de Aram, co Aram cjoí chjan de Esrom, co Esrom cjoí chjan de Fares, co Fares cjoí chjan de Judá. ³⁴ Judá cjoí chjan de Jacob, co Jacob cjoí chjan de Isaac, co Isaac cjoí chjan de Abraham, co Abraham cjoí chjan de Taré, co Taré cjoí chjan de Nacor. ³⁵ Nacor cjoí chjan de Serug, co Serug cjoí chjan de Ragau, co Ragau cjoí chjan de Peleg, co Peleg cjoí chjan de Heber, co Heber cjoí chjan de Sala. ³⁶ Sala cjoí chjan de Cainán, co Cainán cjoí chjan de Arfaxad, co Arfaxad cjoí chjan de Sem, co Sem cjoí chjan de Noé, co Noé cjoí chjan de Lamec. ³⁷ Lamec cjoí chjan de Matusalén, co Matusalén cjoí chjan de Enoc, co Enoc cjoí chjan de Jared, co Jared cjoí chjan de Mahalaleel, co Mahalaleel cjoí chjan de Cainán. ³⁸ Cainán cjoí chjan de Enós, co Enós cjoí chjan de Set, co Set cjoí chjan de Adán, co Adán cjoí chjan de Dios.

4

*Are inchínji joínao rrojincheyehe Jesúš
(Mt. 4.1-11; Mr. 1.12-13)*

¹ Espíritu Santo vittohe ngain Jesús, co joinchegayé Jesús anto tsje joachaxin. Are jehe cjanxin de rio Jordán Espíritu mé joicao Jesús para ngagaha jna tti ḵonhi chojni te. ² Nttiha vehe Jesús cuarenta nchanho, co inchínji joaquehe prueba ngain Jesús. Jesús ḵonhi joine de cainxin nchanho mé, co después Jesús venhe jintta. ³ Cottimeja inchínji ndačho ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Jesús ndačho:

—Ngain tti jitaxin Palabré Dios ndačho: “Chojni techonxin jeoha de tti jine na sino que cai de cain palabra que Dios ndačho.”

⁵ Cottimeja inchínji sajoicao Jesús ngataha ná jna anto noi. Co de nttiha anto daca cjoagoexin inchínji Jesús cainxin nación que jí ngoixin mundo. ⁶ Co inchínji ndačho ngain Jesús:

—Janha rrochjaha jaha cainxin joachaxin de tsetonhe cain nación yá, co cainxin cosa čhjoin que jí ngain nación yá. Ixin janha vayá cainxin yá, co janha rrochjaha cain yá tti chojni que janha rinaho rrochjaha. ⁷ Si jaha sarit toxin ntajochjiha co sinchesayana janha, cain yá cosá jaha.

⁸ Pero Jesús ndačho ngain inchínji:

—Sattjixin de nganji na janha, Satanás, ixin ndačho ngain tti jitaxin Palabré Dios: “Nchesayehe jeho Dios tti chonda joachaxin para ixin jaha co jeho jehe tti ditticaon jaha.”

⁹ Cottimeja jehe inchínji sajoicao Jesús para ngain ciudad de Jerusalén co nttiha inchínji

joinchecani Jesús para ngataha techoe nihngo icha importante. Co ndačho ngain Jesús:

—Si ndoa jaha Xenhe Dios, daritsingaxin de ntihí hasta tti nontte; ¹⁰ ixin ngain tti jitaxin Palabré Dios ndačho:

Dios tsetonhe ángel de jehe para senda jaha.

¹¹ Cain ángel mé rrocaha conixin rá,

para que xonhi tti tsonihi rottea de ixin xo.

¹² Jesús ndačho ngain inchínji:

—Cai ndačho ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

¹³ Co jañá are inchínji čohoa joincheyehe Jesús, jehe sacjoixin de ngain Jesús para ná tiempo.

Jesús coexinxin xé ngain Galilea

(Mt. 4.12-17; Mr. 1.14-15)

¹⁴ Jesús cjan para Galilea conixin anto tsje joachaxín Espíritu Santo, co cainxin chojni de ngain región mé vanichja na de ixin tti jian que vanchehe Jesús. ¹⁵ Jehe vanchecoenhe chojni de ixin Dios ngain cain nihngo de cain lugar nttiha, co cainxin chojni nttiha joinchesayehe na Jesús.

Jesús ngain Nazaret

(Mt. 13.53-58; Mr. 6.1-6)

¹⁶ Cottimeja, Jesús cjoí para Nazaret, tti rajna vanguixin jehe. Ngain nchanho que ncnejogaha ni, Jesús cjoí ngaxinhi nihngo nttiha inchin costumbré jehe, co nttiha vingattjen para tsjehe tti xón que jitaxin Palabré Dios. ¹⁷ Jehe na chjé na Jesús tti libro que dicjin profeta Isaías, co are jehe conxiré libro mé vittja tti jitaxin janhi:

¹⁸ Espíritu Santo de Dios jí nganji na janha,

ixin Dios chjana ḫa de ndačhjan tti jian joajna ngain chojni que inchin ondadiguenhe espiritu;

Dios rroanha na janha para sinttaxingamá tti chojni que tedetan tangui ngain ansén, co para rrochjaha libertad tti chojni que teaxinhi, co para rrochjaha jmacon tti chojni que diconha; co para de ixin janha tti chojni que detan tangui ngain icha chojni isetanha na tangui mé; ¹⁹ co para que rrondattjan chojni que ojoí tiempo que Dios tsjenguijna na.

²⁰ Cottimeja Jesús coejé libro mé, co joanjo libro ngain tti vacjenguijna chojni ngain servicio, co jehe tavehe. Co ixin cainxin chojni nttiha anto ḫoan na de ixin Jesús, ²¹ jehe coexinhi nichja co ndačho:

—Jai mismo joiconhe ngattoxon con ra tti jitaxin jihi.

²² Cain chojni nttiha nichja na jian de ixin Jesús, co vinttegoan na admirado de ixin tti palabra čhjoin que ndačho Jesús ngain na. Co jeho na joanchianguihi chó na co ndačho na:

—¿Ajeha jihi tti xitsihi José?

²³ Jesús ndačho ngain na:

—Seguro que jaha ra rrondachjenji ni ra janhi: “Jaha que danjo ḫoan, toጀoanha jaho”; co rrondachjenji ni ra cai: “Tti coian na joinchehe jaha ngain rajna Capernaum, ncchehe nttihi ngain rajná cai para sicon na janha na.”

²⁴ Cottimeja joinchehe sigue nichja, co ndačho:

—Rrondattjo ra ndoa que ni ná profeta sitti-caonha chojni de ngain rajné. ²⁵ Janha rrindattjo

ra seguro que vintte tsje nčhiganha ngain nacioen Israel ngain tiempoe profeta Elías, are joiha čhin ní nano co rioho co anto vehe jintta ngoixin nación. ²⁶ Pero Dios rroanha Elías para joicjenguijna ni ná nčhiganha que vintte Israel, sino que jehe cjoji para joicjenguijna ná nčhiganha que vehe ngain Sarepta, chiaon ciudad de Sidón. ²⁷ Cai vintte ngain Israel tsje chojni que vintteninxin chin lepra ngain tiempoe profeta Eliseo. Pero Eliseo joinchexingameha ni ná de jehe na, sino que jehe joinchexingamehe Naamán de ngain nonttehe Siria.

²⁸ Cain nite ngaxinhi nihngo ntiha are vinttequini na cain cosa yá, anto vinttegoñao na. ²⁹ Vingattjen na co vantsjexin na Jesús de ntiha, co joicao na hasta tti con jna ntiha, ngain tti jna diconchjian ciudad mé, para rrocjaxin na Jesús desde ntiha. ³⁰ Pero are orrocja na Jesús, jehe jion vatto ngayehe na co sacjoi.

*Ná xí que vechonda espíritu jianha
(Mr 1.21-28)*

³¹ Cottimeja Jesús cjan para Capernaum, ngain nonttehe Galilea co ntiha cada nchanho que ncnejogaha ni, jehe vacji ngain nihngo ntiha para vandache chojni de ixin Dios. ³² Chojni ntiha vaguinttegoan na admirado de ixin tti vandačho Jesús ixin vanichja conixin palabra de joachaxin.

³³ Ná nchanho ngain nihngo ntiha dicji ná xí que vechonda xa espíritu jianha ngaxinhi cuerpoe xa, co espíritu mé coyao co ndačho:

³⁴—Sattjin de nganji na jaha Jesús de Nazaret. ¿Ajoíhi jaha para santsjena ra joachaxin que

chonda na? Janha chonxin jaha co nona que jaha tti icha jian de ngain Dios.

³⁵ Jesús ndačho ngain espíritu jianha mé:

—¡Tencoa, co sattjixin de ngain xí yá!

Cottimeja jehe espíritu jianha joanca tti xí mé ngataha nontte ngattoxon con jehe na, co vačhjexin de ngaxinhi cuerpo xí mé, co xonhi tti conihi cuerpo xa. ³⁶ Cainxin chojni que vicon nttiha xao na, co vinttendache chó na:

—¿Quehe chonda palabré xí jih? Ixin ttetonha xa conixin anto joachaxin ngain espíritu jianha que jehe satsji co espíritu mé jamé sattji.

³⁷ Co cain rajna de ngoixin region mé conohe chojni tti jian que vanchehe Jesús.

*Jesús joinchexingamehe jannché Simón Pedro
(Mt. 8.14-15; Mr. 1.29-31)*

³⁸ Cottimeja Jesús vačhjexin de nihngó nttiha co sacjoi para nchiandoha Simón Pedro. Are mé jannché Pedro jinihi jan ixin ná soa anto soji, mexinxin joinchetsenhe na ñao Jesús para joinchexingamehe nanítá mé. ³⁹ Jesús joisé para ngain nanítá mé, co nichjayé soa mé, co ngain rato mé ndavačhje soa mé, co nanítá mé jaicoa vingattjen co joincheatendehe na.

*Jesús joinchexingamehe tsje ninihi
(Mt. 8.16-17; Mr. 1.32-34)*

⁴⁰ Are viataon nchanho mé, cain chojni que vinttechonda ninihi que vintteninxin de tsje chin, joiaho na cain chojni mé para ngain Jesús; co jehe coín rá ngataha cada na, co jamé Jesús joinchexingamehe cain na. ⁴¹ Tsje de jehe ninihi mé vinttechonda na espíritu jianha co

are vačhjexin espíritu mé de ngaxinhi cuerpo na,
coyao co ndačho:

—Jaha tti Xenhe Dios.

Pero Jesús joinchesattehe espíritu jianha mé co
Jesús coančhjandaha espíritu mé para nichja es-
piritu icha ixin vinttenohe que Jesús jehe tti Cristo.

*Jesús nichjé chojni ngain Galilea de ixin Dios
(Mr. 1.35-39)*

⁴² Are ovingasán ngain nchanho iná, Jesús
vačhjexin de ngain ciudad co sacjoi ngain ná lugar
tti xonhi chojni te. Pero chojni cjoé na Jesús
hasta que vittja na tti jí, co joinchetsenhe na ñao
Jesús ixin tarroguehe ntiha Capernaum ngain na.

⁴³ Pero jehe ndačho ngain na:

—Janha chonda que sindattjan chojni ngain
icanxin lugar ixin ojoí tiempo are Dios tsetonha
ngain ansén na ixin para mé rroanxin na Dios
janha.

⁴⁴ Co jañá vacji Jesús ngain cain nihngo ngoixin
regioen Galilea para vandache chojni de ixin Dios.

5

*Are Jesús joinchehe milagro para que jehe na tse
na copescado*

(Mt. 4.18-22; Mr. 1.16-20)

¹ Ná ntiha, Jesús tají ngandehe lago que dinki
Genesaret, co ntiha xatte anto tsje chojni que
hasta conttedoguehe Jesús ixin cain na joinao na
coini na joajné Dios. ² Co Jesús vicon ntiha tate
yó barco ngandehe jinda que xonhi chojni teringa
rato mé ixin xí que tse copescado ovania xa de
barco mé co tatettjén xa nonchaha. ³ Cottimeja

Jesús joixinhi ná de tti yó barco mé, co barco mé barcoe Simón Pedro, co Jesús ndačho ngain Pedro que sinchengaxinton barco de ngandehe nda. Cottimeja ntiha tavetaha Jesús ngataha barco co de ntiha ndachexin Jesús cain chojni que te ngandehe jinda de ixin Dios. ⁴ Are joexin nichija Jesús, jehe ndačho ngain Simón Pedro:

—Ttjiho barco ngain jinda tti icha nihnga, co ntiha dancahngui ra nonchá ra para rrotse ra copescado.

⁵ Pedro ndačho ngain Jesús:

—Maestro, ngoixin ttie jointtaha na ḫa co ḫonhi copescado tse na; pero jaxon soixin rritetonna, mexinxin janha sigancahngui nonchaha iná ngain jinda.

⁶ Are jamé joinchehe na, ndoa anto tsje copescado tse na que hasta ocoexinhi čhintaon nonchaha. ⁷ Cottimeja joinchehe na seña xicompañeroe na que teringa ngain barco jngo para que joinchechienhe na barco mé para cjoenguijna chó na. Co cayoi barco joinchecaon na de copescado que hasta joinao sarroxincajingui barco jinda. ⁸ Are vicon Simón Pedro jihi, jehe vettoxin nttajochjihi ngain Jesús co ndačho:

—Nttatsanha ñao sattjixin soixin de nganji na janha ixin janha anto tsje cosa jianha jointtaha.

⁹ Simón Pedro ndačho jañá ixin jehe anto ḫaon conixin cain chojni que te ngain, ixin anto tsje copescado tse na. ¹⁰ Cai Jacobo co Juan, cayoi xenhe Zebedeo, tti xicompañeroe Pedro, anto vintteḥaon xa cai. Pero Jesús ndačho ngain Pedro:

—Xaonha jaha ixin jai pa ndaha en lugar de copescado, jaha satse chojni para ixin Dios.

¹¹ Cottimeja are joinchechienhe na barco ngandehe ndachaon, vinttegania na co nttiha cointohe na cainxin cosé na co savinttecji na conixin Jesús.

*Jesús joinchexingamehe ná tti vechonda lepra
(Mt. 8.1-4; Mr. 1.40-45)*

¹² Are Jesús vehe ngain ná rajna nttiha, conchienhe ná xí ngain Jesús. Xí mé vechonda xa chin lepra. Co are vicon xa Jesús, jehe xa vettoxin nttaojochiji xa co visé xa hasta tti ngataha nontte co joinchetsenhe xa ñao Jesús co ndačho xa:

—Si soixin rinao, nchao sinchexingamana de chin que rrichonda.

¹³ Cottimeja Jesús catte xí mé co ndačho ngain xa:

—Ján rinaho; xingamaha.

Co ngain rato mé ndavitján tti chin lepra que vechonda xí mé. ¹⁴ Cottimeja Jesús coetonhe xí mé que xonhi chojni rrondache xa. Jesús ndačho ngain xí mé:

—Jeho ttji ngain xidána para que jehe xa sicon xa que jaha ixonhi chin chonda co danjo cosa ngain Dios inchin ttetonha ley que vayé Moisés para que cainxin chojni tsonohe na ixin jaha ixonhi chin chonda.

¹⁵ Pero nchanho co nchanho icha tsje chojni vaconohe de ixin tti jian que vanchehe Jesús. Co anto tsje chojni važatte ngain para vaquinhi na de ixin Dios, co para que Jesús vanchexingamehe na de quexeho chin que vinttechonda na. ¹⁶ Pero Jesús tsje nttiha vagačhjenda savacji ngain lugar

tti ḵonhi chojni te, co nttiha jehe vanchecoanxinki Dios.

*Jesús joinchexingamehe ná tti čhoha vacji
(Mt. 9.1-8; Mr. 2.1-12)*

¹⁷ Ná nchanho Jesús tajindache tsje chojni de ixin Dios, co no nttiha tate canxion xifariseo co canxion ximaestroe ley que vinttequixin de cainxin rajna de ngain regioen Galilea co de ngain regioen Judea co de ngain ciudad de Jerusalén. Co are mé Jesús cjoago que joachaxín Dios jí ngain jehe ixin joinchexingamehe tsje chojni nihi. ¹⁸ Are mé, vinttequí canxion xí que vinttequiaoxin xa camilla ná tti čhoha vacji, co joinao chojni mé rrožanxinki na jehe tti nihi mé ngaxinki nchia tti jí Jesús co rroquín na nttiha ngattoxon con Jesús. ¹⁹ Pero čhoha vixinhi na ixin anto tsje chojni te ngandanguí nchia mé. Cottimeja coani na ngataha techoe nchia co vinttjian na canxion teja, para que nttiha joinchexincanjinxin na tti nihi conixin camilla ngayehe chojni para vehe ngattoxon con Jesús. ²⁰ Are Jesús vicon que cain xí mé chonda xa seguro que Jesús sinchexingamehe jehe tti nihi mé, Jesús ndačho ngain tti nihi:

—Cain tti jianha que jaha joinchehe, janha ojointtatjañaha.

²¹ Cottimeja cain ximaestroe ley que te nttiha, co xifariseo vinttežaxaon xa: “¿Quensen xí jihi, que nchaoha jinichja xa para ixin Dios? ḵonhi chojni nchao sinchetjañehe iná chojni tti jianha que ncuhehe na, jeho Dios tti nchao sinchehe mé.”

²² Pero Jesús ovenohe tti težaxaon xa co ndačho ngain xa:

—¿Quedonda ḥaxaon ra jañá? ²³ ¿Quexehe tti icha tanguiha rrondattjan ná tti nihi: “Tti jianha que jaha joinchehe janha ojonttatjañaha”, o rrondattjan: “Dingattjen co sattji”? ²⁴ Nchao jí remé, janha tsagoha jaha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que ncuhehe na.

Cottimeja Jesús cjan ngain tti nihi mé co ndačho:

—Janha rrindattjo jaha que dingattjen, co tsinhi camillá co sattji para nchiandoi.

²⁵ Ngain rato mé jehe tti čoha vacji mé vingattjen ngattoxon con cain chojni nttiha, co tsín camillé tti vetsingataha co sacjoi para nchian-doha. Co ngoixin sacjoi jehe joinchecoanxinho Dios. ²⁶ Cain chojni que te nttiha vinttegoan na admirado co cain na joinchecoanxinho na Dios cai, co hasta težaon na ndačho na:

—Jai gocon na cosa čhjoin que ni ná nchanho goconha na jíhi.

*Jesús nichjé Leví
(Mt. 9.9-13; Mr. 2.13-17)*

²⁷ Después de cain jíhi Jesús vačhjexin de nttiha, co jehe vicon ná xicobrador de impuesto que vinhi Leví. Jehe xí mé tají xa ngain mesa tti xengaxin hna impuesto, co Jesús ndačho ngain xí mé:

—Ẋacoi chjin na.

²⁸ Cottimeja jehe Leví, ngain rato mé vingattjen co nttiha cointtohe cain, co sarroé Jesús.

²⁹ Después Leví coín ná fiesta jie ngain nchian-doha para ixin Jesús, co nttiha joinecaho na tsje xicobrador de impuesto ngain nacoa mesa co icha chojni cai. ³⁰ Pero tsje xifariseo co ximaestroe

ley coexinhi xa nichja xa feo ngain tti chojni que vacao Jesús, ndačho xa ngain na:

—¿Quedonda jinttecoho ra co dicoho ra xicobrador de impuesto co icha chojni que nchehe jianha?

³¹ Jesús ndačho ngain xa:

—Chojni que niha, chojni mé rrrogondeha xinchexoan, jeho tti chojni nihi, mé tti rrrogondehe xinchexoan. ³² Janha joiha para joinichjá tti chojni que tenchehe jian, sino que chojni que tenchehe jianha para que jehe na tsentoxinhi na vidé na para isincheha na cosa jianha.

Are joanchianguihi na Jesús ixin quedonda chojni jehe dinttecjaño na

(Mt. 9.14-17; Mr. 2.18-22)

³³ Cottimeja jehe xa joanchianguihi xa Jesús co ndačho xa:

—¿Quedonda chojni que xícao Juan co chojní xifariseo anto dinttecjáño na co anto nchecoanx-inhi na Dios, pero chojni que čhjihó jaha cainxin nchanho jine na co dihi na?

³⁴ Jesús ndačho ngain xa:

—¿Apoco jaha ra nchao sinchecjáño ra tti chojni que rrondache ra siji ngain ná vandango tti tottehe na are xinovio ḫa jí xa ngain na? ³⁵ Pero tsí rato que chojni sasicao na xinovio, cottimeja jehe na sinttecjáño na.

³⁶ Cai ndačho Jesús ejemplo jihi ngain xa:

—Xonhi chojni ttinchje rioho lontto naroa para tteyehe lontto ntaxichjan. Si ná chojni sinchehe jamé, jehe ndasinchetján lontto naroa; co deporsín rioho lontto naroa čhjoinha dicon ni ngain

lontto ntaxichjan. ³⁷ Cai čohoa siquia ná ḵan que jidatsoxinhi ngá roan᷑an ntaxí, ixin si jamé tsonhe, tti ḵan que jidatsoxinhi tsončhintaon ḵan roan᷑an, co ḵan co roan᷑an cayoixin ndasitján. ³⁸ Mexinxin ḵan que jidatsoxinhi chonda que siquia ḵan ngá roan᷑an naroaxin, co jamé cayoi cosa xonhi tsonhe. ³⁹ Co ḵonhi chojni que dihi ḵantsja, cottimeja sinchexoxinhi sihi ḵan que dica tsjen, ixin ndačho na: “᷑antsja, ḵan mé tti icha jian.” Jañá tti costumbre que jaha ra chonda ra jiha de acuerdo ngain tti janha rrindattjo ra.

6

*Chojni que vacao Jesús cončinji na trigo ngain
nchanho que nchejogaha ni
(Mt. 12.1-8; Mr. 2.23-28)*

¹ Ná nchanho que nchejogaha ni, Jesús co tti chojni que vacao vatto na canxion jngui que diguinga trigo, co chojni que vacao Jesús cončinji na canxion ninchjan de trigo, co ngá rá na joincheroaxin na trigo co joine na noanchjan. ² Co canxion xifariseo joanchiangui xa ngain na co ndačho xa:

—¿Quedonda jaha ra nchehe ra ná ḵa que jiquinininha sinchehe ni ngain tti nchanho que nchejogaha ni?

³ Cottimeja Jesús ndačho ngain xa:

—¿Adiconha jaha ra tti jitaxin ngain Palabré Dios de ixin quexén joinchehe David, jehe conixin cain xicompañeroe ngain ná nchanho are anto vinteguenhe na jintta? ⁴ David conixin cain xicompañeroe joixinhi na nihngo icha importante co David coá tti niottja que joixin ngataha alté Dios co

joine nio, co joanjo nio ngain cain xicompañeroe que joicao. Co niottja mé jeho xidána jiquininxin vane xa nio.

⁵ Cai ndačho Jesús ngain xa:

—Janha, tti Xí que joixin de ngajni, chonda joachaxin cai para tti nchanho que nchejogaha ni.

Tti xí que ndadixemadoho ná rá
(Mt. 12.9-14; Mr. 3.1-6)

⁶ Iná nchanho que nchejogaha ni, Jesús joixinhi iná nihngo co coexinhi joinchecoenhe chojni de ixin Dios. Co nttiha tají ná xí que ndadixemadoho ná rá xa, ra jian. ⁷ Co ximaestroe ley, co xifariseo tatetsayehe xa Jesús para sicon xa asinchingamehe xí mé ngain nchanho que nchejogaha ni, para jamé rrochonda xa quehe rrocjanguixin xa Jesús. ⁸ Pero Jesús ovenohe quehe težaxaon ximaestroe ley co xifariseo, co jehe ndache tti xí que ndadixemadoho ná rá:

—Dingattjen co darihi ngosine.

Tti xí vingattjen co cjoí vengattjen ngosine.

⁹ Cottimeja Jesús ndačho ngain ximaestroe ley co xifariseo:

—Janha sanchianguiha ra ná cosa: ¿Quehe jiquininxin sinchehe ni ngain nchanho que nchejogaha ni; asinchehe ni jian, o asinchehe ni tti jianha? ¿Atsančhjandaha ni chojni ndasenhe, o ani nasoenxon ni?

¹⁰ Cottimeja Jesús tsjehé ngain nite ngandanji jehe, co ndačho ngain tti xí mé:

—Ttinxe rá.

Co tti xí coinxe rá, co ngain rato mé i\x0f\x01onhi chin vechonda rá tti xí mé; ondaxingamehe. ¹¹ Pero xi-canxin anto vinttegoñao xa co coexinhi xa joanchi-anguihí chó xa ixin quehe sinchehe xa ngain Jes\x0f\x01s.

*Jes\x0f\x01s coinchiehe tti tteyó chojni que vacao
(Mt. 10.1-4; Mr. 3.13-19)*

¹² Ná nchanho ngain tiempo mé Jes\x0f\x01s sacjoi ngagaha ná jna para joinchecoanxinhi Dios, co ngoixin ttie mé Jes\x0f\x01s joinchecoanxinhi Dios. ¹³ Are vingasán, jehe vayé cain chojni que vacao, co coinchiehe tteyó de jehe na, tti ni jehe joincheguinhi representanté jehe. ¹⁴ Co nombré na cada na janhi: “Simón, tti jehe Jes\x0f\x01s joincheguinhi Pedro; Andrés xanchó Simón; Jacobo co Juan, Felipe co Bartolomé, ¹⁵ Mateo co Tomás, Jacobo, tti xenhe Alfeo; Simón jehe ná de tti partidoe chojni politico que vaquetocaho chojni romano; ¹⁶ Judas tti xanchó Jacobo; co Judas Iscariot tti joinda\x01cho para tse na Jes\x0f\x01s.

*Are Jes\x0f\x01s cjoagoe tsje chojni de ixin Dios
(Mt. 4.23-25)*

¹⁷ Jes\x0f\x01s xincanjinxin de ngagaha jna conixin tti tteyó chojn\x01 co tavintte na ngataon ná jngui, jehe conixin chojn\x01. Co \x01atte anto tsje chojni de ngoi regi\x01n de Judea co de ciudad de Jerusalén co de ngoixin ngandehé ndachaon ngain regioen ciudad de Tiro co Sidón. Cain chojni mé conchienhe na para joiquinhi na tti nichja Jes\x0f\x01s de ixin Dios co para joixingamehe na de ixin quexeho chin que techonda na. ¹⁸ Tti nivinttechonda esp\x01ritu jianha ngaxinhi cuerpo, cai xingamehe na. ¹⁹ Cain chojni joinao na catte na Jes\x0f\x01s, ixin jehe

vanchexingamehe cain chojni conixin joachaxín
Dios que jehe chonda.

*Quensen tti čhjoin sehe ngain vidé co quensen
tangui tsonhe*

(Mt. 5.1-12)

²⁰ Cottimeja Jesús tsjehe tti chojni que vacao co
ndačho ngain na:

—Anto čhjoin para ixin jaha ra xo noa ra ixin
jiquininxin ra ngajni tti ttetonha Dios.

²¹ 'Anto čhjoin para ixin jaha ra xo denhe ra
jintta jai, ixin después jaha ra tsojaha ra.

'Anto čhjoin para ixin jaha ra xo tsjanga ra jai,
ixin después jaha ra tsjano ra.

²² 'Anto čhjoin para ixin jaha ra are chojni tsoñao
nganji ra co are sengui ra na, co are rronichja
na feo nganji ra, co are rronichja na jianha de
ixin jaha ra ixin jaha ra chojnina janha, tti Xí que
joixin de ngajni. ²³ Are tsonha ra jamé jaha ra
chaha ra co anto čhjoin tonoha ra, ixin ngajni
rrochonda ra ná cosa anto jian, ixin cain chojni
que sinchehe jamé nganji ra, jamé joinchehe ni-
goelitoe na xančhen ngain cain profeta que joí
are saho.

²⁴ 'Pero anto tangui tsonha jaha ra xo chonda ra
tsje, ixin jaha ra ochaha ra nttihi ngataha nontte.

²⁵ 'Anto tangui tsonha jaha ra xo jai chonda ra
tsje para sintte ra, ixin después jaha ra senhe ra
jintta.

'Anto tangui tsonha jaha ra xo tjano ra jai, ixin
después jaha ra rrrotsjanga ra de joachjaon.

²⁶ 'Anto tangui tsonha jaha ra are caín chojni
rronichja na jian de ixin jaha ra ixin jañá cain

nigoelitoe na ḥančhjen vanchesayehe na tti chojni que jeha ndoa profeté Dios.

Jesús ndacho chonda que sinao ni chojni que ningaconhe ni

(Mt. 5.38-48; 7.12)

27 'Nganji ra ḫo tettinna ra janha rrondat-tjo ra: Rinao ra tti chojni que ningaconha ra, ncchehe ra jian ngain tti chojni que toñao nganji ra, **28** nchetesenhe ra ñao Dios ixin jehe sinchen-chaon tti chojni que nichja jianha de ixin jaha ra, co nchetesenhe ra ñao Dios para ixin tti chojni que nichja feo nganji ra. **29** Si čhonja chojni rro᷑anguihuá ná manazo ngá con, dittoaxin que rro᷑anguihuá iná manazo. Si čhonja tti santsjaha chamarrá, danjo cai hasta camisá. **30** Co quexeho chojni que sanchiaha ná cosa jaha chjehe; co are santsjaha na cosá, idanchieha na cosa mé iná. **31** Nchehe ra ngain chojni inchin jaha ra rinao ra sinchehe jehe na nganji ra.

32 'Si jaha ra rinao ra jeho tti chojni que rinao jaha ra, ¿quehe jian tenchehe ra? Ixin hasta tti chojni que ncchehe jianha, jehe na ncchehe na jañá cai. **33** Co si jeho ncchehe ra jian ngain tti chojni que ncchehe jian nganji ra, cai ¿quehe jian tenchehe ra? Ixin cai tti chojni que ncchehe jianha ncchehe na jamé cai. **34** O si nchecjen ra tomi jeho tti chojni que nchao tsjengaha ra hna, cai jeha jian tenchehe ra, ixin hasta tti chojni que ncchehe jianha nchecjen tomi ngain icha chojni que ncchehe jianha, ixin chonda na seguro que tsjenguehe chó na hna. **35** Jaha ra chonda ra que rinao ra chojni que ningaconha ra, co chonda ra que sinchehe

ra jian ngain na, co nchecjen ra na cosá ra, co xaxaonha ra ixin sacha ra chonja cosa. Co jamé ngajni nttiha rroxengaxin ra hna icha jian, co jaha ra sintte ra xenhe Dios que ttjen ngajni, ixin Dios jehe cai danjo cain cosa ngain tti chojni jianha co tti ni xonhi tiempo chjé gracias.³⁶ Ttiaconoeha ra icha chojni, jañá inchin Ndodá na que ttjen ngajni ttiaconoeha Ndo cain chojni.

*Ncheha ra juzgado iná chojni
(Mt. 7.1-5)*

³⁷ 'Ncheha ra juzgado iná chojni, para que Dios sincheha juzgado nganji ra. Ncheha ra condenado iná chojni para que Dios sinttaha ra condenado jaha ra. Nchetjañehe ra cain chojni, para que jamé Dios sinttatjañaha jaha ra cai. ³⁸ Chjehe ra tti chojni que rrogondehe, co Dios rrochjá ra tti rrogondaha ra. Dios rrochjá ra ngain bolsá ra ná medida jian, que tsonttedo jian, tsontsjenga ra jian co rrocaon jian. Ixin inchin medida que jaha ra dattechoixin ra, Dios jamé sattechoha ra cai.

³⁹ Jesús ndačho ejemplo jihí ngain na:

—¿Apoco ná tti chejo nchao sicao noxon nttiha iná tti chejo? Seguro que cayoixin chojni mé sinttian ngain ná ttoe. ⁴⁰ Ni ná tti jitangui jeha icha nohe que ximaestroe, masqui are tsjexin tsangui jeha sehe inchin ximaestroe.

⁴¹ '¿Quedonda ttijo cuidado de ixin tti anto nchín caxineno que jingangui jmacon iná chojni co ttjioha cuidado de ixin tti nttá jie que jingangui jmacon jaha? ⁴² Si jaha diconha tti nttá jie que jingangui jmacon, ¿quedonda ndačho ngain iná chojni ixin jehe sittoexin para que jaha santsjenguihi

caxineno nchín que jingangui jmacon jehe? ¡Jaha ná chojni jianha que ncheyaxon! Saho dantsjengui tti nttá jie que jingangui jmacon para que jamé nchao sicon jian para santsjengui caxineno nchín que jingangui jmacon iná chojni.

Nttattochjoin datsoan ni ntta de ixin ttochjoín ntta
(Mt. 7.17-20; 12.33-35)

⁴³ 'Xonhi nttattochjoin jian que sinchechjian ntta ttochjoin que xonhi xé, ni nttattochjoin que xonhi xé sinchechjian ntta ttochjoin jian. ⁴⁴ Naná nt-tattochjoin datsoan ni ntta de ixin ttochjoin que nccheinjian ntta. Nttanchaha nccheinjianha ntta higo, ni canchaha nccheinjianha ca uva. ⁴⁵ Tti chojni jian, jehe nichja cosa jian ixin tti jian jí ngain ansén; co tti chojni jianha, jehe nichja cosa jianha ixin tti jianha jí ngain ansén. Mexinxin cain tti jí ngain ansén chojni, mé tti nichja rroha.

Tti nchia que jingattjen ngataha ttjao co tti nchia que jingattjen ngataha jinchexonda
(Mt. 7.24-27)

⁴⁶ 'Jaha ra, ¿quedonda ndačho ra ixin janha tte-tonha nganji ra co ncbehra ra tti janha ndattjo ra? ⁴⁷ Tti chojni que tsí nganji janha, co jehe na tsinhi na tti rrondattjan na co sitticaon na, ⁴⁸ chojni mé inchin ná xí que ngue anto nihnga para que cjoenga xa basé nchiandoha xa ngataha ná ttjao. Are coyé jinda ngain río, soji vinqué nda nchia mé, pero čohoa coingui nchia mé ixin soji jixenga nchia ngataha ttjao. ⁴⁹ Pero tti chojni que ttinhi tti janha ndačhjan co ditticaonha na na, chojni mé inchin tti joinchechjian nchiandoha

ngatacoa jincheñonda ni cjoavaha ttjarioho. Co are coyé jinda ngain río, soji vinqué nda nchia mé, co ndacjamangui nchia. Jamé ndaxantte ngoixin nchia mé.

7

*Jesús joinchexingamehe ná xinchehe xé ná xicapitán romano
(Mt. 8:5-13)*

¹ Are Jesús joexin ndache chojni cain jihi, jehe sacjan para rajna Capernaum. ² Ntiha vehe ná xicapitán romano vechonda xa ná tti ncuhehe xé xa que jehe xa anto vajinao xa, co jehe tti ncuhehe xá mé ondajidenhe. ³ Are xicapitán mé coinhi xa de ixin Jesús, jehe xa rroanha xa canxion nijudío que vinttechonda joachaxin ngain ningoe na para joinchetsenhe na ñao Jesús para que jehe rrocji rrojinchexingamehe tti ncuhehe xé xa mé. ⁴ Cain nimé conchienhe na ngain Jesús co coexinhi na anto joinchetsenhe na ñao co vinttendačho na ngain:

—Xicapitán jihi jiquininxin que soixin tsjenguijna xa, ⁵ ixin jehe xa anto rinao na xa jáñ na xo judío na, co jehe xa mismo cjoenga xa hna para conchjian ná ningona na.

⁶ Cottimeja joicao na Jesús. Pero are ochian joiji na ngain nchiandoha xicapitán mé, jehe xa coetonhe xa canxion xiamigoe xa para joindačho xa ngain Jesús:

—Idoanha molestado soixin, ixin xicapitán ndačho xa que jehe xa jiquininxinha xa para soixin sixinhi nchiandoha xa. ⁷ Mexinxin jehe xa ni joiha xa para joichoanxin xa ngatja ntiha.

Jehe xa rinao xa que jeho ttetonha soixin para tti nchehe xé xa orroxingamehe. ⁸ Jehe xa nohe xa jamé ixin jehe xa mismo chonda que ditticaon xa ngain tti icha ttetonha de jehe xa, cai jehe xa chonda xa joachaxin de ttetonha xa ngain cain xisoldadoe xa. Are jehe xa ttetonhe xa ná de jehe xisoldado que tsji xa quexeho parte, jehe xa ttji xa. Co are jehe xa ttetonha xa que tsí xa, jehe xa ttí xa. Co are ttetonhe xinchehe xé xa que sinchehe xa quexeho xa jehe xa nchehe xa xa.

⁹ Are Jesús coinhi jihi, jehe goan admirado de ixin jehe xa co ngaria tsjehe ngain chojni que terroé, co ndačho ngain na:

—Ndoa, ni de ngacjan cainxin chojni judío vinconha janha ná chojni que anto ditticaon inchin xicapitán jihi.

¹⁰ Are cain xiamigoe xicapitán mé cjan xa nchia, vintteguicon xa jehe tti nchehe xa mé odixingamehe; ixonhi chin jichonda.

Jesúsjoinchexechon xanxichjenhe ná nčiganha

¹¹ Después de cain jihi, Jesús sacjoi para ngain ná rajna dinki Naín conixin chojni que vacao co tsje icha chojni cai. ¹² Are ojoiji na chian ngain rajna mé, jehe vicon que tedicjavá na ná chojni ndadiguenhe que mé tti nacoaxinxon xanxichjenhe nanítia janné xan, co jehe nanítia mé, ganha. Anto tsje chojni de ngain rajna mé tedicao jehe nanítia para tedicjavá na xenhe. ¹³ Are Jesús vicon nanítia, jehe coiaconohe co ndačho ngain:

—Itsjangaha.

¹⁴ Cottimeja Jesús conchienhe co catte cajón, co tti chojni que tedicao cajón tavinttengattjen na. Co Jesús ndache tti ndadiguenhe:

—Janha rrondattjo jaha: ¡Dingattjen!

¹⁵ Cottimeja jehe tti ndadiguenhe xendoza vengá chinttihi co ocoexinhi nichja, co jamé Jesús joanjo xanxí mé ngain janné xan. ¹⁶ Are chojni vicon na jihi, cainxin na anto ūaon na co coexinhi na joinchecoanxinhi na Dios co ndačho na:

—Ná profeta anto importante ngattoxon con Dios cononxin ngayá na.

Cai ndačho na:

—Dios joí para joicjenguijna chojní jehe.

¹⁷ Co ngoixin regioen Judea co icha regióon que te ngandanji regioen Judea conohe chojni ixin quehe joinchehe Jesús.

*Tti chojni que rroanha Juan
(Mt. 11.2-19)*

¹⁸ Juan, tti vancheguitte chojni, conohe cain jihi ixin chojni que vacao coequín na jehe. Cottimeja jehe vayé yó de jehe na, ¹⁹ co jehe rroanha na para ngain Jesús para joiganchiangui na Jesús si ndoa jehe tti Cristo tti chonda que tsí, o ni chonda que rrochonhe na iná. ²⁰ Tti chojni que rroanha Juan vintteconchienhe na ngain Jesús, co ndačho na ngain:

—Juan coetonna na para joiganchiangui na nganji jaha si ndoa jaha tti Cristo tti chonda que tsí, o ni ūa chonda na que rrochoan na iná.

²¹ Ngain rato que jehe na joiji na, Jesús joinchexingamehe anto tsje chojni que vinttechonda ojejé chin, co tti vinttechonda

espíritu jianha, co cai chjé jmacon tsje chojni chejo. ²² Mexinxin Jesús ndačho ngain chojni que rroanha Juan:

—Ttji ra co dindache ra Juan tti jaha ra vicon ra co tti jaha ra coinhi ra. Ttequinhi ra ixin tti chojni chejo, jai onchao dicon na, co tti chojni rrengo, jai onchao čhi na, co tti chojni que vinttechonda chin lepra, jai ixonhi chin mé techonda na, co tti chojni que vaquinha, jai onchao ttinhi na, co tti chojni que ondavenhe, jai xechon na, co tti chojni que inchin ndadiguenhe de ngain espiritue, jai ocoinhi na ixin Dios rrochjé na iná vida naroaxin. ²³ Co anto čhjoin para ixin tti chojni que sitticaon nganji na janha cain tiempo.

²⁴ Are savinttecji tti chojni que rroanha Juan, Jesús coexinhi ndache cain chojni que vittohe ntihia de ixin Juan, co ndačho:

—Are cjoi ra ngagaha jna tti xonhi chojni te para joitsjehe ra Juan, ¿quehe xaxaon ra rrogaticon ra ngain jehe? ¿Añaxaon ra ixin joarrixaoen seguroha inchin ná ntaxiji que nchequingui čhintto? ²⁵ Si jeha jamé, ¿quehe xaxaon ra rrogaticon ra? ¿Aná xí que jingá lontto anto rentte? ¡Nahi, jeha jamé! Jaha ra chonxin ra ixin tti chojni que tengá lontto rentte, mé te ngain nchiandoha rey, chojni mé teha ngagaha jna. ²⁶ Mexinxin ¿quehe tipo de chojni xaxaon ra rrogaticon ra? ¿Aní ná profeta de Dios? ¡Ján ndoa, co xí mé icha rentte que ná profeta! ²⁷ Juan, mé tti jindačhoxin ngain tti jitaxin Palabré Dios:

Icha saho que jaha tsji, janha rrrorroanha ná tti sicao joajnana,

para que jehe mé sinchechjian nttiha para ixin jaha.

²⁸ Janha rrindattjo ra que de cainxin chojni xonhi iná profeta icha importante joí que jeho Juan tti ncheguitte chojni; pero masqui jamé, tti chojni que icha importanteha ngain tti parte que tte-tonha Dios ngain ansén chojni, mé tti icha importante que Juan.

²⁹ Are coihni na jiji, cain chojni co cain xicobrador de impuesto que joiguitte ngain Juan joatsoan na que Dios ncuhehe cain cosa inchin jiquininxin. ³⁰ Pero xifariseo co ximaestroe ley que choha xa para que Juan rrojincheguitte xa, joinaoha xa tti jian que ndačho Dios rrojinchehe ngain xa. ³¹ Co Jesús ndačho:

—¿Quehe sinttacaninxin chojni de ngain tiempo jiji? ¿Quexén te joarrixaoen na? ³² Joarrixaoen na te inchin joarrixaoen xannchininchjan que dintte xan tsontaon xan ngain ndásin, co toyatte xan icha xan amigoe xan co ndačho xan: “Janha na jointtachjian na són conixin ná nttačo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

³³ Ixin Juan, tti ncheguitte chojni joí, co jehe jineha tsje ni diha vino, co jaha ra ndačho ra ixin jehe chonda ná espíritu jianha. ³⁴ Cottimeja joihi janha, tti Xí que joixin de ngajni, que jine co dihi vino, pero jaha ra ndačho ra ixin janha anto jine co anto dihi hasta coan na co ixin janha amigoe cain chojni que ncuhehe jianha, co cain xicobrador de impuesto. ³⁵ Pero tti nohe Dios, mé jian ixin chojni que Dios nchequinxin ncuhehe na jian.

Are Jesús ngain nchiandoha Simón, tti cjoí ná xifariseo

36 Ná de xifariseo ndache xa Jesús ixin joijine ngain nchiandoha xa co jehe Jesús cjoí ngain nchiandoha xa, co are ontihia, jehe vehe ngain mesa.

37 Co nttiha ngain rajna mé vehe ná nchí que vanchehe nčha jianha; co are conohe nčha ixin Jesús cjoí joijine ngain nchiandoha xifariseo mé, jehe nčha cjoí nčha conixin ná xočao de marmol jičhe de aceite xajni. **38** Co joí nčha toenxinrotté Jesús, vettoxin nttajochjihí nčha co tsjanga nčha. Mexinxin vinttjitte ndacon nčha rotté Jesús. Cottimeja jehe nčha joinchexemanxin nčha rotté Jesús conixin xajá nčha co coetoxin nčha rotté Jesús. Cottimeja coinga nčha aceite xajni rotté Jesús. **39** Are xifariseo mé vicon xa cain jihi, jehe xa xaxaon xa: “Si xí jihi rrocji xa ná profeta ndoa, jehe xa rroconohe xa quensen jicatte xa, co quehe clase de nchí yá; rroconohe xa ixin nchí yá anto tsje cosa jianha nchehe nčha.” **40** Cottimeja Jesús ndačho ngain xifariseo mé:

—Simón, janha chonda ná cosa que rrondattjo jaha.

Xifariseo mé ndačho xa:

—Ndachjenji na, Maestro.

41 Jesús ndačho:

—Vehe yó tti xí vintteca tomi ngain ná tti vacjadoa tomi. Ná de tti xí mé veca naho ciento de tomi, co tti iná veca cincuenta. **42** Pero ixin xonhi tomi vinttechonda cayoi tti xí mé, jehe tti cjoadoa tomi, joinchetjañehe cayoi tti xí mé tti tomi que jehe vintteca. Jai ndachjenji na jaha, ¿quexehe de cayoi tti xí mé icha sinao jehe tti vanjo tomi mé?

43 Simón mé ndačho ngain Jesús:

—Janha ḥaxanho que tti xí que vitjañehe icha tsje tomi.

Jesús ndačho:

—Ndoa tti ndačho.

44 Cottimeja Jesús tsjehe ngain nčhí mé co ndačho ngain Simón:

—¿Adicon jaha nčhí jih? Janha joixinhi nchiandoi, co jaha chjanaha jinda para cjoenxin rottena; pero nčhí jih cjoenna nčha rottena conixin ndacon nčha, co joinchexemanxin nčha conixin ḥajá nčha. **45** Jaha coetoxinha na de joajna, pero jehe nčha, desde que janha joixinhi nchiandoi coexinhi nčha coetoxin nčha rottena hasta jaxon.

46 Jaha coingaha na aceite ngataha jana; pero jehe nčha cointtjitte nčha aceite ḥajni ngain rottena.

47 Mexinxin janha ndattjo que ixin jehe nčha anto rinao na nčha janha, co mé ḥago que tti anto tsje jianha que jehe nčha joinchehe nčha jai ovitjañehe nčha; pero tti chojni que tsjeha jianha vitjañehe, cai tjago que antoha rinao na janha.

48 Cottimeja ndačho Jesús ngain tti nčhí mé:

—Cain tti jianha que joinchehe ovitjañaha.

49 Co cain chojni que te ngain mesa nttiha conixin Jesús coexinhi na ndache chó na:

—¿Quensen xí jih, que hasta nchao nchetjañehe xa tti jianha que ncchehe chojni?

50 Pero Jesús ndačho ngain tti nčhí:

—Jaha ochonda vida naroaxin ixin vitticaon na janha; mexinxin sattji contenta.

8

Cain nčhí que vacjenguijna Jesús

¹ Después de cain jihi, Jesús vangaria ngain tsje rajna conixin tsje rajnanchjan para joindache chojni de ixin Dios co ixin Dios otsetonha ngain ansén na. Co vacao tti tteyó nirepresentanté jehe.
² Co ntiha vacao canxion nčhí cai que jehe vengixin espíritu jianha de ngaxinhi cuerpoe nčha co vinttjian cain chin que vinttechonda cada nčha. Co de cain nčhí mé, ntiha vehe María Magdalena tti vačhjexin yáto espíritu jianha de ngain cuerpoe.
³ Co cai ntiha vehe Juana, nčhičhihi ná tattíta vinhí Chuza tti vaquetonha ngain nchiandoha Herodes; co cai ntiha vehe Susana co icha nčhí que vacjenguijna nčha Jesús conixin tti jehe nčha vachonda nčha, jehe conixin tti chojni que vacao.

*Ejemploe tti joiquenga trigo ngataon jngui
(Mt. 13.1-9; Mr. 4.1-9)*

⁴ Tsje chojni de ngain tsje rajna cjoí na para joitsjehe na Jesús, co are ožatte tsje chojni ngain Jesús, jehe nichjé na de ixin ejemplo; co ndačho ngain na:

⁵ —Ná xí cjoí xa joiquenga xa trigo ngataon jngui. Are jehe xa coexinhi xa cjoa xa trigo ngataon jngui, canxion noanchjan de trigo vinttji ngá ntiha, co are vatto chojni, ngachje na trigo mé. Co cai conttoa vittja va trigo mé co ndajoina va noanchjan mé. ⁶ Co ittoha noanchjan de trigo vinttji ngataha tti jí ttjao, co are trigo mé čhinki, anto daca ndaxema ixin žonhi tjao vechonda ttjao. ⁷ Co ittoha noanchjan de trigo vinttji ngacjan canchaha co canchaha čhinki ca co icha daca vangui ca; icoančhjandaha ca trigo vangui trigo. ⁸ Pero icha noanchjan de trigo vinttji

noa tti jí jian jinche. Co are vangui trigo mé joanjo jian cosecha, ixin de ná noanchjan de trigo que vetsinga joinchechjian hasta cien noanchjan.

Are Jesús jindačho cain jihi, jehe nichja soji ngain na, co ndačho:

—Si jaha ra ttinxin ra, ttinki ra jian.

Quedonda Jesús joinchegonda tsje ejemplo

(Mt. 13.10-17; Mr. 4.10-12)

⁹ Cottimeja tti chojni que vacao Jesús joanchianguihu na Jesús ixin quehe rročho ejemplo jihi.

¹⁰ Jehe ndačho ngain na:

—Jaha ra, Dios ntanoha ra tti jima de ixin quexén Dios tsetonha ngain ansén chojni; pero are janha nichjá icha chojni, nichjá na de ixin ejemplo para que are sicon na, sitiohe na inchin rroguiconha na, co are tsinhi na, jehe na tsinxinha na.

Jesús ndačho quehe rročho ejemploe tti joiquenga trigo

(Mt. 13.18-23; Mr. 4.13-20)

¹¹ Jihi tti rročho ejemploe tti joiquenga trigo: Tti trigo rročho joajné Dios: ¹² co tti trigo que vinttji ngá nttiha, mé rročho tti chojni que ttinki joajné Dios, pero ttí inchínji co ndanchetjanji na de ngain ansén na tti joajna que coinhi na para que sitticaonha na co rrochondaha na iná vida naroaxin. ¹³ Co tti trigo que vinttji ngataha tti jí ttjao, mé rročho tti chojni que are ttinki na joajné Dios, jehe na anto čhjoin tonohe na dayé na joajna mé, pero ixin palabra mé techondaha na tsje noehe ngain ansén na, ditticaon na jeho nchion, co are Dios daquehe prueba ngain na, jehe

na incheha na tti ttetonha Dios. ¹⁴ Co tti trigo que vintji ngagaha canchaha, mé rročho tti chojni que ttinhi na joajné Dios, pero jehe na ncheha na caso. Jehe na nchehe na sigue inchin te na ngain vidé na, co icha ḥaxaon na ngain problemé na, co ngain cosé na, co ngain cosa čhjoin que jí ntihi ngataha nontte. Cain cosa jihí tančhjandaha na para ditticaon na joajné Dios, co jamé chojni mé idanguisha na de ngain espiritue na. ¹⁵ Pero tti trigo que vintji ngain jinche jian, mé tti chojni jian de ngain ansén, co anto rinao na ttinhi na co nchehe na caso joajné Dios. Co jamé ditticaon na cainxin tiempo, co jehe na anto dangui na de ngain espiritue na ixin ttenschjinha na palabré Dios.

*Ejemplode lámpara
(Mr. 4.21-25)*

¹⁶ 'Xonhi chojni sinchegacaon ná lámpara cottimeja jehe tsjanotaon lámpara o rročangui lámpara ngangui saoen, sino que chojni mé chonda que saquehe lámpara ngataha ná cosa noi para que cain chojni que sixinhi nchia mé nchao sicon na joadingasán. ¹⁷ Xonhi cosa jima que tsononxinha, co xonhi cosa jima que teḥaxaon ni ngain ansén ni que chojni tsonoeha; cain cosa chonda que tsononxin cosa.

¹⁸ 'Mexinxin jaha ra ttinhi ra jian; ixin tti chojni que chonda, Dios tsjenguijna para que rrochonda icha, pero tti chojni que xonhi chonda, Dios santsjehe hasta tti jehe ḥaxaon que ochonda.

*Janné Jesús co xanchó
(Mt. 12.46-50; Mr. 3.31-35)*

19 Cottimeja janné Jesús conixin canxion xanchó Jesús joiji na tti jí Jesús, pero čohoa conchienhe na hasta tti ngaca Jesús ixin anto tsje chojni te nttiha.
20 Cottimeja ná chojni viquetonhe Jesús:

—Janná conixin xanchó nttimé ndoja te na, co rinao na rronichjaha na jaha.

21 Pero Jesús ndačho:
 —Cain tti chojni que ttini quehe ndačho joajné Dios co ncuhehe na inchin ndačho joajna jihi, cain chojni mé inchin jannana co xanchian.

*Jesús tajoaquehe čhıntı́to conixin olé lago
 (Mt. 8.23-27; Mr. 4.35-41)*

22 Ná nchanho Jesús conixin tti chojni que vacao joixinhi na ngaxinhi ná barco, co nttiha jehe ndačho ngain na:

—Sachjin na toenxin lago jihi.
 Co sajcoi na. **23** Co are jehe na tatetaonhe na jinda, Jesús tavejoa ngaxinhi barco. Co are de repente cjoa ná čhıntı́to anto soji, que hasta ocoexinhi viquia jinda ngá barco, co ojoinao sarroxincanjingui barco jinda. **24** Cottimeja vinttecji tti chojni que vacao Jesús para joinchexingamehe na Jesús, co ndačho na ngain:

—¡Maestro! ¡Maestro! ¡Ndatexincanjingui na jinda!
 Cottimeja vingattjen Jesús co jehe coetonhe čhıntı́to co olé lago que tasehe, co cayoi cosa mé jaicoa tavehe; icjoaha čhıntı́to co icjoinha olé lago.
25 Cottimeja jehe ndačho ngain tti chojni que vacao:

—¿Quedonda jaha ra chondaha ra confianza nganji na?

Pero jehe na anto vintteñaon na, co vinttegoan na admirado, co vintteganchianguihi chó na, naná na, co ndačho na:

—¿Quensen xí jihi, que jehe xa ttetonhe xa čhíntto co jinda, co tonhe inchin jehe xa ndačho xa?

Tti xí de ngain nontte Gadara que vechonda espíritu jianha

(Mt. 8.28-34; Mr. 5.1-20)

²⁶ Cottimeja joiji na ngain nontte Gadara que jí toenxin lago mé, čhica Galilea. ²⁷ Are Jesús vanianxin de barco mé conchienhe ngain jehe ná xí de ngain ná rajna de ngain nontte Gadara. Anto sé xí jihi chonda xa tsje espíritu jianha. xonhi lontto vengá xa, ni jeha ngain ná nchia vehe xa, sino que jehe xa vehe xa nganguinihi tti vacjavá chó chojni que ndavaguenhe. ²⁸ Are jehe xí mé vicon xa Jesús, jehe xa vettoxin nttajochjihí xa ngain Jesús co espíritu jianha joinchecoyao xa co joinchenichja xa co ndačho xa:

—¿Quedonda dixintte nganji na, jaha Jesús, Xenhe Dios que ttjen ngajni? Nttatsanha ñao que ncoguetanha na tangui janha.

²⁹ Jehe xí mé ndacho xa jañá ixin Jesús ojitettonhe espíritu jianha que sačhjexin de ngain xí mé. Otsje ntiha espíritu jianha tse xa. Co masqui chojni vaquiaxin na xa conixin cadena de rá xa co de rotté xa para vaguečhoa xa; pero are espíritu jianha vatse xa, jehe xa vacončhintaon xa cadena co espíritu jianha savanchequinga xa para ngá tsaga o ngagaha jna tti xonhi chojni te. ³⁰ Jesús joanchianguihi xí mé:

—¿Quexén dinki jaha?
Co jehe xa ndačho xa:
—Janha dinki na Legión.

Jehe xa ndačho xa jañá ixin anto tsje espíritu jianha vehe ngaxinhi cuerpoe xa. ³¹ Co cain espíritu mé ndache Jesús ixin rinaoha tsji infierno co joinchetsenhe ñao Jesús que jehe rrrorroanha para ngain infierno. ³² Co ixin nttiha chian tene tsje cocochi ngain ná jnanchjan, cain espíritu jianha mé joinchetsenhe ñao Jesús ixin jehe tsančhjanda cain espíritu mé sixinhi ngaxinhi cain cocochi mé. Co Jesús joanjo joachaxin. ³³ Cottimeja cain espíritu jianha mé vačhjexin de ngaxinhi cuerpoe xí jihi co savintteguixinhi ngaxinhi cocochi. Co cain cocochi jihi savinttecanttjenhngui va jinda, co nttiha ndavintteguenxin cainxin va ixin vinttecionhe va jinda.

³⁴ Cain tti chojni que vaquingaria cocochi, are jehe na vicon na cocochi tecjonhe va jinda, jehe na anto x̄aon na co coinga na joindache na chojni ngain rajna co cai nite nchiandoha ngataon jngui. ³⁵ Co cain chojni mé cjoí na joitsjehe na quehe conhe nttiha. Co are joiji na tti jí Jesús, vicon na nttiha tají tti xí que vačhjexin cain espíritu jianha de ngaxinhi cuerpoe; tají xa čhica rotté Jesús, co ojingá xa lonttoe xa, co joarrixaoen xa ondacoa jí; co cain chojni mé vinttečaon na. ³⁶ Co cain chojni que vicon quehe conhe nttiha ndačho na quexén xingamehe tti xí que vechonda espíritu jianha. ³⁷ Mexinxin cainxin chojni de ngain regioen Gadara joinchetsenhe na ñao Jesús ixin jehe satsjixin de nttiha, ixin jehe na anto vinttečaon

na. Mexinxin Jesús coani barco co sacjoi. ³⁸ Tti xí que vačhjexin cain espíritu jianha de ngain cuerpoe joinchetsenhe xa ñao Jesús para que Jesús rroganjo joachaxin sarrojicao xa ngain jehe, pero Jesús coetonhe xí mé que sittohe xa, co ndačho ngain xa:

³⁹ —Cjan para nchiandoi, co ttequinho cain chojni cain tti joinchehe Dios nganji.

Co tti xí mé sacjoi co coequín cain chojni ngoixin rajna tti joinchehe Jesús ngain jehe.

*Are xingamehe xannčichjenhe Jairo, conixin
ná nčhí que catte lonttoe Jesús
(Mt. 9.18-26; Mr. 5.21-43)*

⁴⁰ Are Jesús cjan para toenxin lago mé, cain chojni que te nttiha anto ché na ixin joiji Jesús, ixin cainxin na techonhe na Jesús. ⁴¹ Cottimeja joí ná xí que vinhí Jairo, xí mé vaquetonha xa ngain ni-hngo nttiha. Xí jihí vettoxin nttajochjihi xa ngain Jesús co joinchetsenhe xa ñao ixin jehe rrocji nchi-andoha xa ⁴² ixin jehe xí mé vechonda xa nacoax-inxon xannčichjenhe xa que vechonda xan tteyó nano. Co are mé ondajindenhe xannčichjenhe xa. Are Jesús sacjoi nchiandoha Jairo conixin jehe Jairo, rroé anto tsje chojni que hasta anto conttedo na ngaca Jesús.

⁴³ Co de ngacjén cain chojni mé nttiha conchienhe ná nčhí que venihí nčha tteyó nano. Jehe nčha veguenguihi nčha jni, co jehe nčhí mé ojoehe nčha joinchexinhi nčha de ngain xinchexoan cainxin tti vechonda nčha, pero ni ná xinchexoan čoha joinchexingameha xa nčha.

⁴⁴ Jehe nčhí mé conchienhe nčha ngaca Jesús

notonxin co catte nčha rioho ngandehe lonttoe Jesús que jitsá. Co rato mé tavehe tti jni que venguihi nčha.

45 Cottimeja Jesús joanchiangui co ndačho:

—¿Quensen catte na?

Pero ixin cain chojni ndačho na ḵonhi quensen, mexinxin Pedro conixin cain xicompañeroe ndačho xa:

—Maestro, cain chojni tonttedo na ngaca soixin, co tonxinca na de ná lado co iná lado, mexinxin ¿quedonda soixin ḥa danchiangui quensen catte?

46 Pero Jesús ndačho:

—Jí ná chojni que catte na, ixin janha conona que jointtaxingamá ná chojni conixin joachaxin que janha chonda.

47 Nčhí mé are conohe nčha ixin conohe Jesús, jehe nčha conchienhe nčha ji᷑anga nčha de joa᷑aon, co vettoxin nttajochjihí nčha ngaca rotté Jesús. Co ngattoxon con cain chojni nttiha ndačho nčha ngain Jesús ixin quedonda jehe nčha catte nčha co que᷑én ngain rato mé ndaco᷑oenhe nčha.

48 Cottimeja Jesús ndačho ngain nčha:

—Jaha co᷑oanha ixin vitticaon na. Jai sattji contenta.

49 ḥa jinichja Jesús yá, are ojoí ná chojni de ngain nchiandoha Jairo, tti vaquetonha ngain nihngo nttiha; co ndačho chojni mé ngain Jairo:

—Xannčhichjanha ondavene xan; inchemolestaha ximaestro.

50 Pero are Jesús coinhi yá, jehe ndačho ngain Jairo:

—Jaha ḥaonha; jeho ditticaon na janha, co xanha rroxingamehe xan.

51 Are joiji na nchiandoha Jairo, Jesús coančhjandaha vixinhi ni ná chojni, jeho jehe, Pedro, Jacobo, Juan, co jehe ndodé xannčhichjan conixin janné xan. **52** Cain chojni que te nttiha tetsjanga na co tetaxin na xan joachjaon. Pero Jesús ndačho ngain na:

—Tsjangaha ra; xannčhichjan ndadiguenha xan; sino que tajioa xan.

53 Pero jehe na cjoanoa na Jesús ixin ndačho jañá, ixin cain na venohe na que xannčhichjan ondavenhe xan. **54** Cottimeja Jesús tsehe rachjenhe xannčhichjan co ndačho sén ngain xan:

—Jaha xannčhichjan, dingattjen.

55 Co jehe xannčhichjan xechon xan iná, co ngain rato mé jehe xan vingattjen xan. Co Jesús coetonha rrochjé na xan sine xan. **56** Nindoha xannčhichjan anto vinttegoan na admirado, pero Jesús coetonhe na ixin xonhi chojni rrondache na tti joinchehe jehe.

9

*Are Jesús rroanha tti tteyó chojni que vacao
(Mt. 10.5-15; Mr. 6.7-13)*

1 Jesús nichjé tti tteyó chojni que vacao, co jehe joanjo joachaxin ngain na para que jehe na nchao senguixin na cain clase de espíritu jianha de ngaxinhi cuerpoe chojni, co para sinchexingamehe na chojni nihi de ixin chin que chonda. **2** Jehe rroanha na para joindache na chojni ixin Dios osiquetonha ngain ansén na, co para joinchexingamehe na chojni nihi. **3** Jehe ndačho ngain na:

—Xonhi ttjiho ra de tti sondaha ra ngatja nttiha, ni ntacotto, ni bolsa ni niottja, ni tomi. Ttjiho ra jeho nacoa camisa que tengaha ra co ttjioha ra yó camisa. ⁴ Cada rajna que saso ra dittoha ra jeho nacoa nchia hasta que satsjixin ra de ngain rajna mé. ⁵ Si chonja rajna sinaoha na tsinhi na tti jian joajna que jaha ra tsjiho ra jaha ra sattjixin ra de nttiha, co tontsjenga ra jinche que yá rottea ra, mé ná señal que vitticaonha na jaha ra.

⁶ Jamé sacjoi cain chojni mé, cjoí na ná co ná rajna, joindache na chojni tti jian joajna co joinchexingamehe na chojni nihi.

*Are ndavenhe Juan, tti vancheguitte chojni
(Mt. 14.1-12; Mr. 6.14-29)*

⁷ Are xigobernador Herodes conohe xa cain tti jian que vanchehe Jesús, jehe xa anto xáon xa, ni inoeha xa quehe xáxaon xa ixin canxion chojni ndačho na que mé Juan, tti vancheguitte chojni, co jai xechon. ⁸ Icanxin na vandačho na ixin Jesús, jehe tti profeta Elías que cononxin iná, co icanxin na vandačho na que ixin Jesús ná de tti profeta que joí are icha saho co jai xechon. ⁹ Pero Herodes ndačho:

—Janha mismo coetonha činji já Juan, tti vancheguitte chojni. Mexinxin ¿quensen xí jihi que chojni ttequin na anto tsje cosa jian que jehe xa rridinchehe xa?

Co Herodes anto cjoé quexén para que jehe rrroguicon Jesús.

*Are Jesús joanjo joine naho mil xí
(Mt. 14.13-21; Mr. 6.30-44; Jn. 6.1-14)*

10 Are tti tteyó chojni que rroanha Jesús cjanxin na de tti joindačho na tti jian joajna, jehe na ndačho na ngain Jesús tti jehe na joinchehe na. Cottimeja Jesús sajoicao na ngain ná lugar tti ḵonhi chojni te, chian ngain rajna Betsaida.

11 Pero are conohe icha chojni ixin ttinó sacjoi Jesús, jehe na rroé na co jehe nichjé cain na, co ndačho ngain na ixin quežén siquetonha Dios ngain ansén na, co joinchexingamehe cain ninihi.

12 Co are ondacotsocjin, conchienhe tti tteyó chojni que vacao Jesús, co ndačho na ngain:

—Ndache cain chojni que satsji na, para sasinchejogaha na co siquehna na tti sine na ngain rajna o nchia que te chian, ixin nttihi tti te na ḵonhi jí.

13 Pero Jesús ndačho ngain na:

—Jaha ra danjo ra tti sine na.

Jehe na vinttendačho na:

—Janha na ḵonhi chonda na, jeho naho niottja co yó copescado, o ¿apoco janha na siquehna na tti sine cainxin chojni jíhi?

14 Ixin cain chojni mé, jeho xí inchin naho mil xa. Pero Jesús ndačho ngain tti chojni que vacao:

—Ndache ra na tasintte na de cincuenta na cada grupochjan.

15 Co jamé joinchehe na; tavintte na cainxin na.

16 Cottimeja Jesús coá tti naho niottja mé co tti yó copescado. Co jehe tsjehe para ngajni, joanjo gracias ngain Dios de ixin niottja mé conixin copescado, co después de váña niottja, jehe joanjo nio ngain tti chojni que vacao, para que jehe na conchjeyehe na cainxin chojni mé jehe niottja conixin copescado. **17** Cainxin chojni mé joine

na co cojehe na jian, co después ḥa joinchecaon na tteyó nttaḥa de ixin tti niottja rioho que xexin joine na.

*Pedro ndačho que ixin Jesúś, mé tti Cristo
(Mt. 16.13-19; Mr. 8.27-29)*

¹⁸ Ná nchanho are Jesúś jinchecoanxini Dios, co jeho tti chojni que vacao nttiha tate na ngain, jehe joanchiangui ngain na co ndačho:

—¿Quehe ndačho chojni ixin quensen na janha?

¹⁹ Jehe na vinttendačho na:

—Caxion na ndačho na que ixin soixin Juan, tti vancheguite chojni; icanxin na ndačho na que ixin soixin tti profeta Elías; co icanxin na ndačho na que ixin soixin ná de tti profeta que vacji are saho.

²⁰ Cottimeja Jesúś joanchiangui ngain jehe na, co ndačho:

—Co jaha ra ¿quehe ndačho ra ixin quensen na janha?

Co Pedro ndačho ngain Jesúś:

—Soixin tti Cristo que joixin de ngain Dios.

*Are Jesúś ndačho ixin jehe ndasenhe
(Mt. 16.20-28; Mr. 8.30—9.1)*

²¹ Pero Jesúś anto coetonhe na ixin ḥonhi chojni rrondache na. ²² Cottimeja Jesúś ndačho ngain tti chojni que vacao:

—Janha, tti Xí que joixin de ngajni, chonda que anto tsje cosa tangui tsonna, co cain xittetonha ngain nihngo, co cain xidána que ttetonha ngain icha xidána, conixin cain ximaestroe ley Israel, sinaoha na xa. Co nasoenxon na xa, pero ngain nchanho ninxin janha rroxechon na.

23 Después jehe ndačho ngain cain chojni que te nttiha:

—Si čhonja chojni rinao sitticaon na janha, pero chonda que rrotjañehe tti jehe icha rinao para sitticaon na janha cainxin nchanho, masqui tangui tsonhe co hasta puede nasenxon de ixin causananxin janha. **24** Ixin tti chojni que rinao ḥonhi tsonhe vidé, mé ndasinchetján vidé; pero tti chojni que sinchetján vidé de ixin causananxin janha, chojni mé rrochonda iná vida naroaxin. **25** Ixin ḥonhi ḥé que ná chojni sacha cainxin cosa que jí ngain mundo jihí co ndasitján jehe mismo. **26** Ixin tti chojni que tosoé de ixin janha co de ixin palabrama, cai janha, tti Xí que joixin de ngajni, tsosahna de ixin jehe chojni mé are janha sihi inchin ná Rey conixin cain gloria que chonda Ndodana co que chonda cain ángel que te ngain Ndo. **27** Atto seguro tti rrindattjo ra, que čhonja de jaha ra ḥo te ra nttihi jai, ḥa senha ra hasta que siconja ra que Dios siquetonha ngain ansén chojni.

*Are vicon na Jesús anto ojé
(Mt. 17.1-8; Mr. 9.2-8)*

28 Inchin jni nchanho después de Jesús ndačho cain jihí, jehe coani ná jna para joinchecoanxinihi Dios co joicao Pedro, Jacobo co Juan. **29** Co are Jesús jinchecoanxinihi Dios, ngá con Jesús ndavitoxinhi co lonttoe ndacjan lontto anto roa co hasta jidaquima lontto. **30** Cottimeja cononxin yó xí que tatetjao xa Jesús, co cayoi xí mé, ná Moisés co iná Elías. **31** Co ngoixin ngandanji na vehe ná joadingasán anto čhjoin. Co cjoao na ixin

quexén ndasenhe Jesús ngain Jerusalén, co ixin anto tangui ndasenhe. ³² Masqui Pedro co tti cayoi xicompañeroe anto chjé na cottačhin, pero jehe na tavinttetsjehe na co vicon na gloria que chonda Jesús, co vicon na tti yó xí canxin que joí ngain Jesús. ³³ Are cayoi xí mé saconçjin xa de ngain Jesús, cottimeja Pedro ndačho ngain Jesús:

—Maestro, atto nchao ixin te na janha na nttihi, janha na sinttachjian na ní nchiachjan; ná para ixin soixin, ná para ixin Moisés, co iná nchiachjan para ixin Elías.

Pero Pedro noeħa quehe ndačho ngain rato mé. ³⁴ Co Pedro xá jinichja jañá are joí ná ttjoi ngain na co jehe na ndavittohe na ngacjan ttjoi mé. Pedro co cayoi xicompañeroe vintteχaon ixin ndavittohe na ngacjan ttjoi mé. ³⁵ Cottimeja de ngacjan ttjoi mé coinxin na tté Dios que ndačho:

—Yá tti Xanhna que anto rinaho. Ditticaon ra tti rrondattjo ra Xan.

³⁶ Después que nichja Dios jañá, vicon na que Jesús jeho tají nttiha. Jehe na vinttetenco na, co xonhi chojni coequín na tti jehe na vicon na.

Jesús joinchexingamehe ná xanxichjan que ve-chonda espíritu jianha

(Mt. 17.14-21; Mr. 9.14-29)

³⁷ Ndoexin are vanianxin na de ngain jna mé, anto tsje chojni joichoēnxin na Jesús ngatja nttiha.

³⁸ De ngayé cain chojni mé, ná xí nichja xa sén co ndačho xa ngain Jesús:

—Maestro, nttatsanha ñao, tsjehe xanxichjanha ixin jeho xan jihi chonda. ³⁹ Ná espíritu jianha tse xan co nchecoyao xan, co tadetsinga

xan ḫá ndadenhe xan co hasta ttočho ttixin rroha xan. Anto ncheguetan xan tangui co ḫonhi rato tačhjanda xan para tadehe xan čhjoin. ⁴⁰ Janha ojointtatsán ñao chojnia que čhjihó ixin rrogantsje na espíritu jianha yá, pero coixinha na.

⁴¹ Jesús ndačho:

—Jaha ra ḫo chojni que ditticaonha ra co jianha ra! ¿Hasta tti quesa chonda que sarihi nganji ra co tsixinna nganji ra? Sicohma xanha nttihi.

⁴² Pero are jehe xanxichjan mé jitonchienhe xan ngain Jesús, espíritu jianha mé joincheguenda xan, co joanca xan ngataha nontte. Pero Jesús joinchesattehe espíritu jianha mé, co jehe joinchexingamehe xanxichjan co joanjo xan ngain ndodé xan. ⁴³ Co cainxin chojni que te nttiha anto vinttegoan na admirado de ixin tti anto tsje joachaxin que chonda Dios.

Jesús ndačho iná ixin jehe ndasenhe

(Mt. 17.22-23; Mr. 9.30-32)

Are cain chojni mé ḫa te᷇axaon na de ixin tti jian que joinchehe Jesús, jehe ndačho ngain tti chojni que vacao:

⁴⁴ —Ttinihi ra jian tti janha rrondattjo ra, co tjañaha ra que janha, tti Xí que joixin de ngajni, sinchechienhe na na ngain xí jianha.

⁴⁵ Pero tti chojni que vacao vaquininha na tti jehe vandačho ngain na, ixin ḫa ḫonhi joachaxin vinttechonda na para coinxin na. Co jehe na ḫaoncoa na para joanchianguihi na Jesús ixin quehe rročho tti jehe ndačho.

¿Quensen tti icha importante?

(Mt. 18.1-5; Mr. 9.33-37)

⁴⁶ Cottimeja tti chojni que vacao Jesús, coexinhi na cjoao chó na ixin quensen de jehe na tti icha importante, ⁴⁷ pero Jesús conohe quehe tendache chó na. Cottimeja jehe cjóá ná xanxichjan co joaquehe xan ngaca jehe, ⁴⁸ co ndačho ngain jehe na:

—Tti chojni que sayé ná chjan inchin xanxichjan jihi conixin nombrena ixin ditticaon na janha; chojni mé sayehna janha cai. Co tti chojni que sayehna janha, cai sayé tti rroanha na janha. ¿Ari-nao ra tsonoha ra quensen icha importante? Tti rrocjan icha importanteha ngayaha ra, mé tti sehe icha importante ngattoxon con na janha.

Tti chojni que ningacoanha na, chojni mé jí nganji na

(Mr. 9.38-40)

⁴⁹ Cottimeja Juan ndačho ngain Jesús:

—Maestro, janha na vicon na ná tti jidengui espíritu jianha conixin joachaxín nombrea; co janha na ndattjan na que isincheha jamé, ixin jehe čhjihā nganji na.

⁵⁰ Pero Jesús ndačho:

—Cayacoenha ra chojni mé, ixin tti chojni que ningacoanha na, jehe jí nganji na.

Jesús joinchesattehe Jacobo co Juan

⁵¹ Are ojoiconchiaon tiempo que Jesús sacoajín para ngajni, jehe x̄aonha para sacjoi ngain Jerusalén. ⁵² Jehe rroanha canxion chojni que joicão joajné icha saho, co chojni mé cjoí na ngain ná rajna ngain regioen Samaria para joicjé na ná nchia tti sintte jehe na conixin Jesús. ⁵³ Pero chojni samaritano mé čhoha na joanjo na joachaxin

nttiha ixin chonxin na que chojní Jesús conixin jehe satettji na para Jerusalén. ⁵⁴ Are Jacobo co Juan conohe que ixin nisamaritano čoha na danjo na joachaxin, jehe ndačho ngain Jesús:

—¿Arinao soixin que tsetonha na janha na que rroxincanji šohi de ngajni, para soen cain chojni yá inchin joinchehe profeta Elías?

⁵⁵ Cottimeja Jesús ngaria tsjehe na, co joinchesattehe na, ndačho:

—Jaha ra noaha ra quehe clase de espíritu chonda ra. ⁵⁶ Ixin janha, tti Xí que joixin de ngajni, joiba para nasoenxon chojni, sino que para rrochjaha na vida naroaxin.

Cottimeja sacjoi na para ngain iná rajna.

*Tti chojni que joinao rrogacao Jesús
(Mt. 8.19-22)*

⁵⁷ Are tettji na ngatja nttiha, ná xí ndačho xa ngain Jesús:

—Janha rinaho sacjin na cain lugar tti soixin sacji.

⁵⁸ Jesús ndačho ngain tti xí mé:

—Cain condaniña chonda va cuevé va, co cain conttoa chonda va caqué va, pero janha, tti Xí que joixin de ngajni, chondaha ni ttinó saričhin.

⁵⁹ Jesús ndačho ngain iná tti xí:

—Jaha chjin na.

Pero tti xí mé ndačho:

—Nttatsanha ñao, chonna na saho ndasenja ndodana para que janha tsjavá ndo.

⁶⁰ Jesús ndačho:

—Tančhjanda tti chojni que chondaha vida naroaxin tsjavá chó na; pero jaha ttji co dindache chojni ixin Dios osiquetonha ngain ansén na.

⁶¹ Cottimeja iná tti xí ndačho ngain Jesús:

—Janha rinaho satsjin na, pero saho chonna na tsji sinttanoa ninchiania.

⁶² Pero Jesús ndačho:

—Tti jitse ningue, cottimeja tsjehe para noton, chojni mé xonhi xé para ngain tti ttetonha Dios.

10

Are Jesús rroanha tti setenta chojni

¹ Después de cain jihi, Jesús coinchiehe isetenta chojni, co jehe saho rroanha de yó na co yó na ngain cain rajna co icha lugar chian nttiha tti jehe chonda que cjoí después. ² Co ndačho ngain na:

—Atto seguro tti rrondattjo ra, que coseché Dios atto tsje, pero ninchehe xá tsjeha na. Mexinxin nchetsenhe ra ñao Xinajni para que jehe rrrorroanha icha ninchehe xá para tsjejo na cain cosecha jihi. ³ Ttji ra jai jaha ra co xaxaon ra que janha rroanha ra inchin coleco ngayé condanixa.

⁴ Ttjioha ra bolsa, ni tomi, ni icha catte que jeho tti ca jaha ra techjanga ra. Co tadinttengattjenha ra para chjehe ra chojni joajna ngatja nttiha, ixin jamé sinchetjangui ra tiempo. ⁵ Are saso ra ngain ná nchia, saho danjo ra joajna co ndačho ra: “Que chojni de ngain nchia jihi tsonohe čhjoin ngain ansén.” ⁶ Co si ngain nchia mé te chojni jian, ján, chojni mé tequininxin tti joajna que jaha ra sanjo ra; pero si nahi, joajná ra mé sarrocjan nganji ra. ⁷ Are saso ra ngain ná rajna, dittoha ra

jeho ngain nacoa nchia co jintte ra co dihi ra tti rrochjá ra na de ngain nchia mé. Ixin tti ncuhehe ḵa jiquininxin rroxenguehe hna. Chondaha ra que sittoha ra ojejé nchia. ⁸ Are saso ra ngain ná rajna tti chojni jáñ sayaha ra, jintte ra cain tti rrochjá ra na. ⁹ Nchexingamehe ra chojni nihí que te ngain rajna mé, co ndache ra na: “Ochian joí tiempo para Dios siquetonha ngain ansean ra.” ¹⁰ Pero si saso ra ngain ná rajna tti rrochoha chojni sayaha ra na, jaha ra dačhje ra para ngá nttiha co ndačho ra: ¹¹“Hasta tti jinche de ngain rajná ra jihi que tse rottena na, tsontsjenga na para ná señal que jaha ra vitticaonha ra joajna que joiquianha ra. Pero ḵaxaon ra que tti ttetonha Dios ochian joí nganji ra.” ¹² Janha rrindattjo ra seguro, que para ngain nchanho que Dios sinchejuzguehe cainxin chojni, are mé chojni de ngain rajna que vitticaonha na joajné Dios icha soji castigo sayé na que tti castigo que vayé chojni de ngain ciudad de Sodoma.

*Rajna que vintteguitticaonha
(Mt. 11.20-24)*

¹³ ’¡Anto tangui tsonha jaha ra chojni de ngain rajna Corazín! ¡Co anto tangui tsonha jaha ra, chojni de ngain rajna Betsaida! Ixin si cain milagro que jointtaha ngayaha ra rroconhe ngayé chojni de ngain ciudad de Tiro co Sidón, seguro que chojni mé osé rroquentoxinhi na vidé na de tti jianha que vanchehe na. Co para rrocjago na ixin jehe na orroquentoxinhi na vidé na, rrogunttengá na lontto ttie co rroguinga na nttesoguihi. ¹⁴ Pero ngain tti nchanho que Dios sinchejuzguehe cainxin chojni, are mé jaha ra sayehe ra castigo

icha soji que chojni de ngain Tiro co Sidón. ¹⁵ Co jaha ra de ngain rajna Capernaum, ¿Aäxaon ra que jaha ra tsji ra para ngajni? Nahi, jeha jamé, ixin jaha ra tsjixin já ra ngain infierno.

¹⁶ Jesús ḥa ndačho ngain chojni:

—Tti chojni que sitticaon tti rrondačho jaha ra, cai sitticaon na na janha. Co tti chojni que sitticaonha tti rrondačho ra, cai chojni mé sitticaonha na na janha. Co tti chojni que sitticaonha na janha, cai sitticaonha na tti rroanha na janha.

Are cjan tti setenta chojni

¹⁷ Cottimeja sacjoi tti setenta chojni co después cjan na anto contento, co ndačho na:

—Hasta cain espíritu jianha vitticaon joinchehe tti ndačjan na are nichja na conixin joachaxín nombrea soixin.

¹⁸ Jesús ndačho ngain na:

—Ján, ixin janha vicon quexén vetsingaxin Satanás de ngajni inchin ná rayo. ¹⁹ Janha chjaha ra joachaxin para tsingachje ra conché conixin conttanchia, co para tsixinha ra ngain tti jianha, co ḥonhi tsonha ra. ²⁰ Pero tonoaha ra čhjoin ixin espíritu jianha ditticaon co nchehe tti ndačho ra, sino que ixin nombrea ra ojtaxin ngajni.

Ndodaha conixin Xenhe Ndo (Mt. 11.25-27; 13.16-17)

²¹ Ngain rato mé, Jesús anto ché de ixin Espíritu Santo, co jehe ndačho:

—Janha rrintacoanxinha soixin, que joinchechjian nontte co joinchechjian ngajni, ixin tti chojni que chonda confianza nganji soixin inchin nchinnchinchjan chonda confianza

ngain ndodé, soixin cjoagohe chojni mé tti soixin coemehe tti chojni que anto nohe co tti chojni que anto ttinxin. Ján, Padre, jañá joinchehe soixin ixin jañá rinao.

²² 'Ndodana Ndo chjana joachaxin para tte-tonha cainxin cosa. ḵonhi chojni nohe quensen tti Xenhe jehe Ndo, sino que jehe Ndo mismo nohe Ndo quensen mé. Co ḵonhi chojni nohe quensen jehe Ndo, sino que jehe Xenhe Ndo, tti Xan nohe, conixin cain tti chojni que jehe Xan sinao Xan sinchegatsoan Xan jehe Ndo.

²³ Cottimeja Jesús tsjehe ngain chojni que vacao co ndačho ngain jeho na:

—Anto čhjoin para ixin tti chojni que tedicon tti jaha ra tedicon ra jai, ²⁴ ixin tsje profeta co tsje rey joinao na rroguicon na jihi, tti jaha ra tedicon ra, pero jehe na viconha na. Co jehe na joinao na rroquinhi na ttijaha ra ttettinki ra jai, pero coinha na.

Ejemplode ná chojni jian de ngain Samaria

²⁵ Cottimeja ná ximaestroe ley Israel cjoi xa joitsjehe xa Jesús jeho para joincheyehe xa Jesús, co joanchiangui xa ngain co ndačho xa:

—Maestro, ¿quehe sinttaha janha para rro-chonda iná vida naroaxin?

²⁶ Jesús ndačho ngain xa:

—¿Quehe jitaxin ngain ley que vayé Moisés? ¿Quexén čho ley mé?

²⁷ Jehe ximaestroe ley mé ndačho xa:

—Ngain ley mé jindačho: “Rinao Dios conixin ngoi ansean, conixin ngain almá, conixin ngoi fuerzá, conixin ngoi joarrixaoan; co rinao cainxin nivecinoa inchin rinao cuerpoa jaha.”

28 Cottimeja Jesús ndačho ngain xa:

—Nchao jí tti jaha ndačho. Sijaha sinchehe cain yá, jáñ rrochonda iná vida naroaxin.

29 Pero ximaestroe ley mé joinao xa rroguittohe xa jian ngattoxon con Jesús de ixin tti ndačho xa, mexinxin joanchiangui xa ngain Jesús co ndačho xa:

—Pero, ¿quensen vecinona?

30 Cottimeja ndačho Jesús ngain xa:

—Ná xí joixin xa de Jerusalén para sajittji xa ngain rajna Jericó, co ngatja nttiha cayacoen xa canxion xichehe, co cain xichehe mé coehe xa jehe tti xí mé caínxin tomí co hasta lonttoe que jingá, co anto goen xa jehe tti xí mé, hasta merocoa narrogoenxon xa. Cottimeja savinttecji xa. **31** Co nchion después nttiha vatto ná xidána judío, pero are jehe xa vicon xa que nttiha tajitsinga tti xí mé, jehe xidána mé vatto ojé lado. **32** Cai nonttiha vatto ná chojni razé Leví, pero are jehe vicon tti xí que tajitsinga nttiha, cai vatto ojé lado. **33** Pero nchion después nttiha vatto ná xí samaritano, co are jehe xa vicon xa tti xí judío que tajitsinga ngandehe nttiha mé, jehe xa coiaconoehe xa. **34** Cottimeja jehe xa conchienhe xa ngaca tti xí mé, co joincheñoenhe xa cain tti diconihi ngain cuerpo conixin aceite co vino, co coensia xa jian. Cottimeja jehe xa joinchetaha xa colochohé xa co sajoicao xa ngain ná nchia, co nttiha jehe xa venda xa. **35** Co ndoexin are jehe xí mé sacjoi xa, joantsje xa yó tomi que anto rentte co joanjo xa ngain tti nchiandoha mé, co ndačho xa ngain: “Darinda xí jíhi, co si jaha sinchexinhi icha tomi ixin jehe xa, janha tsjengaha hna are rrocjan na.” **36** Mexinxin

ndachjenji na ¿quexehe de tti ní xí mé tti joinchehe inchin ná nivecinoe tti xí que nihi?

³⁷ Ximaestroe ley ndačho xa:

—Tti xí que coiaconoehe jehe tti nihi mé.

Cottimeja Jesús ndačho ngain xa:

—Janché, jaha cai ttji co ncuhehe jamé.

Are Jesús ngain nchiandoha Marta co María

³⁸ Jesús joinchehe sigue sacjoi, co joiji ngain ná rajna nchín, co ntiha ná nchí que vinhi Marta joanjo nčha nchiandoha nčha tti vittohe Jesús.

³⁹ Jehe Marta vechonda ná xanchó que vinhi María, co are mé, jehe María tavehe čhica rotté Jesús para que coinihi quehe ndačho Jesús. ⁴⁰ Pero Marta anto jidoan purado de jinchechjian comida, ixin jeho jinchehe ḫa, mexinxin conchienhe co ndačho ngain Jesús:

—¿A᷇axaonha que ixin xanchian ttinttona xan janho rrinttaha cain ḫa jihi? Ndache xan que tsjenguijna na xan.

⁴¹ Pero Jesús ndačho ngain Marta:

—Marta, Marta, jaha anto ḫaxaon de ixin cain cosa yá, ⁴² pero jí jeho nacoa cosa que anto importante. Co María ocoinchiehe tti cosa icha importante mé, co ḫonhi chojni santsjehe cosa mé.

11

Are Jesús cjoago quexén sinchecoanxinho ni Dios (Mt. 6.9-15; 7.7-11)

¹ Ná nchanho Jesús jinchecoanxinho Dios ngain ná lugar, co are joexin joinchecoanxinho Dios, ná de tti chojni que vacao ndačho ngain:

—Nchecoanna ni ra sinttacoanxian na Dios, jañá inchin Juan, tti vancheguitte chojni, joinchecoenhe chojni que vacao.

² Jesús ndačho:

—Are sinchecoanxini ra Dios, ndačho ra:
Padre soixin que ttjen ngajni,
nombrea soixin jiquininxin tsosayehe.
Siquetonha nttihi soixin.

Co tsonhe inchin soixin rinao nttihi ngataha
nontte, jañá inchin tonhe nttiha ngajni.

³ Chjana ra jai tti sine na que rrrogondana na.

⁴ Nchetjañana ni ra tti jianha que jointtaha na,
ixin janha na cai nttatjañá na tti chojni que
nchehe jianha nganji na.

Nchegattoha ni ra tangui: tančhjandaha ni ra
ngain tti jianha.

⁵ Cai ndačho Jesús ngain na:

—Tsín na ná ejemplo, que ná de jaha ra chonda
ra ná xiamigoa ra, co ngosine ttie siji xa nchian-
doi ra co rrondattjo ra xa: “Amigo, nchecjen na
ní niottja, ⁶ ixin ná xiamigona nandá joixin xa
viaje, co joiji xa nchiania co janha xonhi chonda
que rrochjaha xa.” ⁷ Co si jaha ra rrondačho
ra desde ngaxinhi nchiandoi ra: “Nchemolestaha
na; ocoejá puerta co otarričhinquinha xanhna
ngataha cama; choha singattjen para rrochjaha tti
jaha rinao.” ⁸ Pero si xiamigoa ra mé sinchehe
xa sigue rronichjaha ra xa jaha ra singattjen ra
co rrochjehe ra xa tti jehe xa rinao xa pero ijeha
ixin amigo ra, sino que jaha ra sanjo ra mé para
que isincheha xa sigue sinttamolestá ra xa icha.
⁹ Mexinxin janha rrindattjo ra: Danchia ra co Dios
rrochjá ra; ttjé ra co sinchí ra; dinga ra puerta,

co puerta mé rroxiré puerta. ¹⁰ Ixin tti danchia, jehe dayé; co tti ttjé, jehe dittja; co tti dinga puerta, puerta xiré puerta para ixin jehe.

¹¹ ¿Apoco čhonja de jaha ra que ochonda ra xanha ra anchao rrochjehe ra xan ná xo are sanchiaha ra xan niottja? ¿O arrochjehe ra xan nttaohe conché are jehe xan sanchia ra xan nttaohe copescado? ¹² ¿O arrochjehe ra xan ná conttanchia are sanchiaha ra xan joja? ¹³ Mexinxin si jaha ra masqui chojni jianha ra pero noha ra danjo ra cosa jian ngain xanha ra, ¡mé Ndodá na que ttjen ngajni xijanjoha Ndo Espíritu Santo ngain tti chojni que sanchia ngain Ndo!

Are ndačho chojni ixin Jesús chonda joachaxín inchíni

(Mt. 12.22-30; Mr. 3.19-27)

¹⁴ Ná nchanho Jesús vengui ná espíritu jianha de ngaxinhi cuerpoe ná xí que ndadicottapo xa de ixin jehe espíritu mé; co are espíritu jianha ovačhjexin de ngaxinhi cuerpoe xa, jehe xa onchao nichja xa. Tsje chojni que te nttiha vinttegoan na admirado de ixin tti joinchehe Jesús.

¹⁵ Pero icánxin na ndačho na:

—Xí jihi dengui xa espíritu jianha de ixin joachaxín Satanás, tti cai dinki Beelzebú, tti tte-tonha ngain cain espíritu jianha.

¹⁶ Co icánxin na para rrojincheyehe na Jesús, joanchiehe na que ixin jehe rrojinchehe ná milagro que ttixin de ngajni. ¹⁷ Pero jehe ovenohe quehe teňaxaon na, co jehe ndačho ngain na:

—Quexeho gobierno que chjéa para ttetocaho chó, gobierno mé toin ndattjexin, co si ná nindoha

ngain ná nchia, si atto tteto na, cai toin ndachjé-qué na. ¹⁸ Jañá cai, si Satanás tseto jeho, ¿queëén tsonchjenhe joachaxin que jehe chonda? Jihi ndachjan janha, ixin jaha ra ndačho ra que janha dehngui espíritu jianha de ixin joachaxín Satanás. ¹⁹ Pero si janha jamé na, ¿quensen chjé chojnia ra joachaxin para dengui na espíritu jianha? Mexinxin jeho na tjago na que ndoaha tti težaxaon ra. ²⁰ Pero janha dehngui espíritu jianha de ixin joachaxín Dios, co jihi rročho que tti ttetonha Dios ochian joí nganji ra.

²¹ 'Are ná xí tsanga jinda xa nchiandoha xa conixin tsje espada co lanza, are mé cain cosé xa que jichonda xa jí seguro. ²² Pero si tsí iná xí icha tsanga que jehe xa co tsixinha xa ngain xí mé, ndasantsjehe xa cain espadé xa co lanzé xa que chonda xa, cottimeja nchao sasicao xa cosé xí mé que jichjian.

²³ 'Tti chojni que rinaoha na janha, chojni mé ningaconna janha; co tti chojni que ttenchjianha tti janha rrindačjan, chojni mé ttingo na palabrana inchin chojni que ttingo caxineno.

*Tti espíritu jianha que cjan
(Mt. 12.43-45)*

²⁴ 'Are ná espíritu jianha dačhjexin de ngain cuerpoé ná chojni, espíritu jihi sattji ngain lugar xema dicjé ná lugar tti jehe sinchejogaha. Co are idiraha lugar mé, jehe ūxaon: "Janha sarrocjan na ngain nchiania tti vačhjexin." ²⁵ Are espíritu mé cjan, jehe dittja cuerpoé chojni mé inchin ná nchia que diganjo na čhjoin, co čhjoin diconchjian ngaxinhi nchia mé. ²⁶ Cottimeja espíritu jianha mé

dirroé iyáto espíritu icha jianha que jehe espíritu mé, co cain espíritu mé sadixinhi ngaxinhi cuerpoé chojni mé para tadintte cai. Co después, chojni mé icha tangui tonhe que are saho.

Quensen tonohe čhjoin ngain vidé

²⁷ Are Jesús jindačho cain cosa jihi, ná nčhi nttiha ngayé chojni ndačho nčha sén:

—¡Anto čhjoin para ixin tti nčhi que jointtaconiha co jointtagangu!

²⁸ Pero Jesús ndačho:

—¡Icha čhjoin para ixin tti chojni que ttinhi tti ndačho Dios co ditticaon na!

Are chojni jianha joanchia na ná milagro

(Mt. 12.38-42; Mr. 8.12)

²⁹ Chojni joinchehe na sigue xatte na ngandanji Jesús, co jehe coexinhi nichja co ndačho:

—Cain chojni ngain tiempo jihi, jehe na jianha na co danchia na sicon na ná señal de milagro; pero xonhi icha señal sicon na que jeho tti señal que vattohe profeta Jonás. ³⁰ Ixin jañá inchin Jonás cjoí ná señal para ixin chojni que vintte ngain ciudad de Nínive, jamé janha cai, tti Xí que joixin de ngajni, janha ná señal para ixin chojni de ngain tiempo que te na jai. ³¹ Are chojni de tiempo jihi soenhe na juzgado, tti reina que joixin de ngain nontte Sabá icha sur singattjen co jehe reina mé rročho jie para ixin chojni jihi ixin jehe reina mé joixin anto cjin para joiquinhi tti venohe Salomón, co nttihi jí nganji ra ná tti icha importante que Salomón pero xonhi chojni nchehe caso. ³² Co chojni que vintte ngain ciudad de Nínive singattjen na ngain tti nchanho que Dios

sinchejuzguehe cain chojni, para rročho na jie para ixin chojni de tiempo jíhi ixin cain chojni de ngain Nínive coentoxinhi na vidé na are Jonás joindache na joajné Dios, co nttihi jí ná tti icha importante que Jonás pero ḵonhi chojni nchehe caso.

*Jmacon ni, mé tti lamparé cuerpo ni
(Mt. 5.15; 6.22-23)*

³³ 'Xonhi chojni nchengasán ná lámpara para ttema lámpara ni para daquehe ngaxinhi ná cajón, sino que dehe lámpara noi para que cain chojni que dixinhi nchia dingasenhe na. ³⁴ Jmacon ni inchin ná lámpara para ngain cuerpo ni. Mexinxin si jmacon jaha jian, cai ngoixin cuerpoa chonda joadingasán. Rročho si joadingasán que Dios rroanha jí ngain ansean, jaha chojni jian. Pero si jmacon jianha, cai ngoixin cuerpoa jí ngain tti naxin xehe. ³⁵ Ttjiho cuidado para que tti joadingasán que rrichonda rrrocjanha inchin tti naxin xehe. ³⁶ Ixin si ngoixin cuerpoa jichonda joadingasán, ni rioho de ngain cuerpoa jichonda ni rioho tti naxin xehe; cain cosa jaha sicon jian ḵajeho inchin are ná lámpara jintangasañaha conixin ḵoí.

Are Jesús joinchesattehe xifariseo co ximaestroe ley

(Mt. 23.1-36; Mr. 12.38-40; Lc. 20.45-47)

³⁷ Are Jesús joexin ndačho cain yá, ná xifariseo ndache xa Jesús ixin sinecaho xa ngain nchandoha xa. Jesús cjoí nchiandoha xa co joixinhi vehe ngain mesa. ³⁸ Jehe xifariseo mé goan xa admirado ixin vicon xa que Jesús vehe joine co

conttiha jinda tsje nttiha inchin costumbré icha
chojni judío. ³⁹ Pero Jesús ndačho ngain xa:

—Jaha ra xifariseo ra inchin vaso co láto que
chojni ncheroa de ngama, pero de ngaxinhi
ansean ra tecaon ra de cain cosa jianha ixin ttehe
ra cosé chojni co nchehe ra icha cosa jianha.
⁴⁰ ¡Jaha ra tonto ra! ¿Anoaha ra que Dios tti
joinchechjian ngama ra, cai joinchechjian ngax-
inxin ra? ⁴¹ Are danjo ra tomi ngain chojni noa, cai
danjo ra de ngain ansean ra, co jamé tsoroa almá
ra.

⁴² ¡Anto tangui tsonha ra jaha ra xifariseo! Ixin
jaha ra danjo ra ngain Dios tti ttexin parte de ca
que dini menta, co de caruda, co de icha clase de
ca, pero ncheha ra caso de tti jian que nchehe ra
ngain vidá ra co rinaoha ra Dios. Co jihi tti chonda
ra que sinchehe ra co cai nchehe ra sigue danjo ra
tti ttexin parte de cain ca mé.

⁴³ ¡Anto tangui tsonha ra, jaha ra xifariseo!
Jaha ra nttažoxinha ra dayehe ra nttaxintaon icha
importante ngaxinhi nihngo, co nttažoxinha ra
dayehe ra joajna conixin anto respeto are ngatja
nttiha.

⁴⁴ ¡Anto tangui tsonha ra jaha ra ximaestroe ley
co jaha ra xifariseo, xo ncheha ra inchin ndačho
ra! Ixin jaha ra te ra xá sepultura que idiconha ni
co chojni datto na ngataha nttiha pero noeha na
ixin nttiha jixavá cosa dirrenga.

⁴⁵ Cottimeja ná ximaestroe ley, ndačho xa ngain
Jesús:

—Maestro, are soixin ndačho yá, rrinichja feo
de ixin janha na cai.

⁴⁶ Pero Jesús ndačho:

—¡Cai jaha ra anto tangui tsonha ra jaha ra xo maestroe ley! Ixin jaha ra tti ttetonhe ra icha chojni que sinchehe na para ixin Dios cosa anto tangui, co mé ná carga anto ye para ixin jehe na ixin ttixinha na nchehe na cain mé, co jaha ra ttjenguijaha ra na para sinchehe na cain tti jaha ra ttetonha ra.

⁴⁷ ’¡Anto tangui tsonha ra jaha ra! Ixin jaha ra nchechjian ra monumento anto čhjoin ngataha tti tečavá cuerpo cain profeta que nindogoelitoa ra xančjen nagoenxon na are saho. ⁴⁸ Conixin yá jaha ra tjago ra, que nttačoxinha ra tti joinchehe nindogoelitoa ra xančjen, ixin jehe na vinttegoen na profeta are saho co jaha ra nchechjian ra čhjoin ngataha tti tečavá cuerpo profeta.

⁴⁹ ’Mexinxin Dios ixin jehe anto jian nohe, mexinxin ndačho: “Rrrorroanha ra profetana co representantena nganji ra, co jaha ra nasoenxon ra čhonja de jehe na co ittoha na feo sinchehe ra ngain na.” ⁵⁰ Mexinxin chojni de ngain tiempo jihí jehe na niteca vidé cain profeta que vintteguenhe desde are nontte conchijian hasta jai; ⁵¹ rročho desde are ndavenhe Abel hasta are joiguenhe Zacarías, tti goenxin na ngain lugar entre altar co lugar santísimo. Yá tti rrindattjoxin ra janha, que chojni de ngain tiempo jihí tti teca na cain yá.

⁵² ’¡Anto tangui tsonha ra jaha ra, xo maestroe ley! Ixin jaha ra chonda ra tti xón que jitaxin cain tti ttetonha Dios. Pero jaha ra mismo rinaoha ra ttixinha ra, ni tančhjandaha ra icha chojni que rinao tsinxin xón mé.

⁵³ Are Jesús ndačho cain cosa jihí ngain xa, ximaestroe ley co xifariseo anto vinttegoñao xa

ngain Jesús, cottimeja joanchianguihi xa Jesús anto tsje pregunta,⁵⁴ para que rroguiconxin xa si jehe rronichjá ná cosa ndoaha, para que jehe xa nchao rrocjanguihí xa Jesús.

12

Jesús cjoagoe chojni ixin cainxin cosa, masqui jimao, pero tsononxin

¹ Ngain rato mé, xatte anto tsje miles de chojni ntiha que hasta conxinca chó na soji. Co Jesús coexinhi ndačho saho ngain tti chojni que vacao:

—Ttjihó ra cuidado de ixin levaduré xifariseo, rročho tti jeha ndoa que jehe xa ndačho xa. ² Ixin xonhi ná cosa que ttema chojni que tsononxinha, co xonhi ná cosa jimao que tsononxinha. ³ Mexinxin, cain tti jaha ra nichja ra are naxin xehe, tsononxin are osingasán; co cain tti jaha ra nichja ra jimao are puerté nchia tajijé, pero cai tsononxinxin desde noi ngataha nchiandoi ra.

*Quensen jiquininxin rročagoen ni
(Mt. 10.28-31)*

⁴ ’Nganji jaha ra, xiamigona ra, janha rrindattjo ra que chondaha ra que rročagonhe ra tti chojni que natjayaxon ngain cuerpo ni, ixin chojni mé čoha nasoenxon almé ni. ⁵ Pero janha rrondattjo ra quensen tti chonda que rročagonhe ra: xagonhe ra jeho Dios, ixin jeho jehe tti nchao nasoenxon cuerpoa ra co rrrorroanha almá ra para ngain infierno. Ján seguro que xagonhe ra jehe Dios.

⁶ ’¿Quejanhi rentte naho conttoachjan? Jeho yó tomichjan que anto rentteha. Pero Dios tjañeha ni

ná de jehe va. ⁷Ixin Dios, jehe nohe hasta quejanhi xajá ra chonda ra. Mexinxin jaha ra xáonha ra, ixin jaha ra icha rentte ra que tsje conttoachjan.

*Tti chojni que ndačho ngattoxon con icha chojni
ixin Jesús jian*

(Mt. 10.32-33; 12.32; 10.19-20)

⁸'Janha rrondattjo ra que quexeho chojni que rrondačho nttihi ngataha nontte ixin amigoe na janha, cai jahna, tti Xí que joixin de ngajni, rrondačjan ngattoxon con cain ángel de Dios que ixin jehe na amigona na cai. ⁹Pero tti chojni que rrondačho ngattoxon con icha chojni que ixin jehe chonxinha de ixin janha, cai janha rrondačjan ngattoxon con cain ángel de Dios que ixin chonxinha jehe mé.

¹⁰'Co quexeho chojni rronichja jianha de ixin janha, tti Xí que joixin de ngajni, nchao sitjañehe chojni mé; pero tti chojni que rronichja jianha de ixin Espíritu Santo, xonhi tiempo sitjañehe chojni mé.

¹¹'Are tsjiho ra na ngain nihngo, o ngain xijuez, o ngain icha xittetonha, taha ra joachjaon de ixin quexén rrondačho ra ngain xa de ixin tti joinchehe ra, co taha ra joachjaon de ixin quexén rronichja ra, ¹²ixin are sinqué momento que jaha ra rronichja ra, Espíritu Santo tti sinttažaxaon ra quehe rrondačho ra.

Tti rico que xaxaon cosa que xonhi xé

¹³De ngayé cain chojni nttiha, ná chojni ndačho ngain Jesús:

—Maestro, ndache xanchian que rrochjana xan tti partena que jiquininxin na dé herencia.

14 Pero Jesús ndačho:

—¿Quensen coín na janha de juez ngain cosa yá?

15 Cai ndačho Jesús:

—Ttjiho ra cuidado que antoha sinao ra tomi, ixin vidé chojni tsixinha de ixin tti tsje tomi que rrochonda ni.

16 Cottimeja Jesús ndache na ejemplo jihí:

—Vehe ná xí rico, co ngoixin jnguihi xa anto goan noa. **17** Cottimeja tti rico mé vehe ḥaxaon: “¿Quexén sinttaha janha? Chondaha ttinó tsenchjianxin cain cosechana.” **18** Ngain rato mé jehe ḥaxaon: “Onona quexén sinttaha. Sinttaxantte granerona que chonda para sinttachjian iná granero icha jie, co nttiha tsenchjinha cainxin cosechana, co cainxin cosa que janha chonda. **19** Cottimeja rrondattjan almana: Alma, jaha ochonda anto tsje cosa jichjian para anto tsje nano. Jai nchejogaha, jintte co dihi, co chaha.” **20** Pero Dios ndačho ngain xí mé: “Jaha tonto. Ngain ttie jihí senhe jaha; co cain tti coenchjinha, ¿para ixin quensen?” **21** Jañá tonhe tti chojni que anto datse tomi co icha cosa que jehe dondehe, pero que ḥonhi chonda para ngain Dios.

Dios jinda cain xenhe

(Mt. 6.25-34)

22 Despues ndačho Jesús ngain chojni que vacao:

—Janha rrondattjo ra que taha ra joachjaon de ixin tti sintte ra para sinttechonxin ra, ni de ixin lontto que sinttetsí ra. **23** Vidé ni icha rentte que tti jine ni, co cuerpoe ni icha rentte que lonttoe ni.

24 Tsjehe ra conttaha, que co mé ni ḥonhi ttenga

va, ni ḵonhi cosecha datsín va, ni chondaha va graneroe va, pero ixinha mé, Dios chjé va tti jine va. ¡Co para ixin Dios jaha ra icha rentte ra que conttoa! ²⁵ Co ¿Apoco ná de jaha ra, ixin anto ta ra joachjaon, anchao sahngui ra irioho metro icha de tti jininxin ra? ²⁶ Mexinxin si čhoha ncuhehe ra cosa tanguiba ¿quedonda ta ra joachjaon de ngain cosa tangui?

²⁷ 'Xaxaon ra jian quexén dangui cain tsjo ngataon jngui, cain tsjo mé ncuheha tsjo ḵa ni tajinha tsjo chjon. Co janha rrondattjo ra que ni rey Salomón, que jehe anto čhjoin vaguitsá, pero ḵonhi tiempo vetsá inchin ná de jehe tsjo jihí. ²⁸ Si Dios jañá nchetsá cain ca que jeho jai jí ngataon jngui co ndoe ondarroche ca ngain ḵohí, jmé jaha ra xichjaha ra Dios cain tti rrogondaha ra, masqui jaha ra ḵa antoha jian ditticaon ra ngain Dios! ²⁹ Mexinxin, taha ra joachjaon de ixin quehe sintte ra ni de quehe sihi ra. ³⁰ Ixin chojni de ngain mundo jihí ta na joachjaon de ixin cain cosa yá; pero jaha ra chonda ra ná Ndodá ra ngajni, que jehe Ndo onohe Ndo que jaha ra rrogondaha ra cain cosa yá. ³¹ Pero cain tiempo ditticaon ra cain tti ttetonha Ndo, co jamé sayehe ra cain cosa jihí.

*Cosa rentte que rrochonda na ngajni
(Mt. 6.19-21)*

³² 'Xaonha ra jaha ra ḵo inchin colecona, ixin masqui tsjeha ra pero Ndodá na que ttjen ngajni, jehe Ndo rinao Ndo rrochjá ra Ndo tti jehe Ndo ttetonha Ndo ngajni. ³³ Nchecji ra cain cosa que chonda ra co ttjenguijna ra tti chojni que rrogondehe; jañá nczechjian ra bolsé tomi que ḵonhi

tiempo sichje, rročho que ngajni rrochonda ra cosa icha rentte co cosa mé xonhi tiempo tsjexin, ixin nttiha xichehe sijiha xa ni cochí sinchexant-teha. ³⁴ Ixin ngain lugar tti jaha ra rrochonda ra cosá ra icha importante para ixin jaha ra, cai nttiha sehe ansean ra.

Chonda que sontte na listo

³⁵ Dintte ra listo, co ttjiho ra cuidado que lampará ra que sacaon cain tiempo. ³⁶ Dintte ra inchin ninchehe ḥa que techonhe na xinajní na tsixin xa de ngain tti cottehe. Ixin ninchehe ḥa mé dintte na listo para tsonxiré na puerté nchia are singa xa puerta. ³⁷ Anto čhjoin para ixin tti ninchehe ḥa que are tsí xinajní na, jehe na tatetsjehe na; atto seguro tti janha rrindattjo ra, que mismo xinajni mé tsaoxin xa cinturoen xa jian co tsintte xa na ngain mesa. Co jehe xa tsequia xa comida que sine na. ³⁸ Masqui jehe xinajni mé tsí xa ngosine ttie o are ndoyo, co ninchehe ḥé xa tatetsjehe na, anto čhjoin para ixin ninchehe ḥa mé. ³⁹ ḥaxaon ra cosa jiji, que si xinajní ná nchia rroconohe xa quehe hora rroquí xichehe are ttie, xinajni mé rroguejoaha xa para rrocanchandaha xa xichehe rroguixinho xa rroqué xa. ⁴⁰ Jaha ra cai dintte ra listo; ixin janha, tti Xí que joixin de ngajni, sihi iná are jaha ra ni rroxaxaonha ra ixin sihi.

Ná tti ninchehe ḥa jian, co ná tti ninchehe ḥa jianha

(Mt. 24.45-51)

⁴¹ Cottimeja Pedro joanchiangui ngain Jesús co ndačho:

—¿Acoín ejemplo jihi para ixin janho na, ani para ixin cainxin chojni?

42 Jesú ndačho:

—Xaxaon ra quensen tti nchehe ḫa que ditticaon jian co ttinxin jian tti jiquinixin sinchehe. Mé tti nchehe ḫa que xinajní rrochjé xa ḫa de rrochjé tti sine cain ninchehe ḫé xinajní mé. **43** Anto čhjoin para ixin tti nchehe ḫa que are tsí xinajní, jehe jinchehe inchin vitonhe. **44** Ndoa tti rrondatjo ra que xinajni mé rrondačho xa ngain tti nchehe ḫa mé que jehe senda cain cosa que chonda xa. **45** Pero si tti nchehe ḫa mé sinchesattehe xinchehe ḫé xinajni mé conixin nčhimožé xa, co sehe sine co sihi co rrocoan; **46** cottimeja xinajní tsí xa ngain ná nchanho co ngain ná hora que ni jehe noeħa, co sinchecastigá xa anto soji inchin tti castigo que sayé cain chojni que ditticaonha Dios.

47 Tti nchehe ḫa que onohe quehe rinao xinajní, pero rinaoha nchehe mé co nc̄heha inchin tti tte-tonha xa, tti nchehe ḫa mé anto soji sicaon. **48** Pero tti nchehe ḫa que noeħa quehe rinao xinajní, co nc̄hehe cosa que jiquinixin castigo, nchehe ḫa mé icha sojiha sicaon. Tti chojni que dayé icha tsje, rrožanchiehe icha tsje, ixin jehe chonda icha responsabilidad.

*Causexin Jesú chjeyaxin chojni
(Mt. 10.34-36)*

49 Janha joihi inchin ná ḫohi ngataha nontte para sinttaxantte tti ḫonhi ḫé co sinttajian tti jian para ixin Dios. ¡Co janha rrojinaho que orrogacaon ḫohi mé! **50** Chonda que atto tangui tsonna, co mé inchin janha siguittexin na ngain

cosa tangui. Co janha anto feo tonona hasta tsoenja cain jihi. ⁵¹ Jaha ra puede xaxaon ra que ixin janha joihi para que chojni sicon chó na contento ngataha nontte jihi. Janha rrindat-tjo ra que nahi, ixin chojni toñaohe chó na jai ixin joihi janha. ⁵² De jai pa ndaha naho chojni ngain ná nchia rrochjeya na de ixin causananxin janha; ní na sitticaon na na janha, co yó na sitticaonha na na; o yó na sitticaon na na janha, co ní na sitticaonha na na. ⁵³ Ixin de causananxin janha, ná ndodaha rroningaconhe ndo xenhe ndo, co ná chjan rroningaconhe xan ndodé xan. Ná jannahaa rroningaconhe jan nchichjehe jan, co xannchí rroningaconhe xan janné xan. Ná janchaha rroningaconhe jan nchideindehe jan, co nchideinda rroningaconhe ncha jannché ncha.

*Quexén jí tiempo
(Mt. 16.1-4; Mr. 8.11-13)*

⁵⁴ Cai ndačho Jesús ngain chojni:

—Are jaha ra dicon ra que ttjoi čhinxin ttjoi tti diataonxin nchanho, jaha ra ndačho ra que ixin otsí čhin, co jamé ndoa tonhe. ⁵⁵ Co are tjaxin čhintto no sur, jaha ra ndačho ra que sania soa, co ndoa jamé tonhe. ⁵⁶ ¡Jaha ra ncheha ra tti ndačho ra! Jaha ra noha ra datsoenhe ra quehe tsonhe de ngajni co ngataha nontte, ¿co quedonda čhoa datsoan ra tti tsonhe ngain tiempo que te ra jai?

*Tsjehe ra quexén nchehe ra para itsoñaoha ra
ngain tti chojni que ningaconha ra
(Mt. 5.25-26)*

⁵⁷ ¿Quedonda ttinchieha ra jaha ra mismo cain cosa jian? ⁵⁸ Si ná chojni sičho jie para ixin jaha

co tsjiho jaha ngain xijuez, icha jian de ngatjao nttiha tjao chó ra de ixin quexén tsonhe para que jehe itsjioha ngain xijuez. Ixin si nahi, xijuez rrondache xa xipolicía para tsaxinha xa.⁵⁹ Co janha rrindattjo que choha sačhjexin de nttiha hasta que jaha tsengaja hna cainxin tomi que jaha rríca.

13

Chonda ra que tsentoxinho ra vidá ra

¹ Ngain rato mé nttiha vintteconchienhe canxion chojni ngain Jesús co coequín na ixin Pilato nagoenxon canxion xí de ngain regioen Galilea mero ngain rato que jehe xa tedoen xa coxigo para tedanjo xa ngain Dios. Co nttiha vinttji jní xí mé, tti vinttji jní coxigo. ² Co Jesús ndačho ngain tti chojni que tettequín mé:

—¿Aňaxaon jaha ra que jamé vintteconhe xí tehe ixin icha jianha jehe xa que cain chojni ngain nacioen xa? ³ Janha rrindattjo ra que jeha jamé. Co si jaha ra tsentoxinha ra vidá ra, cain ra ndasitján almá ra. ⁴ ¿O ani ţaxaon jaha ra que tti dieciocho chojni que ndavenhe are vetsingatja na tti torre de Siloé, ani nimé icha jianha na que cain chojni que vintte Jerusalén? ⁵ Janha rrindattjo ra que jeha jamé. Co si jaha ra tsentoxinha ra vidá ra, cainxin ra ndasitján almá ra.

Ejemplode tti nttahigo que danjoha ttochjoin

⁶ Cottimeja Jesús coín na ejemplo jihi:

—Ná xí vechonda xa ná nttahigo ngataon jnguihi xa co cjoí xa joitsjehe xa si vanjo nttatnochjoin, pero ţonhi ttochjoin vittja xa ngagaha

ntta. ⁷ Cottimeja ndačho xa ngain tti xí que jinda jngui mé: “Tsjexinxin, janha oní nano ttjihi dicjé ttochjoin ngain ntá jihi, co ni ná nttiha dittjaha ttochjoin ngain ntta. Tončinji ntta: ¿quedonda ḥa sehe ntta ngataha jnguihna co ḥonhi ttochjoin danjo ntta?” ⁸ Pero tti xí que jinda jngui mé ndačho: “Soixin, ḥa ttinttohe ntta iná nano jihi. Janha sinttandanguia ntta jinche co tsingonguia ntta abono. ⁹ Conixin jamé puede osanjo ntta ttochjoin, pero si nahi, cottimeja tončinji ntta.”

Are Jesús joinchexingamehe ná nčhí ngain tti nchanho que nchejogaha ni

¹⁰ Ná nttiha, ngain tti nchanho que nchejogaha ni, Jesús tajincheocoenhe chojni de ixin Dios ngain ná nihngo. ¹¹ Co nttiha vehe ná nčhí que venihi nčha ovechonda dieciocho nano. Ná espíritu jianha ndadinchechatto nčha, co jehe nčha ičhoha vaxendoa nčha. ¹² Co are Jesús vicon nčhí jihi, jehe ndačho ngain nčha:

—Jaha oxingamaha de ixin tti chin que joari-chonda.

¹³ Cottimeja jehe coín rá ngataha nčhí mé, co ngain rato mé jehe nčha xendoza nčha co coexinhi nčha joinchecoanxinhi nčha Dios. ¹⁴ Pero xittetonha ngain nihngo mé coñao xa ixin Jesús joinchexingamehe nčhí mé mero ngain tti nchanho que nchejogaha ni. Mexinxin jehe xí mé ndačho xa ngain cain chojni que te nttiha:

—Semana chonda incjaon nchanho tti jiquininxin doan ḥa; ngain nchanho mé sihi ra para que tsočoanha ra co nahi ngain nchanho que nchejogaha ni.

15 Cottimeja Jesús ndačho ngain xí mé:

—Jaha ra ncheha ra tti ndačho ra, ixin čhonja de jaha ra, ¿atonxindangueha ra coxinttaha ra o colochoha ra para ttjiho ra va diguihi va jinda nchanho que nchejogaha ni? **16** Co nčhi jihí que jehe nčha razé Abraham nčha, co Satanás diquia nčha conixin chin jihí ochonda dieciocho nano, ¿apoco janha chondaha que tsonxindangá nčha de ixin chin yá ngain nchanho que nchejogaha ni?

17 Are Jesús ndačho jihí, cainxin chojni que ningaconhe anto cosoé na; co icha chojni anto ché na are vaguicon na milagro anto importante que Jesús vanchehe.

Ejemplode ná tsé que dinki mostaza

(Mt. 13.31-32; Mr. 4.30-32)

18 Cottimeja ndačho Jesús:

—¿Quehe cosa nchao sinttacaninxin tti ttetonha Dios? **19** Mé inchin tsehe ná ca que dinki mostaza que ttenga ná xí ngain jnguihi xa. Co ca mé dangui ca inchin ná nttá jie, que hasta conttoa que tjaganga nchechjian va caqué va ngagaha rama.

Ejemplode levadura

(Mt. 13.33)

20 Cai ndačho Jesús:

—¿Quehe cosa nchao sinttacaninxin tti ttetonha Dios? **21** Mé inchin levadura que ta ngain hariné niottja co nchehe xa hasta nchegatjoe nchoho.

Tti puertajno

(Mt. 7.13-14, 21-23)

22 Are sacjan Jesús para Jerusalén, jehe joinchecoenhe chojni de ixin Dios ngain rajna

co ngain rajnanchjan que vatto. ²³ Co vehe ná chojni que joanchiangui ngain Jesús co ndačho:

—¿Ajeho nchion chojni tti rrochonda iná vida naroaxin?

Co Jesús ndačho:

²⁴ —Nchehe ra de que dixinxin ra ngain puerta jno, ixin rrindattjo ra que tsje chojni sinao na sixinxin na nttiha pero čohoa. ²⁵ Co are tti nchian-doha singattjen co tsejé puerta, cottimeja jaha ra xo sittoha ra ndoja, singa ra puerta co rrondačho ra: “Soixin, dantjena ni ra puerta.” Pero jehe rrondačho: “Janha nonaha quettinó joixin jaha ra.” ²⁶ Cottimeja jaha ra tsexinhi ra rrondačho ra: “Janha na tti joine na co vihi na nganji soixin, co soixin tti joinchecoanna ra de ixin Dios ngá nttiha de ngain rajnana na.” ²⁷ Pero jehe rrondačho nganji ra: “Janha otendattjo ra que nonaha ttinó joixin ra. Sattjixin ra de nganji na, xo nchehe ra jianha.” ²⁸ Nttiha jaha ra rrotsjanga ra co sinttetaon neno ra are sicon ra que Abraham, Isaac, Jacob, conixin cain profeta tate na ngajni tti ttetonha Dios, co jaha ra Dios tsančhjandaha ra para sintte ra nttiha. ²⁹ Ixin are mé tsixin chojni de cainxin parte de nontte; de ngain tti čhinxin nchanho, co de ngain tti diataonxin nchanho, co de ngain norte co de ngain sur para sintte na sine na ngain mesa de ngain lugar que ttetonha Dios. ³⁰ Are mé tsje chojni que jai jeha importante na, pero are mé jehe na nisintte icha importante; co cain chojni que jai tonohe na ixin anto importante, are mé jehe na jeha importante na.

*Jesús tsjanga por ixin Jerusalén
(Mt. 23.37-39)*

31 Ngain nchanho mé vinttecji canxion xifariseo co vinttendačho xa ngain Jesús:

—Sattjixin de nttihi, ixin rey Herodes rinao na-soenxon soixin.

32 Pero Jesús ndačho ngain xa:

—Ttji ra co ndache ra xí mañoso mé, que jai co ndoe sinttaha sigue senguixin espíritu jianha de ngaxinhi cuerpoe chojni, co sinttaxingamá chojni nihi, co rejngui otsjena xana. **33** Pero janha chonda que sinttaha sigue nttiana jai co ndoe co rejngui, ixin cain profeta denxin de ngain Jerusalén.

34 ¡Jaha ciudad de Jerusalén, jaha tti nadoenxon cain profeta co taxin xo tti chojni que ttiaho joajné Dios que jehe rroanha nganji! ¡Janha anto tsje nt-tiha joinaho rrogatse chojnía inchin cochia datse va xenhe va ngangui nenehe va, pero jaha čoha!

35 Mexinxin tsjexin ra; nchiandoi ra ndasittohe nchia; co rrondattjo ra que irrocjanha ra sicon ni ra hasta que tsjija nchanho que are jaha ra rrondačho ra: “Anto jian tti joí de ngain nombré Dios.”

14

Are Jesús joinchexingamehe ná xí que veninxin chicjan

1 Ná nchanho que nchejogaha ni, Jesús cjojine ngain nchiandoha ná xittetonha ngain xifariseo, co are mé icha xifariseo tatetsayehe xa

Jesús. ² Cai ngattoxon con Jesús tají ná xí que veninxin xa de chicjan. ³ Cottimeja Jesús joanchiangui ngain ximaestroe ley conixin ngain xifariseo:

—¿Ají joachaxin sinchexingamehe ni ná chojni nihi ngain nchanho que nchejogaha ni o ani nahi?

⁴ Pero jehe xa tavinttetencoа xa. Cottimeja Jesús catte tti nihi mé, joinchexingamehe co ndačho ngain ixin satsji jehe tti nihi mé. ⁵ Co ndačho Jesús ngain xifariseo:

—¿Quexehé de jaha ra, si ná colochoha ra o ná coxinttaha ra setsingá va ná pozo, asantsjeha ra va rato mé masqui nchanho que nchejogaha ni?

⁶ Co cain jehe xa čohoa ndačho xa ni ná palabra ngain Jesús.

Chojni que ttji tti tottehe na

⁷ Are vicon Jesús ixin cainxin chojni que cjoí ngain tti cottehe na puro ttinchieho na nttaixin-taon icha importante ngain mesa, jehe ndache na janhi:

⁸ —Are ná chojni rrondattjo que tsji ngain ná quiai tti tsottehe na, dariha ngain lugar importante, ixin puede siji iná chojni icha importante que jaha. ⁹ Co tti ndattjo para cjoí jaha conixin jehe tti icha importante mé, nchao siji co rrondattjo jaha: “Danjo lugar que rrichonda ngain iná chojni jiji.” Cottimeja jaha chonda que satsjixin de nttiha conixin joasoaxin para sigarihi ngain tti nttaixintaon icha importanteha. ¹⁰ Mexinxin, are ná chojni rrondattjo que jaha tsji ná quiai, jaha darihi tti lugar icha importanteha, para que are tsí tti ndattjo ixin jaha cjoí ngain quiai mé, jehe nchao rrondattjo: “Amigo, jaha datto ngain iná lugar

icha importante.” Jamé jaha tsosayaha ngattoxon con cain chojni que te ngain mesa nttiha. ¹¹ Ixin tti chojni que ḥaxaon ixin jehe anto importante, chojni mé tsonohe ixin jehe ḥonhi rentte; co tti chojni que ḥaxaon ixin jehe ḥonhi rentte, chojni mé icha tsorentte.

¹² Cai ndačho Jesús ngain tti xí que coetonhe Jesús para que Jesús cjoi ngain quiai mé:

—Jaha are tsín ná vandango ttetoenha jeho xi-amigoa, ni jeoha xanchó, ni jeoha nipayentea, ni jeoha nivecinoa que chonda tsje tomi, ixin cain chojni jihí nchao tsín na iná vandangoe na co tsetonha na jaha para que tsji sinttecoho na co jamé jehe na otsoncjañaha na tti jehe na joine na ngain vandangoa. ¹³ Mexinxin are jaha tsín ná vandango, cai ttetonhe chojni noa, co tti chojni que čohoa ttingui, co tti chojni rrengo, co tti chojni chejo. ¹⁴ Co jamé Dios sinttanchaon jaha, ixin are rroxechon cain chojni que joinchehe jian, Dios tsjengaha hna jaha ixin jaha joanjo joine tti chojni que čohoa tsjengaha hna jaha.

Ejemplode tti sena que Dios sanjo ngajni

¹⁵ Are vinttequinhi na jihí ná de tti nite ngain mesa ndačho ngain Jesús:

—Anto čhjoin para ixin tti chojni que sine niot-tja nttiha ngain lugar tti ttetonha Dios.

¹⁶ Cottimeja Jesús ndačho ngain chojni mé:

—Ná xí coín xa ná vandango anto jie, co coetonha xa para joiguitonhe anto tsje chojni para rrocji na rrojine na. ¹⁷ Co are ocainxin vehe listo, xí mé rroanha xa ná tti ncuhehe ḥé xa para joiquetonhe cain chojni mé ixin onchao jí cain cosa,

onchao tsí na para sijine na. ¹⁸ Pero cain chojni mé coexinhi na ndačho na ixin čhoha tsji na. Tti saho ndačho: “Najoexincoa coehna ná nontte, co chonda que tsji sitsjá nontte mé; janha ntatsanha ñao que nchetjañana na ixin tsjinha na.” ¹⁹ Iná ndačho: “Janha ocoehna naho yunta de coxinttá, co tsji para sicon si nchao tsaon va; mexinxin ntatsanha ñao nchetjañana na ixin tsjinha na.” ²⁰ Co iná ndačho: “Janha najoexincoa cottena, co mexinxin čhoha tsjin na.” ²¹ Are tti ncchehe ḥa mé cjan, ndačho cain jihí ngain xinajní. Cottimeja jehe xinajni mé coñao xa co ndačho xa ngain jehe tti ncchehe ḥa mé: “Jaicoa ttji ngain cain nttiha yeje co ngain nttiha nchinchin de ngain ciudad jihí co sicohna nttihi chojni noa co tti čhoha ttingui, co tti rrrengo, co tti chejo.” ²² Nchion después jehe tti ncchehe ḥa mé ndačho: “Ojonttaha inchin soixin coetonna, co ján ḥa jí icha lugar.” ²³ Jehe xinajni mé ndačho xa ngain tti ncchehe ḥé xa: “Ttji ngá nttiha yeje co ngain nttiha nchinchin de ngandehe ciudad jihí co ndache icha chojni que tsí na, para que rrocaon nchiania. ²⁴ Ixin janha rinaoha sixinhi ni ná de tti chojni que janha coetoan rroquí icha saho para rrojine na.”

Tti tangui que tonhe ni are ditticaon ni Jesucristo

²⁵ Anto tsje chojni rroé na Jesús; co jehe ngaria co ndačho ngain na:

²⁶ —Si čhonja ra rinao ra sitticaon ni ra janha para cainxin tiempo, chonda ra que icha sinao ni ra janha que ndodá ra, o janná ra, o čhiha ra, o xanha ra, o xanchó ra, co cai hasta icha que vidá ra. Tti chojni que sincheha jamé čhoha

sehe chojnina. ²⁷ Jañá tti chojni que sanjoha vidé de ixin causananxin janha, chojni mé čoha sehe chojnina. ²⁸ Si čhonja de jaha ra sinao ra sinchechjian ra ná nchia anto noi, ¿apoco jeha saho rrožaxaon ra quejanhi tomi tsonchjianxin nchia mé, para que tsonoha ra achonda ra cain tomi para tsjexinxin tsonchjian nchia mé? ²⁹ Ixin si nahi, puede jeho coín ra base co ndajoexin tomia ra co ijoexinha joinchechjian ra nchia mé. Cottimeja cain chojni que sicon tsexinhi na tsjanoa ra na jaha ra, ³⁰ co jehe ni mé rrondacho: “Xí jiha coexinxin xa joinchechjian xa nchia co joeha xa.” ³¹ O si čhonja rey chonda que rrožanguí guerra ngain iná rey, ¿apoco jeha saho rrožaxaon si nchao conixin tte mil soldado rrochoenxin tti iná rey que tsiaho veinte mil soldado? ³² Co si rey mé tsonohe que tsixinha, jehe rrrorroanha canxion chojní para que sicao na joajna ngain tti iná rey are jehe joí xa icjion para que itsetoha. ³³ Jañá, cai si čhonja de jaha ra tsinttoeha ra cain tti chonda ra, čoha sintte ra chojnina.

*Are xijntta ndarrocjan simple
(Mt. 5.13; Mr. 9.50)*

³⁴ ’Xijntta jehe jian, pero si ndarrocjan simple, ¿quexén rrocjan sonda iná? ³⁵ Mé iżonhi xé ni para jinche ni para ngain montoe abono, sino que mé dingo jañao. Jaha ra xo ttinxin ra, ttinhi ra jian.

15

*Ejemploe tti coleco que diguitján
(Mt. 18.10-14)*

¹ Cain xicobrador de impuesto co xí que nchehe cosa jianha vintteconchienhe xa ngaca Jesús para vinttequinhi xa tti jindačho Jesús, ² co mexinxin xifariseo co ximaestroe ley feo nichja xa de ixin Jesús, co ndačho xa:

—Xí jihí nchehe xa caso cain chojni que ncheha jian co jinecaho xa na.

³ Cottimeja Jesús coinhí xa ejemplo jihí:

⁴ —¿Quexehe de jaha ra, si chonda ra cien coleco, co sinchetján ra ná va, atsinttoeha ra tti noventa y nueve va ngataon jngui co tsji ra sicjé ra tti co ndavitián, hasta que sinchija ra va? ⁵ Co are dinchí ra va, jaha ra chaha ra co tame ra va ngataha ntattachán ra ⁶ co are daso ra nchiandoi ra, datse ra xiamigoa ra co nivecinoa ra co ndache ra na: “Jai sontte na contento ixin ovittja tti coleco que jointtatján.” ⁷ Janha rrindattjo ra, que xajeho jañá ngajni cai, Dios conixin cain ángel icha ché ngain ná chojni que jinchehe jianha are jehe ttentoxinhi vidé, que ngain tti noventa y nueve chojni jian que chojni mé rrogondeha na tsentoxinhi na vidé na.

Ejemploe tti tomi que ditján

⁸ 'Co cai iná ejemplo. Ná nchí chonda tte tomi de plata co joinchetján nčha ná tomi mé. ¿Quehe nchehe nčha? Jehe nčha ncögacaon nčha ná lámpara para ttjexin nčha tomi mé ngoixin ngaxinhi nchia co danjo nčha ngoixin ngaxinhi nchia hasta que dittja nčha tomi mé. ⁹ Co are dittja nčha tomi mé, jehe nčha dirroé nčha cain nčhiamigué nčha conixin cain nčhivéciné nčha co ndačho nčha ngain cain nchí mé: “Janché sontte na contento ixin janha ovittja tti tomi que jointtatján.”

10 Janha rrindattjo ra que ḥajeho jamé ngajni cai ixin ché cain ángel de Dios are ná chojni que jinchehe jianha ttetonxinho vidé.

Ejemplode tti ná chjan que sacjoixin de ngain nindoha

11 Jesús ndačho cai:

—Ná xí vechonda xa yó xenhe xa xanxí, **12** co tti xan icha nchín ndačho xan ngain ndodé xan: “Padre, chjana tti herencia que jiquininxin na janha.” Cottimeja jehe ndo conchjeyehe ndo cayoi chjan mé herencié xan. **13** Tsjeha nchanho después, jehe tti xan icha nchín mé joinchecji xan tti nontte que vittoehe xan. Cottimeja conixin tomi mé sacjoixin xan cjin ngain iná nación; nttiha joinchexinxin xan cain tomí xan de ngain nchí co de ngain icha cosa jianha. **14** Co are ondajoehe xan cain tomi mé, anto ndacochjonga tti joine na ngain nación mé, co jehe xan anto vaguenhe xan jintta. **15** Cottimeja sajoganchia xan ḥa ngain ná xinajni de ngain nación mé, co xinajni mé joanjo xa ḥa. Coetonhe xa jehe xan sajoiqingaria xan cocochi ngataon jnguihi xa. **16** Co jehe xan anto vaguenhe xan jintta, hasta que jehe xan joinao xan rrojine xan ná tipo de raja que dinihi algarroba que vajine cocochi, pero ḥonhi chojni vachjé xan cosa mé. **17** Cottimeja ḥaxaon xan co ndačho xan: “¡Anto tsje ninchehe ḥa chonda ndodana! ¡Co jehe na chonda na tti jine na hasta xehe, co nttihi janha ndasenxin na jintta!” **18** Icha jian janha sarrocjan na tti jí ndodana co rrondattjan ndo: Padre, janha jianha jointtaha ngain Dios co nganji soixin. **19** Janha ijiquininxinha na sinhi na xanha soixin;

jeho dayehna na inchin ná de ninchehe xá.” ²⁰ Co jamé joinchehe xan; coá xan ntiha para sacjan xan ngain nchiandoha ndodé xan.

’Xa icjion joiji xan vicon ndodé xan que jittonchienhe xan, jehe ndo coiaconoehe ndo xan. Co coinga ndo cdoi ndo vichoexin ndo xan ngatja ntiha co cjóa ndo xan co coetoxin ndo xan. ²¹ Cottimeja jehe xan ndačho xan ngain ndodé xan: “Padre, janha jianha jointtaha ngain Dios co nganji soixin; janha ijiquininxinha na sinhi na xanha soixin.” ²² Pero jehe ndodé xan ndačho ndo ngain ninchehe xé ndo: “Jaca sicohna ra tti lontto icha jian co ttentoxinna ra xanhna jih; co cai ttengaha ra ná cochianingo dedoe xan, co nchecjanga ra xan jian tteroa. ²³ Sicó ra tti coxinttachjan que jointtantao co doenhe ra va. ¡Sontte na co sontte na contento! ²⁴ Ixin xanhna jih ondavenhe xan de ngattoxon con na, co jai cjan xechon xan. Ondavitján xan co xá cjan na jonttó na xan.” Co coexinhi na joinchechjian na comida para joine na.

²⁵ ‘Co are mé tti xansaho ngataon jngui jí xan. Co are ocjan xan co joí xan chiaon nchia, coinhi xan són co coinhi xan ixin tette na. ²⁶ Cottimeja vayé xan ná de tti ninchehe xá que te ntiha para joanchianguihi xan quehe jí ntiha. ²⁷ Jehe tti nchehe xá mé ndačho: “Joí xanchó, co ndodá coetonha ndo venhe tti coxinttachjan que cjonttao ixin joí xanchó co xonhi tti nihi xan.” ²⁸ Pero tti xansaho mé coñao xan, co ixin čohoa xan vixinhi xan nchia, jehe ndodé xan chonda ndo que vačhe ndo para joinchetsenhe ndo ñao xan ixin rroguiixinhi xan nchia. ²⁹ Co jehe xan ndačho

xan ngain ndodé xan: “Soixin noha quejanhi nano janha rrinttaha ḫa nganji, co cainxin tiempo janha vitticanho cain tti ttetonna na, pero soixin ḫonhi tiempo chjaha ni ná cochivatochjan para rrogonhe rrojinequinha xiamigona.³⁰ Pero jai joí xanha jihí, que joinchexincoa xan tomia de ngain nčí que nchecji cuerpo, co jai soixin gonhe para ixin jehe xan tti coxinttachjan jitjonttao.”³¹ Cottimeja ndodaha mé ndačho ndo ngain xan: “Hijo, jaha cainxin tiempo rrihi nganji na, co cainxin cosa que chonda janha, mé cosá jaha.³² Pero jai atto jiquininxin tsín ná vandango co sontte na contento, ixin xanchó que inchin ondavenhe xan, pero para ixin jána jai cjan xechon xan. Co jehe xan ondavitján xan, pero para ixin jána jai jonttó na xan.”

16

Ejemplo ná xivaquetonha ngain ná rancho

¹ Jesús ndačho cai ngain tti chojni que vacao:

—Vehe ná xí rico que vechonda xa ná xivaquetonha ngain ranchoe xa pero cjoí na joindache na xinajni mé que ixin xinchehe ḫa mé jinchexincoa xa tomí xinajni.² Cottimeja xinajni mé vayé xa jehe tti nchehe ḫa mé co ndache xa: “¿Aco ndoa tti joindachjenji na chojni de ixin jaha que ixin rrittena na? Ndachjenji na quexén jí cuenta co quejanhi ḫa jaha joexin, ixin jaha isincheha sigue tsetonha ngain ḫana.”

³ Cottimeja tti vaquetonha mé ḫaxaon: “¿Quexén sinttaha jai ixin xinajnina irrochjanaha xa ḫa sinttaha? Janha itsangaha na para sinttaha ḫa

ngataon jngui, co chjana joasoaxin para sanchiagaha. ⁴ Onona quexén sinttaha para rrochonda amigo tti sayehna ngain nchiandoha are janha ixonhi xa rrochonda.” ⁵ Cottimeja tti vaquetonha mé vayé cada chojni que teca ngain xinajní. Ngain tti saho joanchianguihi: “Jaha, quejanhi rrica ngain xinajnina?” ⁶ Co jehe ndačho: “Janha rrica ngain xa cien barril de aceite de oliva.” Jehe tti vaquetonha mé ndačho: “Nttihi jí nota tti jitaxin. Ttinchje co jaca nchechjian iná nota jeho de cincuenta barril.” ⁷ Después, jehe tti vaquetonha mé joanchiangui ngain iná de tti jica ngain xinajni mé: “Co jaha, ¿quejanhi rrica ngain xinajnina?” Co jehe ndačho: “Cien medida de trigo.” Cottimeja jehe tti vaquetonha mé ndačho: “Nttihi jí nota tti jitaxin. Jaha ttinchje co jaca nchechjian iná nota que setaxin jeho ochenta medida.” ⁸ Co jehe xinajni mé joatsoan xa que jehe tti vaquetonha ngain xé xa mé atto listo vehe para xaxaon quexén joinchehe. Ixin chojni que ditticaonha ngain Dios icha daca para nchehe na cosa jianha, co chojni que ditticaon ngain Dios icha yao para nchehe na cosa jian.

⁹ Janha rrittetonha ra, que ttjenguijna ra icha chojni conixin tomia ra para que chojni mé sintte amiga ra. Co are ondatsjexin tomia ra nttihi ngataha nontte sehe quensen sayaha ra nttiha ngajni.

¹⁰ ’Tti chojni que dicao cuidado are tsjeha chonda, cai sicao cuidado are rrochonda tsje; co tti chojni que dicaoha cuidado are tsjeha chonda, cai sicaoha cuidado are rrochonda tsje. ¹¹ Mexinxin si

jaha ra ttjioha ra cuidado ngain tti tomi que jaha ra chonda ra ngataha nontte jianha jihí, ¿quensen rrochonda confianza nganji ra para sayehe ra tti icha rentte que jí ngajni? ¹² Si jaha ra ttjioha ra cuidado ngain cosé iná chojni, Dios rrochjaha ra cosa que jiquininxin ra.

¹³ 'Xonhi ninchehe xá nchao sinchehe xé yó xinajni ngain nacoa tiempo, ixin icha sinao ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai choha sinao ni tomi co sinao ni Dios ngain nacoa tiempo.

¹⁴ Xifariseo anto vaquiaconhe xa tomi, co jehe xa tatettinhi xa cain jihí, co cjoanoa xa Jesús.

¹⁵ Cottimeja Jesús ndačho ngain xa:

—Jaha ra para ngattoxon con chojni ncchehe ra que ixin atto jian ra, pero Dios chonxin ngain ansean ra. Ixin tti tonohe chojni que anto importante cosa que jehe chonda, Dios nccheha caso ngain cosa mé.

Ley que vayé Moisés co tti ttetonha Dios

¹⁶ 'Hasta ngain tiempo que Juan, tti vancheguite chojni, joindache chojni de ixin Dios, ley que vayé Moisés conixin cain tti dindačho cain profeté Dios vechonda joachaxin para vaquetonhe chojni. Desde ngain tiempo mé para ndahi nchenohe na chojni tti jian joajna de ixin quexén ttetonha Dios ngain ansén chojni. Co tsje chojni anto rinao na rrochonda na parte ngain tti ttetonha Dios.

¹⁷ 'Pero masqui jamé icha tanguiha sitján nganji co nontte, que tsoenha inchin jitaxin cainxin ngain ley mé.

*Jesús ndačho de ixin xí que dačhjendehe čhihi
(Mt. 19.1-12; Mr. 10.1-12)*

¹⁸ 'Si ná xí sačhjendehe xa nčhičhihi xa co secao xa iná nčhí, xí mé jianha sinchehe xa ixin xí mé inchin xí que jicao ná nčhí que jeha nčhičhihi xa. Co tti xí que después decao ná nčhí que digačhjendehe nčha xixihi nčha, xí mé cai jianha ncchehe xa ixin jehe inchin xí que joantsjehe iná xí nčhičhihi xa.

Tti xí rico conixin Lázaro

¹⁹ Vehe ná xí rico que vaguengá xa joxon lontto rentte, co cain nchanho vaquin xa jie vandango. ²⁰ Cai vehe ná xí noa que vinhi Lázaro que vechonda xa anto tton ngain cuerpoe xa co tavaguehe xa ngandanguí nchiandoha jehe xirrico mé, ²¹ ixin jehe xinoa jihi joinao xa rrojine xa tti vaxexin vane jehe xirrico mé. Co hasta conia vaconchienhe para vagoni va tton que vechonda xa ngain cuerpoe xa. ²² Ná nchanho tti xinoa mé ndavenhe co ángel de Dios sajoicao para joiguehe ngain tti jí Abraham ngain tti lugar tti ttji cain chojni jian. Cai tti rico mé ndavenhe co cjoavá na. ²³ Co are tti rico mé vetan tangui ngain infierno, jehe tsjehe para noi, co de cjin viconxin Abraham conixin Lázaro. ²⁴ Cottimeja jehe tti rico mé coyao co ndačho: "Padre Abraham, nttatsanha ñao ttiaconoana na janha, co rroanha Lázaro para que sinchetjao masqui jeho con dedoe conixin jinda, co tsí sinchetjao neje na janha, ixin anto tangui tonna ngatte xohi jihi." ²⁵ Pero Abraham ndačho ngain tti rico mé: "Hijo, xaxaon que jaha anto jian joarihi ngoi tiempo que jaha joarichon

ngataha nontte, co Lázaro anto tangui conhe are jehe vechon nttiha. Jai jehe dayé consuelo nttihi co jaha rridetan tangui jaxon. ²⁶ Co cai jí ná tsaga anto nihnga ngayá na janha na co jaha ra. Mexinxin tti chojni que te nttihi que rinao siji para tti te ra, čohoa siji; co tti chojni que te yá čohoa tsí na nttihi tti te janha na.” ²⁷ Cottimeja ndačho tti rico mé: “Mexinxin padre Abraham, nttatsanha ñao que rroanha Lázaro para ngain nchiandoha ndodana ²⁸ tti te naho xanchian xanxí, para que sinchenohe xan quexén sinchehe xan para que jamé jehe xan tsiba xan nttihi ngain lugar jihu tti detan ni tangui.” ²⁹ Pero Abraham ndačho ngain tti rico mé: “Xanchó chonda xan tti xón tti jitaxin tti dicjin Moisés co tti dicjin cain profeta. Si jehe xan sinchehe xan caso tti ndačho xón mé, jehe xan sijiha xa yá tti rrihi jaha.” ³⁰ Jehe tti rico mé ndačho: “Ján, padre Abraham, pero si ná chojni que ondavenhe co rrocjan tsji siquetonhe xan, ján jehe xan tsentoxinhi xan vidé xan.” ³¹ Pero Abraham ndačho ngain: “Si rinaoha xan sinchehe xan caso tti diquetonha Moisés, co tti dindačho cain profeta, cai sitticaonha xan are sicon xan ná tti ondavenhe rroxechon iná.”

17

Tti sinchenchehe ni cosa jianha

(Mt. 18.6-7, 21-22; Mr. 9.42)

¹ Jesús ndačho ngain tti chojni que vacao:

—Ngataha nontte jihu cain tiempo sehe cosa que sinchenchehe chojni tti jianha, pero janto tangui tsonhe tti chojni que sincheyehe iná chojni para sinchehe jamé! ² Icha jian si chojni mé

rroguečhianito ná xočhin ttosin co rroguesingangui ndachaon, que sinchecantjen chojni tehe ngain cosa jianha.³ Ttjiho ra cuidado jaha ra.

'Si ná chojni que ditticaon nganji na janha sinchehe jianha nganji jaha, nchesattehe; co si tsentoxinhi vidé, nchetjañehe.⁴ Masqui chojni mé yáto nttiha sinchehe jianha nganji jaha ngain nacoa nchanho, co yáto nttiha tsí sindattjo: "Irrojanha na sinttaha jamé", jaha chonda que sinchetañehe.

Tti joachaxin que chonda chojni que ditticaon Dios

⁵ Co cain representanté Jesucristo ndačho na ngain Jesús:

—Ttjenguijna ni ra para que sitticanho na icha nganji.

⁶ Cottimeja Jesús ndačho ngain na:

—Si tti ditticaon ra jiexin rroguehe inchin ná tsehe ca dinki mostaza, jaha ra nchao rrondache ra ntasicómoro jiha: "Jaha dačhjenguixin de yá, co sadixenga ngangui ndachaon", co ntá yá rrojinchehe ntta jamé.

Tti jiquininxin nchehe ná tti nchehe xa

⁷ Si ná de jaha ra chonda ra ná tti nchehe xa co ttixin de ngataon jngui después de joigueca yunta o joiquingaria coleco ngoixin nchanho, ¿apoco ndache ra: "xaoci darihi jintte"? ⁸ Nahi, jaha ra ndačhoha ra jamé, sino que ndache ra tti nchehe xa mé: "Nchechjianna tti sine, co darihi listo sicohna cain tti sinaho are janha rrine co rridihi. Cottimeja jaha nchao sintte co sihi."⁹ ¿Co apoco jaha ra ndačho ra ngain tti nchehe xa mé: "Dio

rrotsjengaha hna”? Nahi, ixin jehe jeho joinchehe tti jaha coetonhe jehe. ¹⁰ Jamé jaha ra cai, are tsjexin sinchehe ra cain tti ttetonha Dios, chonda ra que rrondačho ra: “Ján na ninchehe ḥa que ḥonhi rentte, ixin jointtoho na jeho tti jiquininxin sonttoho na.”

Are Jesús joinchexingamehe tte chojni que vintechonda lepra

¹¹ Are Jesús joinchehe sigue viajé para Jerusalén, jehe vatto ngain regioen Samaria co Galilea. ¹² Are joiji na chiaon ngain ná rajna, ngandehe rajna mé te tte xí que teninxin chin lepra co joichoexin xa Jesús ngatja ntiha pero ḥa icjin de jehe tavinttengattjen xa ¹³ co vinttendačho xa sén:

—¡Jesús, Maestro, ttiaconoana ni ra janha na!

¹⁴ Are Jesús vicon cain xí mé jehe ndačho ngain xa:

—Sattji ra co dicjagohe ra xidána que ixonhi chin chonda ra.

Co are satettji xí mé, chинhi xa ndavitján chin.

¹⁵ Cottimeja ná de jehe xa are vicon xa que ixonhi chin jichonda xa, sacjan xa co coyao xa co joinchecoanxini xa Dios. ¹⁶ Co vettoxin nttajochjihí xa ngain Jesús, co visé xa hasta tti ngataha nontte, para que joanjo xa gracias ngain Jesús. Co xí mé Samaria nonttehe xa. ¹⁷ Cottimeja ndačho Jesús:

—¿Apoco jeha tte xí que xingamehe xa de ixin chinhí xa? ¿Quettinó te tti icha xí? ¹⁸ ¿Ajeho xí jíhi que joixin iná nontte tti cjan para joinchecoanxini Dios?

¹⁹ Cottimeja ndačho Jesús ngain xí mé:

—Dingattjen co sattji; jaha ondaxingamaha ixin vitticaonna.

Quehe tsonhe icha saho que tsí tti Xí que joixin de ngajni

(Mt. 24.23-28, 36-41)

20 Cain xifariseo joanchiangui xa ngain Jesús ixin quesa tsí tti ttetonha Dios, co Jesús ndačho ngain xa:

—Are tsí tti ttetonha Dios, mé jeha cosa que nchao sicon ni. **21** čohoa rrondačho ni: “Nttihi jí”, o “Nojiha jí”, ixin tti ttetonha Dios ojí ngayaha ra.

22 Cottimeja ndačho ngain tti chojni que vacao:

—Tsí tiempo are jaha ra sinao ra que janha, tti Xí que joixin de ngajni, sarihi nganji ra masqui nacoa nchanho, pero janha ičohoa sarihi nganji ra. **23** Co masqui rrondattjo ra chojni que nttihi rrihi janha o nojiha rrihi, pero jaha ra ditticaonha ra tti jehe na rrondačho na, ni ttjiha ra tti jehe na rrondačho na. **24** Ixin jañá inchin dicon ni xoí rayo de ná lado hasta iná lado de ngajni, jamé tsonhe ngain mero nchanho que janha, tti Xí que joixin de ngajni, sihi iná. **25** Pero saho chonda que anto tangui tsonna co chojni de ngain tiempo jihí rrondačho na ixin janha xoñhi rentte na. **26** Inchin conhe ngain tiempo que vechon Noé, jamé tsonhe cai are janha, tti Xí que joixin de ngajni, sihi iná.

27 Ngain tiempo que Noé vechon, xoñhi chojni vitticaon ixin toin ndasitján mundo, mexinxin vanchehe na sigue vane na co vaguihi na co vacottehe na co vaganjo na xenhe na xannčhí para vacottehe xan hasta ngain tti nchanho que Noé vixinhi arca co joí jinda para ndagoen cainxin

chojni. ²⁸ Jamé conhe cai ngain tiempoe Lot. Are mé cain chojni vanchehe na sigue vajine na co vaguihi na, vaquehna na co vanchecji na, vanchehe na ḫa ngataon jngui co vanchechjian na nchia. ²⁹ Pero are Lot vačhjexin de ngain ciudad de Sodoma, vingoxin ḫohi co azufre de ngajni, co ndagoen cainxin chojni nttiha. ³⁰ Jamé sinchehe chojni sigue de rrožaxaonha na de ixin Dios are janha, tti Xí que joixin de ngajni, sihi iná.

³¹ 'Ngain nchanho mé si čhonja chojni sintte ngataha nchia noi, co chonda cosé ngaxinhi nchia mé, ni rrochjeha tiempo para sania sicá cosé. Co si čhonja chojni sintte ngataon jngui, rrochjeha na tiempo para rrocjan na nchiandoha na. ³² ḫaxaon ra quehe conhe čihi Lot. ³³ Tti chojni que rinao ḫonhi tsonhe vidé, mé ndasinchetján vidé, pero tti chojni que sinchetján vidé, mé rrochonda iná vida naroa.

³⁴ 'Janha rrindattjo ra, que ngain ttie mé, si yó chojni tejoa ngataha nacoa saon, ná rrochonda iná vida naroaxin co ná nahi. ³⁵ Co ngain rato mé, si yó nčhí tedaho nčha, ná nčha sayá nčha co iná nčha nahi. ³⁶ Co si yó xí tenchehe xa ḫa ngataon jngui, ná xa jáñ sayá xa co iná xa nahi.

³⁷ Are chojni coinhi jihi, joanchiangui na ngain Jesús co ndačho na:

—¿Quettinó tsoenxin cain jihi?

Co Jesús ndačho:

—Tti sarihi janha, nttiha rrožatte chojnina.

18

Ejemploe tti ná nčhiganha co ná xijuez jianha

¹ Jesús ndache tti chojni que vacao ná ejemplo para joinchecoene na ixin chonda na que sinchetsenhe na ñao Dios cain tiempo co chondaha na que soan na desanimado. ² Jehe ndačho ngain na:

—Ngain ná rajna vehe ná xijuez que vechondaha xa respeto ngain Dios, ni ndosenha xa de icha chojni. ³ Ngain rajna mé vehe ná nčhiganha cai que vacji nčha ngain xijuez jihí para vaganchia nčha jie para ixin tti chojni que vaquetocaho nčha. ⁴ Anto sé co xijuez jihí čhoa xa joinchehe xa jie ngain nčhí mé, pero despues ḥaxaon xa: “Masqui janha chondaha respeto ngain Dios ni ndosen-naha de icha chojni, ⁵ pero ixin nčhiganha jihí ncchehe nčha sigue nchemolestá na nčha, janha tsjenguijna nčha para que isincheha nčha sigue tsí nčha co ndatsjehe nčha pacienciana.”

⁶ Co Jesús ndačho:

—Jihí tti ndačho xijuez jianha. ⁷ Co ¿apoco Dios tsjenguijnhaha cain tti chojni que jehe coinchiehe que nchetsenhe na ñao jehe de nchanho co de ttie? ¿Apoco jehe tsončjenhe para tsjenguijna na? ⁸ Janha rrindattjo ra ixin jehe tsončjenha de tsjenguijna cain chojni mé. Pero are janha, tti Xí que joixin de ngajni, sihi iná, ¿āxa sittja chojni que ditticaon na janha nttihi ngataha nontte?

Ejemplo xifariseo co xicobrador de impuesto

⁹ Jesús ndačho iná ejemplo para ixin tti chojni que tonohe ixin jeho tti anto jian, co ḥaxaon na ixin icha chojni ḥonhi rentte. Jesús ndačho:

¹⁰ —Yó xí cjoí xa ngain nihngo icha importante para joinchecoanxini xa Dios. Ná xa fariseo xa,

co iná xa cobrador de impuesto xa. ¹¹ Xifariseo mé tavengattjen xa joinchecoanxinho xa Dios, co ndačho xa janhi: “Oh Dios, janha chjaha gracias ixin janha jeha inchin canxion chojni que jehe na chehe na, co nchehe na icha cosa jianha, co chonda na tsje nchí, co janha ni jeha inchin xi-cobrador de impuesto jihi. ¹² Janha tocjáño na yó ntiha ngain semana, co janha danjo para ixin soixin ná tti ttxin parte de cain tti janha dacha.” ¹³ Pero xicobrador de impuesto vittohe xa cjinxin, co jehe xa ninchin tsinha con xa para rrrotsjehé xa ngajni, sino que xanguí xa tton pechoe xa co ndačho xa: “¡Oh Dios, nttatsanha ñao ttiaconoana na ixin janha anto jianha jointtaha!”

¹⁴ Cottimeja Jesús ndačho:

—Janha rrindattjo ra que are xicobrador de impuesto jihi sacjan xa nchiandoha xa, Dios ojoinchetjañehe xa cain tti jianha que jehe xa joinchehe xa, pero xifariseo nahi. Ixin tti chojni que tonohe que jeho tti icha jian, pero ngain tti nchanho que Dios sinchejuzguehe cain chojni, chojni mé xonhi rentte na, co tti chojni que jai tonohe que jehe xonhi rentte, are mé Dios sinchesayehe chojni mé.

*Jesús joinchenchaon xannchinnchinchjan
(Mt. 19.13-15; Mr. 10.13-16)*

¹⁵ Cai tsje chojni vaquiaho na xannchinnchinchjenhe na ngain Jesús para que vacatte xan, pero are tti chojni que vacao Jesús vicon na jihi, coex-inhi na joinchesattehe na tti chojni que vaquiaho xannchinnchinchjan mé. ¹⁶ Pero Jesús ndache

xannchinnchinchjan mé ixin icha tsonchienhe xan ngain co Jesús ndačho ngain chojni que vacao:

—Tančhjanda ra que xannchinnchinchjan tsí xan nganji na janha, co cayacoenha ra xan ixin tti ttetonha Dios, mé para ixin tti chojni inchin jehe xannchinnchinchjan. ¹⁷ Atto ndoa tti rrindat-tjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoha xan, chojni mé ḵonhi tiempo rrochonda parte ngain tti ttetonha Dios.

*Ná xí rico cjoao xa Jesús
(Mt. 19.16-30; Mr. 10.17-31)*

¹⁸ Ná xí importante para ngain chojni judío joanchiangui xa ngain Jesús co ndačho xa:

—Maestro, soixin que anto jian, ¿quehe icha sinttaha janha para rrochonda iná vida naroaxin que ḵonhi tiempo tsjexin?

¹⁹ Jesús ndačho ngain xa:

—¿Quedonda ndačho jaha que janha jian na? ḵonhi iná tti jian, jeho nacoaxinxon, co mé Dios.

²⁰ Jaha onoha cain mandamiento de Dios que ndačho: “Ncheyeha čhihi iná chojni, dantsjeha vidé iná chojni, tteha cosé iná chojni, nichjaha cosa ndoaha de iná chojni, co ttjih respeto ngain ndodá co ngain janná.”

²¹ Jehe tti xí mé ndačho:

—Cain yá janha rrinttaha desde are ḥa nchín na.

²² Are coinhi Jesús jihi, jehe ndačho ngain xa:

—Jaha ḥa nchetján sinchehe nacoa cosa. Nchecji cain tti chonda co tonchjeyehe chojni noa tomi; jamé ngajni jaha rrochonda cosa icha rentte. Cottimeja sihi para sacjin na tti janha sacji.

23 Pero are xí mé coinhi xa jihí, anto vechín xa ixin anto rico vehe xa. **24** Are vicon Jesúx ixin anto vechín xa jehe ndačho:

—¡Atto tangui para que chojni rico rrochonda na parte ngain tti ttetonha Dios! **25** Icha tanguiha para ixin ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti ttetonha Dios.

26 Co cain tti nicoinhi jihí ndačho na:

—Mexinxin, ¿quensen nchao rrochonda iná vida naroaxin remé?

27 Jesúx ndačho ngain na:

—Tti čohoa sinchehe chojni, Dios nchao sinchehe.

28 Pedro ndačho ngain Jesúx:

—Janha na cointtoa na cain tti joichonda na para que jai čhjin na soixin.

29 Cottimeja Jesúx ndačho:

—Atto ndoa tti rrindattjo ra que quexeho chojni que ttinttohe nchiandoha, o ndodé, o janné, o xanchó, o čhihi, o xenhe para sindache icha chojni de ixin quexén ttetonha Dios ngain ansén ni, **30** chojni mé ngataha nontte nttihi sayé na anto icha tsje cosa, co ngain mundo que tsí sayé na vida naroaxin que xonhi tiempo tsjexin.

*Jesúx cjan ndačho iná ixin jehe ndasenhe
(Mt. 20.17-19; Mr. 10.32-34)*

31 Jesúx joantsjenda tti tteyó chojni que vacao co ndačho ngain na:

—Jai jaha ra onoha ra que satettjin na para Jerusalén. Nttiha tti tsoenxin cainxin tti dindačho

cain profeta de ixin janha, tti Xí que joixin de ngajni. ³² Chojni nttiha sanjo na na janha ngain chojni que jeha judío co jehe na tsjanoa na na, co feo rronichja na de ixin janha, co tsjatjo na na nttatté na. ³³ Sicaon na janha co después nasoenxon na na. Pero ngain nchanho ninxin janha rroxechon na.

³⁴ Jehe tti tteyó chojni que vacao Jesús xonhi coinxin na de ixin jihí, ni venoeha na de ixin tti ndačho Jesús, ixin para ixin jehe na jihí ná cosa que čohoa coinxin na.

Are Jesús joinchexingamehe ná tti xí que čohoa vaguicon de ngain Jericó

(Mt. 20.29-34; Mr. 10.46-52)

³⁵ Are Jesús conixin tti chojni que vacao ochiaon tediji na ciudad de Jericó, ná tti xí que čohoa vaguicon tají ngandehe nttiha jidanchiagaha.

³⁶ Are jehe xa coinhi xa que nttiha tedatto tsje chojni, joanchiangui xa ixin quehe conhe. ³⁷ Ichá chojni ndache xa na que ixin Jesús de Nazaret jidatto nonttiha. ³⁸ Cottimeja jehe xa ndačho xa sén:

—¡Jesús, tti razé David, co tti chonda joachaxin que vechonda rey David, ttiaconoana na janha!

³⁹ Tti chojni que tetaon nttiha joinchesattehe xa para que rrotencoa xa, pero jehe xa ndačho xa ichá sén:

—¡Soixin, tti razé David, co tti chonda joachaxin que vechonda rey David, ttiaconoana na janha!

⁴⁰ Cottimeja Jesús tavengattjen co coetonha para que joiaho na ngain Jesús jehe tti vaguiconha mé. Co are ojoí ngaca Jesús, jehe Jesús joanchiangui ngain jehe tti vaguiconha mé co ndačho:

41 —¿Quehe rinao sinttaha janha nganji?

Jehe tti vaguiconha mé ndačho:

—Janha rinaho que nchao sicon.

42 Jesús ndačho:

—Ján, jaha onchao dicon! Jaha oxingamaha ixin vitticaon na janha.

43 Ngain rato mé jehe tti vaguiconha mé onchao vicon, co sarroé tti sacjoi Jesús, co joinchecoanx-inhi Dios. Co cain chojni que vicon jihi cai joinchecoanxinho na Dios.

19

Are Jesús vetan Zaqueo

1 Cottimeja Jesús conixin chojni que vacao ojoigaha na ciudad de Jericó co vattogaha na ciudad mé. **2** Co nttiha vehe ná xí rico vinihi Zaqueo. Xí mé vaquetonha ngain cain xicobrador de impuesto, **3** co jehe Zaqueo joinao joatsoan Jesús. Pero čohoa vicon Zaqueo Jesús ixin anto tsje chojni tettji ngaca Jesús co Zaqueo atto nchín vehe.

4 Cottimeja jehe Zaqueo coinga vitaon nttiha, co para que nchao vicon Jesús, jehe Zaqueo coani ngagaha ná nttá dinki sicómoro chiaon de tti vatto Jesús. **5** Are Jesús vatto nonttiha, jehe tsjehe para noi tti jí Zaqueo co ndačho:

—Zaqueo, jaicoa danianxin de yá ixin jai janha chonda que sittona nchiandoi.

6 Cottimeja Zaqueo jaicoa vanianxin de nttiha co anto ché ixin Jesús cjoí nchiandoha. **7** Are icha chojni vicon na jihi, cain na coexinhi na nichja na feo de ixin Jesús, co ndačho na que ixin Jesús cjoí joiguittohe ngain nchiandoha ná xí que jinchehe

jianha. ⁸ Cottimeja Zaqueo vingattjen co ndaächo ngain Jesǖs:

—Tsjexinxin, soixin, janha rrochjaha chojni noa ngosinenxin de cainxin cosa que janha rrichonda. Co si chonja chojni jointtayá para coehe tomí, janha tsoncjañá chojni mé nó nttiha icha tsje que tti janha coehe.

⁹ Jesǖs ndaächo ngain Zaqueo:

—Jai Dios rroanha iná vida naroa ngain xí de nchia jihi. Co jehe xa razé Abraham xa cai. ¹⁰ Ixin janha, tti Xí que joixin de ngajni, joihi para joicjé co joichjaha vida naroa tti chojni que ondavitján de ngain cosa jianha.

Ejemple tti tte tomi que anto rentte

¹¹ Are chojni xá tettinhi na Jesǖs jindaächo cain cosa jihi, jehe ndaächo ná ejemplo ngain na ixin jehe ochiaon jidiji ngain Jerusalén, co jehe na xaxaon na que are Jesǖs sijí nttiha, Dios rroquex-inhi rroquetonha nttihi ngataha nontte de ixin jehe Jesǖs. ¹² Mexinxin jehe ndaächo ngain na:

—Vehe ná xí importante que sacjoi xa cjin ngain iná nación para joigayé xa joachaxin de sehe xa rey ngain nonttehe xa, co después cjan xa ngain nonttehe xa. ¹³ Saho de sacjoixin xa de ngain nonttehe xa jehe xa vayé xa tte de ninchehe xé xa para joanjo xa ngain cada na naná tomi que anto rentte, co ndaächo xa ngain na: “Nchehe ra negocio conixin tomi jihi hasta que janha rrocjan na sihi.” ¹⁴ Pero chojni de ngain nonttehe xa nttiha vacoñao na ngain xa, co rroanha na chojni para joicao na joajna jihi: “Rinaoha na que xí jihi sehe xa rey para ixin janha na.” ¹⁵ Pero

jehe xa vayé xa joachaxin de vehe xa rey, co cjan xa para nonttehe xa. Co are jehe xa ongain nonttehe xa, vayé xa tti tte chojni que joinchegayé xa tomi para conohe xa quejanhi joacha na cada na. ¹⁶ Tti saho conchienhe co ndačho: “Tti ná tomia que soixin chjana joacha tomi, itte tomi.” ¹⁷ Jehe rey mé ndačho: “Atto nchao jí; jaha atto jian ná ninchehe ḫa. Jaha cjoj jian ninchehe ḫa de ngain tti tomi que chjaha masqui tsjeha, mexinxin jai janha rrochjaha joachaxin de tsetonhe tte rajna.” ¹⁸ Cottimeja conchienhe iná co ndačho: “Tti ná tomia que soixin chjana joacha tomi, inaho tomi.” ¹⁹ Cai ngain chojni jihi ndačho rey mé: “Jaha tsetonhe naho rajna.” ²⁰ Cottimeja conchienhe iná co ndačho: “Nttihi jí tomia que chjana soixin. Janha coenchjinha tomi ngá ná paníto ²¹ ixin janha ḫagonha soixin ixin soixin ná xí que atto soji de ngain ansén, que dantsjehe chojni tti soixin danjoha, co jamé tsinhi cosecha de tti soixin ttengaha.” ²² Cottimeja rey mé ndačho: “Jaha jianha ninchehe ḫa ixin jaho ndačho que ixin janha soji ansenna. Si onoha que janha soji na de ngain ansenna, co ixin dantsjá chojni tti janha danjoha co jamé janha ttjejo cosecha de tti janha ttengaha, ²³ mexinxin ¿quedonda joicanha jaha tomina ngain ná banco para que janha rrogayá tomina conixin tti rrogacha tomi are janha rrocjan na nchiania?” ²⁴ Co ndačho rey mé ngain tti chojni que te ntiha: “Dantsjehe ra xa tomi co danjo ra tomi ngain xí que chonda tte tomi.” ²⁵ Co jehe na ndačho na: “Pero chojni mé ochonda tti tte tomi.” ²⁶ Rey mé ndačho: “Janha rrondattjo ra que tti chojni que ochonda, sayé icha, pero tti

chojni que xonhi chonda sachjeha hasta tti nchion que chonda. ²⁷ Co cain tti chojni que ningaconna, que mé joinaoha na para que janha rrogarihi rey ngain na, sicohna ra na ntihi co nadoenxon ra na ngattoxon con janha.”

*Are Jesús joigaha ciudad de Jerusalén
(Mt. 21.1-11; Mr. 11.1-11; Jn. 12.12-19)*

²⁸ Después de ndačho Jesús cain jihi, jehe joinchehe sigue sacjoi para Jerusalén. ²⁹ Are ochian joiji na ngain rajna Betfagé co Betania, chiaon ngain tti jnanchjan que dinki Nttaolivo, Jesús rroanha yó de tti chojni que vacao, ³⁰ co jehe ndačho ngain tti yó chojni mé:

—Ttji ra ngain rajnanchjan que jí chiaon jiha, co are saso ra ntiha sinchí ra ná colochochjan jichoa va ntiha que xá xonhi chojni diguinttetaha va. Tonxindanguehe ra va co sicó ra va. ³¹ Co si chonja chojni sanchianguiha ra ixin quedonda tetonxindanguehe ra va, jaha ra ndačho ra que janha, tti chonda cain joachaxin, rrogondana va.

³² Jamé, savinttecji cayoi chojni mé, co jamé conhe inchin ndačho Jesús. ³³ Co are otetonxindanguehe na colochochjan mé, nicolochuhe joanchiangui na co ndačho na:

—¿Quedonda tetonxindanguehe ra colochochjan yá?

³⁴ Tti yó chojni mé ndačho na:

—Ixín ximaestrona na sondehe xa va.

³⁵ Jamé sajoicao na va hasta tti ngain Jesús, co ntiha jehe na cjoajinhi na va tti manta que tetsá na co joinchetaha na Jesús jehe colochochjan mé.

³⁶ Are Jesús conchian para ngagaha ciudad de

Jerusalén, chojni coingo na tti manta que tetsá na para coingachjetaha colochochjan mé. ³⁷ Co are ochian tediji na para sania na tti jnanchjan de Ntaolivo, cain chojni que terroé nttiha que vitticaon na Jesús, coexinhi na coyao na ixin anto ché na co joinchecoanxinhi na Dios de ixin anto tsje milagro vicon na joinchehe Jesús. ³⁸ Co ndačho na:

—¡Anto jian tti Rey que joí conixin nombré Dios!
¡Anto čhjoin tonohe cain ángel ngajni! ¡Gloria ngain Dios!

³⁹ Cottimeja canxion xifariseo que te nttiha ngayé chojni mé vinttendačho xa ngain Jesús:

—Maestro, nchesattehe chojnia tehe.

⁴⁰ Pero Jesús ndačho ngain xa:

—Janha rrondattjo ra que si chojni tehe rrotencoña na, xo tsoyao xo.

⁴¹ Are Jesús joiji chiaon de Jerusalén, are jehe vicon ciudad mé jehe tsjangaxin ciudad mé, ⁴² co ndačho ngain:

—¡Si chojni de nganji jaha rroquinxin na jai jehe tti joichjaha na tti čhjoin de ngain ansén na! Pero jai, mé tavema, co čhoha tsinxin na. ⁴³ Tsí nchanho anto tangui para ixin chojnia. Are mé chojni que ningaconhe na sinchechjian na ttjari-oho ngoixin ngandanji jaha, ciudad Jerusalén, co ngoixin ngandanji jaha sinttendanji na, co cain lado sixinttexin na ngain chojnia para soen na na. ⁴⁴ Co chojni que ningaconhe chojnia sacha ngain chojnia. Nasoenxon na cain chojni que te nganji, co tsinttoeha na nganji jaha ni ná xo ngataha iná xo. Jamé tsonhe ixin chojnia joincheha na caso tti rato que Dios joí joitsjehe na.

*Are Jesús joincheroa nihngo icha importante
(Mt. 21.12-17; Mr. 11.15-19; Jn. 2.13-22)*

⁴⁵ Cottimeja joixinhi Jesús nihngo icha importante co venguixin de ntiha cain chojni que tenchecji co tettehna. ⁴⁶ Co ndačho ngain na:

—Ngain tti jitaxin Palabré Dios ndačho: “Nchiania para sincheocoanxinhi na Dios.” Pero jaha ra ndadinchechjian ra nchia cueva tti ḫatte tti chehe.

⁴⁷ Cain nchanho que Jesús vehe ngain Jerusalén, ngaxinhi nihngo mé vanchecoenxin chojni de ixin Dios. Pero cain xidána que vaquetonha ngain icha xidána, co cain ximaestroe ley, co cain xivaquetonha ngain ciudad mé cjoé xa quexén sinchehe xa para nasoenxon xa Jesús. ⁴⁸ Pero čoha joinchehe xa jamé ixin cainxin chojni tatettinhi na tti jinichja Jesús.

20

*Tti joachaxin que chonda Jesús
(Mt. 21.23-27; Mr. 11.27-33)*

¹ Ná nchanho Jesús tají ngaxinhi nihngo icha importante para jinchecoenhe chojni de ixin Dios, co jindache na tti jian joajna are vintteguiji canxion xidána que vaquetonha ngain icha xidána, canxion ximaestroe ley, co canxion xí que chonda joachaxin ngain nihngo mé. ² Co vinttendačho xa ngain Jesús:

—Ndachjenji ni ra quehe joachaxin chonda jaha para nchehe cain cosa jihi. ¿Quensen chjá joachaxin jihi?

³ Cottimeja ndačho Jesús ngain xa:

—Janha cai sanchianguiba ra ná cosa. Co rrondachjenji ni ra: ⁴ ¿Quensen rroanha Juan para joincheguite chojni? ¿A Dios o ani chojni?

⁵ Pero coexinhi xa joanchianguibi chó xa condačho xa:

—¿Quehe rrondačho na? Si rrondačho na que Dios tti rroanha Juan, jehe rrondattjo na: “¿Quedonda vitticaonha ra remé?” ⁶ Co si rrondačho na que chojni tti rroanha Juan, cainxin chojni nesoenxon na ján na de ixin xo ixin jehe na chonda na seguro que Juan vanichja joajna que vagayé de ngain Dios.

⁷ Co jehe xa vinttendačho xa ixin noeha xa quensen rroanha Juan para joincheguite chojni.

⁸ Cottimeja ndačho Jesús ngain xa:

—Cai janha rrondattjoha ra quehe joachaxin nttaxin janha cain cosa jihi.

Ejemplode ninchehe xa jianha

(Mt. 21.33-44; Mr. 12.1-11)

⁹ Cottimeja coexinhi Jesús nichjé chojni, condačho ngain na ejemplo jihi:

—Vehe ná xí que cjoenga xa ná jngui de nttauva co después joanjo xa ntattochjoin media ngain canxion tti ncuhehe xbco jehe xa sacjoixin xa de ntiha para tsje tiempo. ¹⁰ Co are ojoí tiempo de cosecha, jehe xa rroanha xa ná tti ncuhehe xbco para joiganchia tti parte de cosecha que jiquininxin sayé tti xinajni mé. Pero jehe tti nicoá ntattochjoin media mé coaxin na tti ncuhehe xbco mé ntta co vengui na co xbónhi chjé na. ¹¹ Cottimeja xinajni mé rroanha xa iná tti ncuhehe xbco pero cai tti nicoá ntattochjoin media nichja na feo ngain tti

nchehe ḥa mé co coaxin na ntá co vengui na co ḥonhi chjé na. ¹² Xinajni mé cjan xa rroanha xa iná tti nchehe ḥa, pero cai joinchenihi na tti nchehe ḥa mé co vengui na co ḥonhi chjé na.

¹³ Cottimeja xinajni mé ndačho xa: “¿Quehe sint-taha? Janha rrorroanha tti xanhna que janha anto rinaho. Are jehe na sicon na xanhna jihí puede rrochonda na respeto ngain xan.” ¹⁴ Pero are jehe na vicon na xan, ndache chó na: “Xan jihí xan sayé ngoi nontte jihí inchin herencia, mexinxin nasoenxon na xan para que jána sittoá na cain.” ¹⁵ Cottimeja joantsjegaxin na xan de nttauva mé co nagoenxon na xan.

Cottimeja joanchiangui Jesús ngain chojni co ndačho:

—¿Quehe sinchehe xinajni mé ngain tti chojni que vittoehe jnguihi xa? ¹⁶ Jehe xa tsí xa co nasoenxon xa chojni mé co sanjo xa jnguihi xa ngain ojé chojni.

Are vinttequinhi chojni jihí, vinttendačho na:

—¡Que Dios sanjoha joachaxin yá!

¹⁷ Pero Jesús tsjehe ngain jehe na co ndačho:

—Mexinxin, ¿quehe rročho tti jitaxin ngain Palabré Dios? Nttiha ndačho:

Tti ḥo que joinchegondaha xittette nchia, ḥo mé tti ḥo joiguehe icha importante.

¹⁸ Quexeho chojni que tsonttenguixin ḥo jihí, tsonchjian pedazo cuerpoe na. Co si ḥo jihí setsinga ḥo ngataha ná chojni, chojni mé rrocjan cuerpoe polvo.

*Tti rroxenga hna ngain impuesto
(Mt. 21.45-46; 22.15-22; Mr. 12.12-17)*

19 Cainxin xidána que vaquetonha ngain icha xidána co ximaestroe ley nttiha joinao xa rrotse xa Jesús ngain rato mé ixin coinxin xa que ixin ejemplo jiji rročho de ixin jehe xa. Pero ḫagoen xa cain chojni. **20** Mexinxin rroanha xa canxion xí que tsaya ngain Jesús co xí mé vanchehe xa que ixin jehe xa anto jian xa para que rrojinchenichja xa Jesús ná cosa nchaoha para nchao rrocjanguihu xa Jesús ngain xigobernador. **21** Mexinxin joanchianguai xa ngain Jesús co ndačho xa:

—Maestro, janha na nona na que soixin nichja co nchecoenhe chojni tti ndoa, co ncheha juzgado chojni rico ojé que chojni noa, sino que soixin ndoa nchecoenhe na de ixin tti rinao Dios. **22** Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

23 Pero Jesús oconohe de tti jianha que jehe xa te᷑axaon xa de ixin jehe, co jehe ndačho ngain xa:

—¿Quedonda rinao ra sincheyana ni ra?

24 Tjagohna ni ra ná tomi. ¿Quensen con jinganito jiji, co quensen nombré jitaxin jiji?

Jehe xa vinttendačho xa:

—Con xiemperador co nombré xa.

25 Cottimeja ndačho Jesús ngain xa:

—Mexinxin chjehe ra xiemperador tti jiquininxin xa, co danjo ra ngain Dios tti jiquininxin sayé jehe.

26 Co jamé čohoa joinchenichja xa Jesús ni ná cosa nchaoha; sino que vinttegoan xa admirado de ixin tti ndačho jehe co jamé ndavinttetencoa xa.

*Caxxion chojni joanchiangui quexén rroxechon ni
(Mt. 22.23-33; Mr. 12.18-27)*

²⁷ Después de cain jihi canxion xisaduceo vintecji xa ngain Jesús. Xisaduceo vaguitticaon xa que chojni que ndadenhe irroxechonha na; mexinxin ndačho xa ngain Jesús:

²⁸ —Maestro, ley que vayé Moisés jitaxin que si ná xí ndadenhe xa co sitiohe čhihi xa co si ḵonhi chjan joichonda na, xichó xindavenhe chonda xa que secao xa jehe nčhiganha mé co rrochonda na chjan para que chjan mé sehe xan inchin xenhe tti ndavenhe. ²⁹ Nchao remé; vintte yáto xí, chó xa. Xisaho vecao xa nčhičhihi xa pero ndavenhe xa co ḵonhi chjan cointtohe xa. ³⁰ Xiyoxin vecao xa jehe nčhiganha mé, pero cai ndavenhe xa co ḵonhi chjan cointtohe xa ngain nčhiganha mé. ³¹ Cottimeja xininxin vecao xa jehe nčhiganha mé pero ḵajeho jamé conhe xa. Co jamé hasta tti yatoxin xa ndavenhe xa cai co ḵonhi chjan cointtohe xa ngain nčhiganha mé. ³² Co después ndavenhe nčhiganha mé cai. ³³ Mexinxin are rroxechon na, ¿Quexehe de tti yáto xí mé sehe mero xixihi jehe nčhí mé, ixin cain xa vinttecaos xa nčhí mé?

³⁴ Cottimeja ndačho Jesús ngain xa:

—Ngain mundo jihi, xí co nčhí tottehe na. ³⁵ Pero tti chojni que tequininxin tsji para ngajni co rroxechonxin na de tti ndavenhe na, nttiha ni tsotteha na, ni sanjoha na xenhe na para tsottehe xan ³⁶ ixin nttiha ičhoha ndasenhe na. Are mé sintte na inchin ángel de Dios co sintte na xenhe Dios ixin Dios tti sinchexechon na. ³⁷ Hasta ngain tti parte que coentaxin Moisés ixin vicon ḵohi

ngagaha canchaha, jehe mismo jointtanoa na que ixin chojni que ndadenhe rroxechon na. Nttiha ndačho que Dios, Dios de Abraham, co Isaac, co Jacob. ³⁸ Pero Dios jeha Dios de nindadiguenhe, sino que Dios de tti nitechon. Co mé rročho que para ixin Dios cain chojni techon na.

³⁹ Cottimeja cainxin ximaestroe ley vintten-dačho xa:

—Nchao ndačho, Maestro.

⁴⁰ Co icjanha xa joanchiangui xa icha ngain Jesús.

Tti dindačho David de ixin Jesucristo

(Mt. 22.41-46; Mr. 12.35-37)

⁴¹ Jesús ndačho ngain na:

—¿Quexén ndačhoxin chojni que ixin Cristo ná xanntí David? ⁴² Ixin David mismo dindačho janhi ngain libroe Salmo:

Tti Ttetonha cainxin cosa ndačho ngain tti Tte-tonna janha:

“Darihi ngain lado jian na,

⁴³ hasta que janha sinttagacha jaha de ngain cain tti ningaconha.”

⁴⁴ ¿Pero quexén que Cristo jehe ná xanntí David, si David mismo ndačho ixin Cristo tti Ttetonha ngain jehe?

Are Jesús joinchesattehe ximaestroe ley

(Mt. 23.1-36; Mr. 12.38-40; Lc. 11.37-54)

⁴⁵ Cainxin chojni nttiha tatettinki na are Jesús ndačho janhi ngain tti chojni que vacao:

⁴⁶ —Ttjiho ra cuidado de ncheha ra inchin nchehe ximaestroe ley ixin jehe xa nchečoxinhi xa čhji xa conixin lontto icha jinjini, co rinao

xa que chojni sanjo na joajna ngain xa conixin anto tsje respeto are ngain ndásin, co are ngaxinhi nihngo jehe xa ttjé xa tti ntaxintaon icha importante para dinttetaha xa, co are ttji xa dijine xa jehe xa rinao xa tti icha jian lugar ngain mesa.

⁴⁷ Cai dantsjehe xa nčhiganha nchiandoha nčha ixin ittixinha nčha ttjenga nčha hna contribución, co para xonhi chojni rrožaxaon tti jianha que ncchehe xa, jehe xa ncocoanxini xa Dios anto sé. Cain jehe xa xisayé icha soji castigo.

21

*Tomi que joanjo ná nčhiganha noa
(Mr. 12.41-44)*

¹ Ngain nihngo icha importante nttiha vicon Jesús quexén tettinttohe cain chojni rico tomi ngá cajé alcancia. ² Cai vicon Jesús ná nčhiganha noa que vancá nčha nttiha yó centavochjan. ³ Co ndačho Jesús:

—Janha ndoa tti rrondattjo ra que nčhiganha noa jihijoanjo nčha icha tsje que cain chojni. ⁴ Ixin cain chojni danjo na tti xehe na, pero jehe nčha, masqui noa nčha, joanjo nčha cainxin tomi que jehe nčha jichonda nčha.

*Jesús ndačho que rroxantte nihngo icha importante
(Mt. 24.1-2; Mr. 13.1-2)*

⁵ Canxion de tti chojni que vacao Jesús tetjao na de ixin nihngo icha importante co ixin anto čhjoin xo que diconchjian nihngo mé co de icha cosa que chojni diganjo na para ixin nihngo. Cottimeja Jesús ndačho ngain na:

6 —Tsí nchanho que cain tti jaha ra tedicon ra yá rroxantte, co ni ná xo sittoeha ngataha iná xo.

*Tti tsonhe icha saho que mundo ndatsjexin
(Mt. 24.3-28; Mr. 13.3-23)*

7 Cottimeja joanchianguihi na Jesús co ndačho na:

—Maestro, ¿quesa siconhe jihi? ¿Quehe señal rroñago ixin cain cosa jihi osiconhe?

8 Jesús ndačho:

—Ttjiho ra cuidado que xonhi chojni sinttayaha ra. Ixin atto tsje chojni tsí co sinchegonda na nombrera rrondačho na: “Janha tti Cristo na”, co “Jai mero tiempo que mundo ndatsjexin.” Pero jaha ra ditticaonha ra mé. **9** Co are tsinhi ra ixin jí guerra co ixin tettetocaho chojni gobiernoe na, jaha ra xeonha ra ixin jihi chonda que tsonhe saho, pero xa jeha tiempo para ondatsjexin mundo.

10 Jesús joinchehe sigue ndačho ngain na:

—Ná nación tsetocaho iná nación, co ná región tsetocaho iná región. **11** Tsje parte tsingui nontte anto soji, co sehe jintta co chin ngain tsje parte, co ngajni sicon ni cosa que sincheñaon ni, co anto tsje señal importante sicon ni.

12’Pero saho de cain jihi, chojni rrotse ra na jaha ra co feo sinchehe na nganji ra. Tsjiho ra na para que soan ra juzgado ngain nihngo, co tsiaxinha ra na ngain cárcel co tsjiho ra na ngain rey co ngain xigobernador de ixin causananxin janha. **13** Cain jihi rrochondaxin ra oportunidad de rronichja ra de ixin janha. **14** Co are tsonha ra mé, xaxaonha ra icha saho de ixin quexén rrondačho ra ngain cain tti tsjiho ra na. **15** Ixin janha tti rrochjaha

ra palabra jian que rrondačho ra co sinttanoha ra jian, para que ni ná chojni que ningaconha ra tsixinha na nganji ra, sino que jehe na sitticaon na tti jaha ra rrondačho ra. ¹⁶ Pero jaha ra hasta jeho ndodá ra, xanchó ra, nipayentea ra, co xiamigoa ra; chojni mé sinttachianha ra na ngá rá niningaconha ra. Co nasoenxon na čhonja de jaha ra, ¹⁷ co ngoixin mundo rroningaconha ra chojni de ixin causananxin janha. ¹⁸ Pero masqui jamé, sitjanha ni ná xajá ra ixin vidá ra sehe seguro ngain Dios. ¹⁹ Si cainxin tiempo jaha ra seguro sitticaon ni ra, rrochonda ra iná vida naroaxin.

²⁰ Are sicon ra que ciudad de Jerusalén ngoixin sixindanji xisoldado, jaha ra onoha ra que are mé orroxantte. ²¹ Mexinxin are mé tti chojni que te Judea rrochonda na que satsinga na para ngagaha jna. Co tti nite ngain ciudad de Jerusalén rrochonda na que satsingaxin na de nttiha. Co tti nisintte ngataon jngui are mé, rrochjeha na tiempo para rrocjan na ngain ciudad mé. ²² Ixin nchanho mé nchanho de castigo, are tsonhe cain tti jitaxin ngain Palabré Dios. ²³ ¡Anto tangui para ixin tti nchí que sintteyá chjan ngain nchanho mé o tti rrochonda chjan que xá tetai xan! Ixin are mé atto tangui tsonhe chojni nttihi ngataha nontte, co mé ná castigo anto soji para ixin nación Israel jiji. ²⁴ Are mé čhonja chojni nasoenxon na ngain guerra co icha de chojni mé rrotse na na co tsia na na co jamé sacao na na ngoixin región. Co chojni de iná nación sinchehe na inchin sinoa na ngain ciudad de Jerusalén hasta que tsjexin tti tiempo que sayé na joachaxin de sinchehe na jamé.

*Quexén tsí tti Xí que joixin de ngajni
(Mt. 24.29-35, 42-44; Mr. 13.24-37)*

²⁵ 'Cottimeja sehe señal ngain nchanho co ngain conittjao co ngain conotse. Co nttihi ngataha nontte cainxin chojni rroxaon na ixin anto soji saxoin ndachaon ixin anto soji rrocjamanguiataon chó nda. ²⁶ Chojni ndatsonttiehe na de ixin joāaon are rroxaon na ixin quehe siconhe ngain mundo jihí, ixin hasta cainxin cosa que jí ngajni rroxa. ²⁷ Cottimeja sicon na na janha, tti Xí que joixin de ngajni, sihi are mé ngacjan ná ttroi conixin joachaxin co gloria. ²⁸ Are tsexinhi tsonhe cain cosa jihí, jaha ra xo xa sinttechon ra, doan ra animado co tsjehe ra para ngajni ixin are mé janha atto toin sihi para tsjenguijna ra co isetanha ra cain cosa tangui mé.

²⁹ Cai ndačho Jesús ngain na ejemplo jihí:

—Xaxaon ra ngain nttahigo, o quexeho nttá. ³⁰ Are sicon ra que očhinhí cachjenhe nttá, jaha ra mismo onoha ra que ojoiconchian tiempoe čhin. ³¹ Jamé cai are sicon ra que tsonhe cain cosa jihí, jaha ra onoha ra que osiconchian tiempo are siquetonha Dios nttihi ngataha nontte.

³² 'Janha ndoa tti rrindattjo ra que cain jihí tsonhe saho que ndasenhe chojni de ngain generación jihí. ³³ Masqui ngajni co nontte ndatsjexin, pero tti janha ndačjan chonda que tsonhe.

³⁴ 'Ttjiho ra cuidado que tsosojiha ansean ra de ixin vicio, inchin tti rrocoan ra co cain problema de ngain vida jihí, para que ngain nchanho mé rroxaonha ra ³⁵ inchin are coxigo xaon va are

ngain trampa que anto daca dijé, ixin jañá tsí nchanho mé ngain cainxin chojni ngoixin mundo.

³⁶ Mexinxin jaha ra dintte ra listo, co cainxin tiempo nchecoanxinho ra Dios para que xonhi tsonha ra de ngain cain cosa que siconhe, co para que are mé nchao tsonchienhe ra nganji na janha, tti Xí que joixin de ngajni.

³⁷ Ngain tiempo jihí, are nchanho, Jesús vanchecoenhe chojni de ixin Dios ngain nihngo icha importante, co are ttie jehe savacji para vaguittohe ngagaha tti jnanchjan que dinhi Nttaolivo. ³⁸ Co cada nchanho ndoyo vaconchienhe chojni ngain nihngo mé para vaquinhi na tti vandačho Jesús.

22

Are cjoao na quexén sinchehe na para rrotse na Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Co are Jesús xa tají nttiha ngain Jerusalén, ochiaon joí tti quiai que jine na niottja que chondaha levadura, co mé tti quiai que dinhi pascua. ² Ngain tiempo mé merocoa cain chojni anto vanchešoxinho na tti vandačho Jesús. Mexinxin cain xidána que vaquetonha ngain icha xidána, co cain ximaestroe ley vaxaon xa ngain cain chojni mé para que jehe xa nasoenxon xa Jesús; mexinxin jehe xa vacjé xa quexén sinchehe xa para tsjaya xa co chojni tsoñaoha na.

³ Cottimeja Satanás joixinhi ngain ansén Judas Iscariote, jehe ná de tti tteyó chojni que vacao Jesús. ⁴ Co Judas jihí cjoí joitsjehe xidána que

vaquetonha ngain icha xidána, co xipolicié nihngo icha importante, para cjoao xa de ixin quexén jehe tsjago ttinó jí Jesús para sitse xa. ⁵ Cain jehe xa anto vintteché xa co ndačho xa ixin sanjo xa tomi ngain jehe Judas. ⁶ Co Judas vittoexin co ocoexinhi ḫaxaon ixin quexén sinchehe para que sinchechienhe Jesús ngá rá xa are ḫonhi chojni sintte ngain Jesús.

*Are joinecaho Jesús tti tteyó chojni que vacao
(Mt. 26.17-29; Mr. 14.12-25; Jn. 13.21-30; 1 Co.
11.23-26)*

⁷ Are joí tti nchanho de quiai que dinki pascua are vagoen na coleco para vaganjo na ngain Dios.

⁸ Ngain nchanho mé Jesús rroanha Pedro co Juan co jehe ndačho ngain na:

—Ttji ra dinchechjian ra tti sontte na ngain quiai pascua jihi.

⁹ Jehe na ndačho na ngain Jesús:

—¿Ttinó rinao sinttachjianxin na?

¹⁰ Jesús ndačho ngain na:

—Are jaha ra sigaha ra ciudad jihi, setan ra ná xí que jidicao ná nchíxa de jinda. Rroehe ra xí mé hasta tti ngain nchia que jehe xa sixinhi xa ¹¹ co ndache ra tti nchiandoha ntiha: “Ximaestro ndačho xa nganji: ¿Quettinó jí tti cuarto que jehe xa sinenxin xa ngain quiai pascua conixin tti tteyó chojni que ḫicau xa? ¹² Cottimeja jehe tti ndoha mé tsjagoha ra ná cuarto jie ngain piso yoxin que ojí listo. Ntiha nchechjianxin ra tti sontte na.

¹³ Cayoi chojni mé savinttecji na co vittja na cain inchin ndačho Jesús. Co ntiha joinchechjianxin na tti joinecaho na Jesús ngain quiai pascua.

¹⁴ Are ovittja hora para joine na, Jesús conixin tti tteyó representanté vintte na ngain mesa.

¹⁵ Cottimeja Jesús ndačho ngain na:

—Janha anto joinaho joine conixin jaha ra ngain quiai pascua jihí saho que janha ndasenhe na!

¹⁶ Janha rrindattjo ra seguro que rrocjanha na sinttasayá quiai pascua hasta que cain tti rročho quiai jihí tsoenja ngain tti ttetonha Dios.

¹⁷ Cottimeja coá ná vaso de vino co joanjo graciais ngain Dios, co ndačho ngain na:

—Dihí ra jihí co tonchjeyehe chó ra, ¹⁸ ixin janha irrocjanha na sihi vino hasta que tsija tti ttetonha Dios.

¹⁹ Después coá niottja co joanjo gracias ngain Dios, cottimeja váña nio co joanjo nio ngain jehe na co ndačho:

—Jihí rročho cuerpona janha que rročanjo para ndasenhe para tsjenguijna ra. Cain tiempo nchehe ra janhi para rročaxaonxin ni ra.

²⁰ Cai jamé joinchehe conixin vaso de vino are ojoexin joine na co ndačho:

—Vaso jihí rročho tti trato naroaxin que jnina sinchesegurá. Co jnina mé singo jni para que tsjenguijna ra.

²¹ 'Pero jaxon rá tti xí que rrondache chojni quexén para rrotse na na janha, rá xí mé nttihí jí ngataha mesa conixin rana janha. ²² Janha chonda que senhe na inchin jiquininxin, pero janto tangui tsonhe tti rrondache chojni quexén para rrotse na na!

²³ Cottimeja tti tteyó chojni que vacao Jesús coexini na joanchianguihi chó na ixin quexehe tti rrondache chojni quexén para rrotse na Jesús.

Are joinchediscutí na ixin quensen sehe icha importante

²⁴ Cottimeja joinchediscutí na ixin quexehe de jehe na tti sehe icha importante ngain tti ttetonha Dios. ²⁵ Pero Jesús ndačho ngain na:

—Ngain mundo jihí, cain rey de cain nación, jehe ttetonha inchin jehe rinao, co cain xí que chonda cargo de ngain cain nación, dinihi xa xí que ncchehe jian. ²⁶ Pero jaha ra chondaha ra que sintte ra jamé, ixin tti sehe icha importante ngayaha ra, pero mé chonda que sehe inchin tti icha nchín. Co tti tsetonha ngayaha ra, mé tti chonda que icha tsjenguijna ra. ²⁷ Ndachjenji ni ra, ¿quensen icha importante, a tti dehe jine ngain mesa, o ani tti ncchehe ḫa que diquenhe jehe tti jine ngain mesa? Seguro jehe tti jí ngain mesa, mé tti icha importante. Pero janha rrihi nttihi ngayaha ra inchin ná tti ncchehe ḫa.

²⁸ Jaha ra tti vintte ra cainxin tiempo nganji na janha are janha vetan tangui. ²⁹ Mexinxin janha rrichjaha ra ná joachaxin para que jaha ra tsetonha ra, jañá inchin joachaxin que chjana Ndodana janha, ³⁰ para que sintte ra co sihi ra ngain mesana nttiha tti janha ttetonha, co sintte ra ngain lugar de joachaxin para sinchejuzguehe ra tti tteyó grupoe chojni Israel.

Jesús ndačho que Pedro rrondačho ixin jehe chonxinha Jesús

(Mt. 26.31-35; Mr. 14.27-31; Jn. 13.36-38)

³¹ Ndačho Jesús cai:

—Simón, Simón, tsjenxin; Satanás danchia joachaxin para que tsontsjenga ra jaha ra como si

rrocji ra trigo. ³² Pero janha rrinttatsán ñao Dios para ixin jaha, para que xonhi tiempo rrotjañaha tti jaha ditticaon. Co jaha are sačjhaha joažaon, ttjenguijna icha chojni que ditticaon para que sitticaon na jian cainxin tiempo.

³³ Simón Pedro ndačho ngain Jesús:

—Janha rinaho tsji cain lugar conixin soixin, masqui sifaxinna conixin soixin o hasta tti senxin soixin cai janha nttiha senxin na.

³⁴ Jesús ndačho ngain Pedro:

—Pedro, janha rrindattjo que jai mismo icha saho que rrotsje conttaxichia, jaha orrondačho nixin nttiha que chonxinha na.

Are ojoí tiempo que Jesús tangui conhe

³⁵ Cottimeja Jesús joanchiangui ngain tti chojni que vacao co ndačho:

—Are janha coetonha ra para joindache ra chojni de ixin Dios, co ixin cjoioha ra ni bolsa, ni tomi, ni catte, ¿ačhonja gondaha ra?

Jehe na ndačho na:

—Nahi, xonhi.

³⁶ Cottimeja ndačho Jesús ngain na:

—Co jai jeha jamé, xo chonda ra bolsa, ttjiho ra, co cai tomi; co xo chondaha ra espada nchecji ra chamarrá ra para ttenanxin ra espada. ³⁷ Ixin janha rrindattjo ra que chonda que siconna janha inchin jitaxin Palabré Dios: “Jehe venhe inchin chojni que nchehe jianha.” Ixin cain tti jitaxin de ixin janha chonda que tsonhe.

³⁸ Cottimeja jehe na vinttendačho na:

—Nttihi jí yó espada.

Co Jesús ndačho:

—Conixin yao.

*Are Jesús joinchetsenhe ñao Dios ngain Getsemaní
(Mt. 26.36-46; Mr. 14.32-42)*

³⁹ Cottimeja vačjje Jesús co inchin costumbre que jehe vanchehe, jehe sacjoi para ngagaha tti jnanchjan de Nttaolivo, co rroé tti chojni que vacao. ⁴⁰ Co are ojiji na nttiha, jehe ndačho ngain na:

—Nchetsenhe ra ñao Dios para que sitaha ra de sinchehe ra cosa jianha.

⁴¹ Cottimeja Jesús sacjoi nchion cjin de ngain na, inchin cjinxin ttixinhi ni de tja ni ná xo, co nttiha vett toxin nttajochjih para joinchetsenhe ñao Dios. ⁴² Co jehe ndačho:

—Padre, si rinao, tančhjandaha na para que janha sattoha ngain tti anto tangui que tsonna, pero tsoenha inchin janha rinaho, sino que tsonhe inchin soixin rinao.

⁴³ Cottimeja joicononxin ná ángel de Dios ngain Jesús para que joinchesoji espiritue Jesús. ⁴⁴ Co ixin jehe icha tangui conohe ngain ansén, jehe icha jian joinchetsenhe ñao Dios co ndachjín cjan inchin jni, co ye ye gota vinttji ngataha nontte.

⁴⁵ Co are joexin joinchetsenhe ñao Dios, vingatjen co cjoí ngain tti chojni que vacao; co jehe na otatejoa na ixin icoixinha na de joachjaon.

⁴⁶ Cottimeja jehe ndačho ngain na:

—¿Quedonda tatečhin ra? Dingattjen ra, co nchetsenhe ra ñao Dios para que sitaha ra de sinchehe ra cosa jianha.

*Are tse na Jesús**(Mt. 26.47-56; Mr. 14.43-50; Jn. 18.2-11)*

⁴⁷ Jesús xa jinichja jañá are ojoí anto tsje chojni. Tti vinci Judas, jehe ná de tti tteyó chojni que vacao Jesús, jehe mé tti jitaon nttiha de cainxin chojni mé, co are ojoí, jehe conchienhe ngaca Jesús para coetoxin. ⁴⁸ Cottimeja Jesús ndačho ngain Judas:

—Judas ¿acoetoxin na para cjoago ixin janha tti Xí que joixin de ngajni?

⁴⁹ Co tti icha chojni que vacao Jesús, are vicon na jíhi, ndačho na ngain Jesús:

—¿Atsjaya na conixin espada?

⁵⁰ Co ná de chojni mé joinchenihi ná xinchehe xé xidána icha importante, ixin cončinjihi ná ndatsjoen xa lado jian xa. ⁵¹ Pero Jesús ndačho ngain tti chojni que vacao:

—Tančhjanda ra xa; conixin yao.

Cottimeja Jesús catte ndatsjoen xí mé co ndatsexin. ⁵² Cottimeja ndačho Jesús ngain cain xidána que vaquetonha ngain icha xidána, conixin ngain xipolicié nihngo icha importante, co ngain cain xittetonha ngain nihngo mé, tti xicjoi para sajoicao xa Jesús:

—¿Ajoihi ra joirroehna ni ra conixin espada co nttá inchin janha rrocji ná tti chehe? ⁵³ Cain nchanho are janha joarihi nganji ra ngain nihngo icha importante, jaha ra xonhi tiempo joinao ra rrotse ni ra. Pero jai hora jíhi tti mero hora para sinchehe ra jíhi, ixin Satanás tti jichonda joachaxin jaxon.

*Pedro ndačho ixin jehe chonxinha Jesús
 (Mt. 26.57-58, 69-75; Mr. 14.53-54, 66-72;
 Jn. 18.12-18, 25-27)*

⁵⁴ Cottimeja tse na Jesús, co sajoicao na para ngain nchiandoha xidána icha importante. Co Pedro cjinxin jirroexin. ⁵⁵ Nttiha ngain patioe nchia mé cjoaga na ná ҳohi co nttiha tavinttendanji na ҳohi mé para xixóhe na. Co cai Pedro nttiha tavehe ngayé na. ⁵⁶ Cottimeja ná nchimozé xidána mé, are vicon nčha que Pedro tajixixóhe ngandehe ҳohi nttiha tavetsjehe nčha jian co ndačho nčha:

—Cai xí jihí vacao xa Jesús.

⁵⁷ Pero Pedro čoha ndačho ndoa, co jehe ndačho:

—Janha chonxinha xí mé.

⁵⁸ Nchion después vicon ná xí, co xí mé ndačho xa ngain:

—Jaha cai ná de chojní Jesús.

Pero Pedro ndačho:

—Nahi, janha jeha chojní jehe.

⁵⁹ Inchin ná hora después iná xí ҳa cjan xa ndačho xa:

—Ján ndoa xí jihí vacao xa Jesús, ixin jehe xa cai Galilea regioen xa.

⁶⁰ Cottimeja Pedro ndačho:

—Janha nonaha de quehe rrinichja jaha.

Ngain rato mé are Pedro ҳa jinichja jamé, otsje ná conttaxichia. ⁶¹ Cottimeja Jesús ngaria co tsjehe ngain Pedro, cottimeja Pedro ҳaxaon ixin Jesús ondačho: “Saho que conttaxichia rrotsje va jai, jaha orrondačho ninxin nttiha que chonxinha na

janha.” ⁶² Cottimeja Pedro vačhjexin de nttiha co anto tsjanga.

*Are cjoanoa xa Jesús
(Mt. 26.67-68; Mr. 14.65)*

⁶³ Xisoldado que tenda Jesús cjoanoa xa co xanguí xa nttá. ⁶⁴ Jehe xa coejehe xa con Jesús co xanguí xa tton ngá con co ndačho xa ngain:

—¡Datsoenhe quensen goen!

⁶⁵ Co ndačho xa icha cosa feo ngain.

*Are Jesús ngain juzgadoe nihngo
(Mt. 26.59-66; Mr. 14.55-64; Jn. 18.19-24)*

⁶⁶ Co are ovingasán xatte cain xittetonha ngain nihngo, cain xidána que vaquetonha ngain icha xidána, co cain ximaestroe ley para sajoicao xa Jesús ngain juzgadoe nihngo. Nttiha joanchian-guixin xa Jesús, co ndačho xa:

⁶⁷ —Nttihi ndachjenji ni ra, ¿ajaha tti Cristo?

Jehe ndačho ngain xa:

—Si rrondattjo ra que jáñ, sitticaonna ha ra. ⁶⁸ Co si sanchianguiha ra ná cosa, jaha ra rrondachjenjiha ni ra, ni tsančhjandaha ni ra satsji. ⁶⁹ Pero desde jai, janha, tti Xí que joixin de ngajni, osarihi ngain lado jian de Dios que chonda cainxin joachaxin.

⁷⁰ Cottimeja cainxin xa joanchianguihi xa Jesús co ndačho xa:

—Mexinxin, ¿ajaha tti Xenhe Dios?

Jesús ndačho:

—Ján, janha inchin ndačho jaha ra mismo.

⁷¹ Cottimeja vinttendačho xa:

—¿Quedonda tsjé na icha chojni de testigo? Ján na mismo coinihi na tti jianha que ndačho xí jihi.

23

Jesús ngain Pilato

(Mt. 27.1-2, 11-14; Mr. 15.1-5; Jn. 18.28-38)

¹ Cottimeja cainxin xa vingattjen xa co sajoicao xa Jesús ngain Pilato. ² Ntiha coexinhi xa nichja xa tti jeha ndoa de ixin Jesús, co ndačho xa:

—Janha na vicon na que xí jihi jinchequeto xa chojnina na. Co ndačho xa que janha na chondaha na que tsjenga na hna impuesto ngain xiemperador romano, co cai ndačho xa que jehe xa tti Cristo, co mé rročho que jehe xa ná rey.

³ Cottimeja Pilato joanchiangui ngain Jesús:

—¿Ajaha tti Rey de chojni judío?

Jesús ndačho:

—Ján janha, jañá inchin jaha ndačho.

⁴ Cottimeja Pilato ndačho ngain xidána que vaquetonha ngain icha xidána, co ngain cain chojni que joinchechienhe Jesús ntiha:

—Janha xonhi cosa jianha dittjá xí jihi.

⁵ Pero cain jehe xa icha coyao xa co ndačho xa:

—Jehe xa joincheyehe xa chojni ngoixin Judea de ixin tti jehe xa nichja xa. Coexinxin xa ngain Galilea, co jai ontihí jinchehe xa jamé.

Jesús ngain Herodes

⁶ Are Pilato coinhi jihi, jehe joanchiangui ngain xa si Jesús joixin de ngain Galilea. ⁷ Co are vintendačho xa que ján, Pilato sarroanha Jesús para ngain Herodes ixin mé tti vehe gobernador de ngain Galilea tiempo mé, co ngain conittjao mé ntiha vehe Herodes ngain ciudad de Jerusalén.

⁸ Are Herodes vicon Jesús, jehe anto ché ixin anto sé jehe jiřaxaon sicon Jesús ixin jehe coinhi

vanichja chojni de ixin tti jian que vanchehe Jesús. Co jehe Herodes joinao rroguiicon ná milagro que rrojinchehe Jesús. ⁹ Herodes anto tsje joanchian-gui ngain Jesús pero Jesús xonhi ndačho. ¹⁰ Cai nt-tiha conchienhe tsje xidána que vaquetonha ngain icha xidána co tsje ximaestroe ley para ndačho xa tsje cosa ndoaha de ixin Jesús ixin anto coñao xa. ¹¹ Cottimeja Herodes conixin cain xisoldadoe xaxaon xa que Jesús xonhi rentte, co para cjoanoa xa Jesús, joinchengá xa lontto čhjoin inchin lont-toe rey. Cottimeja Herodes rroanha Jesús para ngain Pilato iná. ¹² Ngain nchanho mé Pilato co Herodes vinttegoan amigo. Icha saho jehe na vaningaconhe chó na.

*Are ndačho na ixin Jesús chonda que ndasenhe
(Mt. 27.15-26; Mr. 15.6-15; Jn. 18.39—19.16)*

¹³ Cottimeja Pilato vayé cain xidána que vaquetonha ngain icha xidána co cain xí que vechonda joachaxin ngain chojni judío, conixin icha chojni, ¹⁴ co ndačho ngain na:

—Jaha ra joicohna ra xí jihí, co ndačho ra ixin jinchequeto xa chojni, pero janha joanchi-anguia xa ngattoxon con ra, co ovicon ra que janha xonhi vittjá xa que ixin jehe xa jinchehe xa ná cosa jianha inchin jaha ra tjanguahi ra xa. ¹⁵ Cai Herodes sarroanna xí jihí iná, ixin jehe xa xonhi cosa jianha jica xa. Ovicon ra que xí jihí xonhi jianha dinchehe xa para que sequininxin ndasenhe xa. ¹⁶ Janha tsetonha soan xa castigado, cottimeja tsančhjanda xa satsji xa.

¹⁷ Ngain quiai mé, Pilato vechonda costumbre de tančhjanda ná de tti tteaxinhi para sattji para

que chojni judío icha vaché na. ¹⁸ Pero cainxin na coexinhi na coyao na co ndačho na:

—¡Dantsje xí yá para siguenhe xa co tančhjanda Barrabás satsji!

¹⁹ Co Barrabás jihi coiaxinho na ngain cárcel ixin jehe joinchequeto chojni ngain ciudad de Jerusalén co ixin jehe nagoenxon chojni. ²⁰ Pilato joinao rrocančhjanda Jesús, mexinxin jehe cjan ndačho ngain na iná, ²¹ pero jehe na icha vinttocoymo na sén co ndačho na:

—¡Nchecrucificá xa! ¡Nchecrucificá xa!

²² Nixin nttiha ndačho Pilato ngain na:

—Mexinxin, ¿quehe cosa jianha joinchehe xí jihi? Janha xonhi cosa jianha dittjá xa para que sequinixin senhe xa. Janha tsetonha que soan xa castigado, cottimeja tsančhjanda xa satsji xa.

²³ Pero jehe na vittoexinha na, co icha coyao na co joanchia na que ixin Pilato sinchecrucificá Jesús. Co anto vinttocoymo na jehe na conixin cain xidána que vaquetonha ngain icha xidána hasta que conhe inchin tti jehe na joinao na. ²⁴ Pilato joinchehe inchin jehe na joinao na, ²⁵ co jamé jehe coačhjanda sacjoi jehe tti vehe ngaxinhi cárcel ixin joinchequeto chojni co nagoenxon chojni. Co jehe Pilato joanjo Jesús ngain na para que jehe na joinchehe na inchin joinao na ngain Jesús.

Are joinchecrucificá na Jesús

(Mt. 27.32-44; Mr. 15.21-32; Jn. 19.17-27)

²⁶ Are osatedicão xisoldado romano Jesús para joinchecrucificá xa, vetan xa ná xí de Cirene que vinh Simón. Jehe Simón rato mé joigaha ciudad

de Jerusalén. Co jehe xa tse xa Simón mé co joincheca xa crue Jesús co joincherroé xa Jesús.

²⁷ Co terroé anto tsje chojni, co tsje nčhí que tetsjanga nčha co tetoyao nčha de ixin joachjaoen Jesús. ²⁸ Pero Jesús tsjehe ngain cain nčhí mé co ndačho:

—Jaha ra xo nčhí ra de ngain Jerusalén, tsjan-gaxinha ni ra janha, sino que de ixin jaha ra misma, co de ixin xanha ra. ²⁹ Ixin ojitonchiaon nchanho que chojni rrondačho na: “Anto čhjoin para ixin tti nčhí que čhoha rrochonda nčha chjan, tti nčhí que xonhi chjan joincheconcjihi, ni joinchecai.” ³⁰ Co are mé chojni tsexinhi na rrondačho na ngain tsje jna: “Dinttji ra ngataha janha na”; co rrondačho na ngain tsje jnanchjan: “Ttema ni ra.” ³¹ Ixin si janha inchin ná nttá que jichon co janhi nchehe na nganji na janha, ¿mé quehe sinchehe na nganji jaha ra, que jaha ra inchin tti ntaxema?

³² Cai nttiha tedicao xa yó xichehe para joigoen xa xichehe mé conixin Jesús. ³³ Are ojoiyi na ngain tti lugar que dinki Ntalorojá Chojni, ntiha joincherucifícá xa Jesús conixin jehe tti yó xichehe: ná xa ngain lado jian de Jesús, co iná xa ngain lado cjon. ³⁴ Co are otencrucifícá xa Jesús jehe ndačho:

—Padre, nchetjañehe xí tehe ixin noeha xa quehe tenchehe xa.

Co cain xisoldado mé joantsje xa suerte para chjeyehe xa lonttoe Jesús. ³⁵ Co tsje chojni cjoí na nttiha para vicon na, co cai cjoí tsje xí que vinttechonda joachaxin ngain chojni judío; cain xí mé cjoanoa xa Jesús co ndačho xa:

—Jehe nchao cjoenguijna icha chojni, pero jai si ndoa jehe tti Cristo tti Dios coinchiehe, socon na sanianxin de nganito cruz yá.

³⁶ Cai cain xisoldado nttiha cjoanoa xa Jesú; vintteconchienhe xa ngain cruz co joanjo xa vino san para vihi Jesú, ³⁷ co ndačho xa ngain:

—Si jaha tti Rey de chojni judío, danianxin de nganito cruz jaho.

³⁸ Co nttiha já cruz que venganito Jesú vehe ná xón que vetaxin ixin nguigoa griego, latín, co hebreo que ndačho: “Xí jihí tti Rey de chojni judío.”

³⁹ Ná de tti xichehe que tenganito cruz nttiha, ndačho xa feo ngain Jesú:

—Si jaha tti Cristo, danianxin de nganito cruz co ncheganía ni ra janha na cai.

⁴⁰ Pero tti xí iná joinchesattehe xa xicompañeroe xa co ndačho xa:

—¿Añagoenha Dios, jaha que rridatto ngain xajeho castigo? ⁴¹ Ján na jí razón que tedotan na tangui jihí ixin tettjenga na hna tti jianha que jointtoho na, pero xí jihí xonhi cosa jianha joinchehe xa.

⁴² Cottimeja ndačho xí mé ngain Jesú:

—Jesú, xaxaon na janha are soixin tsexinhi tsetonha.

⁴³ Jesú ndačho:

—Janha seguro rrindattjo que desde jai jaha osarihi conixin janha nttiha ngajni.

*Are ndavenhe Jesú
(Mt. 27.45-56; Mr. 15.33-41; Jn. 19.28-30)*

44 Are inchin ngosine nchanho, cottimeja ndaconaxin xehe ngoixin ngataha nontte nttiha, co mé conchjenhe hasta ní hora tsocjin. **45** Nchanho ndaconaxin xehe, co tti manta que vettua ngaxinhi tti nihngo icha importante ndavichjenga ngosinenxin manta. **46** Cottimeja Jesús coyao co ndačho:

—Padre, ngá rá tsín espirituna.

Co are jehe joexin ndačho jiji, jehe ndavenhe.

47 Are vicon xicapitán romano ixin quexén conhe, jehe xa ḥaon xa ngain Dios co ndačho xa:

—Ján, ndoa xí jiji ḥonhi jianha jica xa ngattoxon con Dios.

48 Cain chojni que te nttiha, are vicon na cain mé, savinttecji na co ḥanguí na pechoe na tton ixin anto coá na joachjaon. **49** Co cain niamigoe Jesús, co cain nčhí que joixin desde Galilea para vacao nčha, cjinxin tavintte na para vicon na cain cosa jiji.

Are ḥavá Jesús

(Mt. 27.57-61; Mr. 15.42-47; Jn. 19.38-42)

50 Vehe ná xí jian de ngain ansén xa que vinhí xa José, co rajné xa Arimatea ngain regioen Judea. Xí mé ná xijuez ngain juzgadoe nihngo. **51** José jiji cai jichonhe tiempo are Dios siquetonha ngataha nontte. Co jehe coñao de ixin tti joinchehe icha xijuez ngain Jesús. **52** Mexinxin jehe cjoí joitsjehe Pilato para joiganchiehe joachaxin ixin jehe sasicao cuerpo Jesús. **53** Co después de joincheganianxin cuerpo Jesús de nganito cruz, jehe coensiha cuerpo Jesús ná manta roa co joiquín cuerpo ngain ná cueva que odingue na ngadoho ná ttjao tti ḥa

xonhi chojni dixavá. ⁵⁴ Mé cjoj tsocjin víspera de ngain tti nchanho que nchejogaha na.

⁵⁵ Tti cain nchí que joixin desde Galilea conixin Jesús cjoj nčha vintteguisjehe nčha cueva mé, para vicon nčha quexén vittohe cuerpoe Jesús.

⁵⁶ Co are sacjan nčha para nchiandoha nčha, joinchechjian nčha perfume co pomada para cuerpoe Jesús; cottimeja ngain tti nchanho que nchejogaha na, jehe nčha vinttenchejogaha nčha cai inchin ttetonha ley que vayé Moisés.

24

Are xechon Jesús

(Mt. 28.1-10; Mr. 16.1-8; Jn. 20.1-10)

¹ Domingo, saho nchanho de semana, ndoyo, cain nchí mé cjan nčha ngain sepultura joicao nčha tti cain perfume que cointtecjan nčha, co icha nchí joicao chó nčha. ² Are vintteguiji nčha nttiha, vicon nčha tti xo que vejé sepultura mé ijiha xo nttiha. ³ Co jehe nčha vintteguixinhi nčha sepultura mé pero ivittjaha nčha cuerpoe Jesús. ⁴ Anto vinttexaon nčha co ni inoeha nčha quehe sinchehe nčha, are vicon nčha yó xí tatengattjen xa ngaca nčha tengá xa lontto tedaquima. ⁵ Co ixin jehe nčha anto vinttexaon nčha vintteguis nčha hasta tti ngataha nontte, co jehe cayoi xí mé vinttendačo xa ngain nčha:

—¿Quedonda jaha ra tettjé ra ngain sepultura tti jichon jai? ⁶ Jehe icoha nttihi ixin jehe xechon. xaxaon ra quexén ndattjo ra are jehe xa vehe ngain Galilea. ⁷ Jehe ndačho que jehe, tti Xí que joixin de ngajni, chonda que sinchechienhe na

ngá rá chojni jianha, co jehe na sinchecrucificá na, pero ngain nchanho ninxin jehe rroxechon.

⁸ Cottimeja xaxaon cain nčí mé tti ndačho Jesús, ⁹ co después de cjanxin nčha de ngain sepultura, coequin nčha cain jihi ngain tti ttejngo chojni que vacao Jesús, co ngain icha chojni cai. ¹⁰ Co tti cain nčí que joicao joajna jihi ngain tti ttejngo chojni que vacao Jesús, cjo María Magdalena, co Juana co iná María, janné Jacobo, co icanxin nčí. ¹¹ Pero tti chojni que vacao Jesús vitticaonha na tti ndačho cain nčí mé.

¹² Pero masqui jamé xaxaon cain na, Pedro vačhje co coinga cjoí ngain sepultura. Co are jehe tsjehe ngaxinhi sepultura, jehe vicon tti manta roa que vesia cuerpo Jesús tají manta ná lado. Cottimeja sacjan para tti nchia co anto goan admirado de ixin quehe diconhe.

Tti conhe are ngatja nttiha para Emaús

(Mr. 16.12-13)

¹³ Ngain xajeho nchanho mé, yó de chojni que vitticaon Jesús satettji na ngain ná rajna dinki Emaús, inchin ttejngo kilometro cjinxin de Jerusalén. ¹⁴ Tetjao na de ixin cain tti conhe Jesús. ¹⁵ Co are jehe na tetjao na mé, Jesús mismo conchienhe ngaca na co sacjoi conixin jehe na. ¹⁶ Pero masqui vicon na que nttiha jittji Jesús, jehe na joatsoanha na, ixin inchin ná cosa cayacoen jmacon na para joatsoanha na Jesús daca. ¹⁷ Cottimeja Jesús joanchiangui ngain na co ndačho:

—¿Quehe tetjao ra jaxon que satettji ra ngain nttiha jihi? ¿Quedonda techinhi ra?

18 Ná de jehe na que vinhí Cleofas ndačho:

—Ngoixin mundo nohe chojni tti coenxin Jerusalén ngain nchanho tehe. ¿Apoco jaha masqui joixin ntiha noaha quehe conhe?

19 Cottimeja Jesús ndačho:

—¿Quehe conhe?

Co jehe na ndačho na:

—De ixin tti conhe Jesús de Nazaret, que jehe cjoí ná profeta jian ngattoxon con Dios co ngattonoxon con cainxin chojni. Co jehe joichonda anto tsje joachaxin de ngain tti vanchehe co de ngain tti jehe vanichja. **20** Co de ixin quexén cain xidána que ttetonhe icha xidána co cain xittetonha nganji na joinchechienhe xa ngain chojni romano para goenxin na nganito cruz. **21** Janha na važaxanho na que jehe tti rrochjé libertad chojni de ngain nación Israel. Co jai ochonda ní nchanho que jehe ndavenhe. **22** Masqui canxion nčí que cai vacao jehe conixin janha na, nčí mé joinchešaon na nčha ixin vintteci nčha ndoyo ngain sepulturé jehe, **23** co ixin vittjaha nčha cuerpo Jesús, cjan nčha ngain tti nchia que vintte na co ndachjenji na nčha que ixin vintteguicon nčha yó ángel que ndačho ngain nčha que ixin Jesús jichon jai. **24** Cottimeja canxion de nicompañerona na cjoí na ngain sepultura co vicon na ntiha jamé inchin ndačho nčí que vinttecji saho, pero Jesús viconha na.

25 Cottimeja Jesús ndačho ngain cayoi xí mé:

—¡Atto ttinxinha ra jaha ra, co anto tetončjanha ra para sitticaon ra cain tti dindačho profeta! **26** ¿Apoco Cristo chondaha que rroconhe

cain tti tangui jihi icha saho que vayé cain joachaxin que jiquininxin?

²⁷ Cottimeja jehe coexinhi ndache na quehe rročho Cain texto de ngain tti jitaxin Palabré Dios tti jinichja de ixin jehe Jesús; coexinxin de ngain libroe Moisés, co joinchehe sigue ngain libro que dicjin Cain profeta.

²⁸ Are joiji na ngain tti rajna que tettji na, Jesús joinchehe que jehe rrojinchéhe sigue nttié. ²⁹ Pero jehe na joinchetsenhe na ñao que sittohe ngain na, co ndačho na:

—Dittoha nttihi nganji na, ixin ondajitonaxin xehe.

Cottimeja Jesús joixinhi nchia mé para vittohe nttiha ngain na. ³⁰ Co are jehe otavehe ngain na ngain mesa coá niottja co joanjo gracias ngain Dios, cottimeja jehe cončinji nio co joanjo nio ngain na. ³¹ Ngain rato mé, Dios vinttjian tti tecayacoen jmacon na, co jehe na joatsoan na que jehe Jesús; pero jehe anto daca ndavitján de ngattoxon con na. ³² Co ndache chó na:

—¿Ajeha conohe ansean na anto čjoin are jehe nichja nganji na ngatja nttiha co jindattjo na de ixin tti jitaxin Palabré Dios?

³³ Cottimeja jehe na ixonhi chonhe na, sino que jaicoa coá na nttiha co sacjan na para Jerusalén. Nttiha vittjaxin na tti ttejngó chojni que vacao Jesús tate na Cain na conixin icha nicompañeroe na. ³⁴ Co jehe na ndačho na ngain tti yó xí que joí:

—Ján, ndoa díxechon Jesús, ixin Pedro vicon.

³⁵ Cottimeja tti yó xí que nandá joí ndačho xa tti conhe ngatja nttiha, co quexén joatsoan xa Jesús are jehe cončinji niottja.

*Are Jesús ḥago ngain chojni que vacao
(Mt. 28.16-20; Mr. 16.14-18; Jn. 20.19-23)*

³⁶ ḥa tetjao na de ixin jihi, are ḥago Jesús, joiguengattjen ngayé na co joanjo joajna ngain na co ndačho:

—Dayehe ra tti čhjoin que tsonohe ansean ra.

³⁷ Jehe na anto vintteḥaon na co ḥaxaon na ngain rato mé que jehe na tedicon na espiritue ná nindadiguenhe. ³⁸ Pero Jesús ndačho ngain na:

—¿Quedonda anto teḥaon ra? ¿Quedonda ḥa chondaha ra seguro ngain ansean ra de ixin janha?

³⁹ Tsjexin ra ngain rana co ngain rottena tti joinchenina na. Catte ni ra si rinao ra, co sicon ra que ján, janha. Ná espíritu chondaha nttao ni ntaloro inchin jaha ra tedicon ra que janha rrichonda jaxon.

⁴⁰ Are jehe ndačho jihi, jehe cjoago ngain na rá co rotté tti dijidoho clavo are ngainito cruz.

⁴¹ Pero ixin anto ché na co cai ḥaon na hasta jehe na ḥa čhoha vitticaon na ixin jehe mero nttiha, mexinxin Jesús ndačho ngain na:

—Achonda ra nttihi tti sine ni?

⁴² Cottimeja jehe na chjé na Jesús rioho copescado dichjan co rioho niottja de tsjén cormena. ⁴³ Co jehe tse mé co joine nttiha ngattoxon con na. ⁴⁴ Cottimeja ndačho ngain na:

—Tti janha conna, mé tti joindattjo ra are janha ḥa joarihi nganji ra, que chonda que joiconhe cain tti jitaxin de ixin janha ngain ley que vayé Moisés co ngain cain libro que dicjin cain profeta co ngain salmo.

45 Cottimeja jehe joinchequinxin na tti jitaxin ngain Palabré Dios, **46** co ndačho ngain na:

—Janhi jitaxin ngain Palabré Dios que Cristo chonda que ndasenhe, co nchanho ninxin jehe chonda que rroxechon. **47** Co de ixin nombré jehe icha chojni chonda que sinchenohe na chojni de cainxin nación ixin chonda na que tsentoxinho na vidé na para que cain tti jianha que tenchehe na nchao sitjañehe na. Co tsexinxin tsonohe chojni jamé desde ngain Jerusalén. **48** Jaha ra tti testigo ra de cain cosa jihi. **49** Co tsjexin ra, janha rrorroanha nganji ra Espíritu Santo tti ndačho Ndodana sanjo Ndo nganji ra. Pero tadintte ra nttihi ngain ciudad de Jerusalén hasta que sayeja ra tti joachaxin mé que tsixin de noi.

*Are Jesús sacoajín para ngajni
(Mr. 16.19-20)*

50 Cottimeja Jesús savačhjecaoxin na de ngagaha ciudad co sacjoi na hasta rajna Betania, co ntihia jehe tsín rá noi para joinchenchaon na. **51** Co are jehe mero jinchenchaon na, jehe sacjoixin de ngayé na, co sacoajín para ngajni. **52** Jehe na, después de joinchecoanxini na Jesús, sacjan na para Jerusalén, co anto ché na. **53** Co cainxin tiempo jehe na vintte na ngain nihngo icha importante para vanchecoanxini na Dios. Amén.

**Tti jian joajn   Jesucristo
New Testament in Popoloca, San Marcos Tlalcoyac  **

copyright © 1982 Wycliffe Bible Translators, Inc.

Language: San Marcos Tlalcoyac   Popoloca (Popoloca, San Marcos Tlalcoyac  )

Translation by: Wycliffe Bible Translators, Inc.

Popoloca, Tlacoalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyac  

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

a23ba35e-b016-5f67-a705-694e460cf18a